



Captivus Redemptor, et Martyr  
Venerab. Vir Dei, P. Fr. Joannes à Jesu  
Maria, Trinitarius Discalceatus, Algerij  
Mortuus in Captivitate 24 Junij Anno 1672.

Joseph & Andre Schmuizers Sc

# CAPTIVUS REDEMPTOR.

*Hoc est:*

VITA, & RES GESTÆ

V. P. Fr.

# JOANNIS

A JESU MARIA

Ordinis Excalceatorum SSS.

TRINITATIS Red. Captivorum,

*AUTHORE*

P. Fr. JOSEPHO à S. MARIA Trinitario

Excalceato, & Definitor Generali Emerito,

AUDITORIBUS OBLATUS,

*DIU*

In Collegio Tyrnaviensi Ordinis SSS.

TRINITATIS Redemptionis Captivorum

Annò M. DCC. XLIII. Mense Septembri Die 9

POSITIONES

# PHILOSOPHIÆ

RATIONALIS, ET NATURALIS

*Publicè propugnarent*

Fr. FRIDERICUS à JESU NAZARENO, &

Fr. CONSTANTINUS à B. VIRGINE

Prælibati Ordinis Professi.

*P R Æ S I D E*

P. Fr. VENANTIO à S. AGNETE,

Philosophiæ Lectore Actuali.

---

TYRNAVIÆ, Typis Academicis Soc. JESU 1743.



S U B  
GLORIOSISSIMIS AUSPICIIS  
IN

Celeberrima Universitate Parisiensi  
DOCTORIS EMINENTIS,

*Zelantissimi*  
DALMATIÆ, ET DIOCLIÆ

APOSTOLI,  
DIVI PATRIARCHÆ

S. P. N.

JOANNIS  
DE MATHA,

Ordinis Sanctissimæ Trinitatis de  
Redemptione Captivorum

FUNDATORIS.

CUI

Se, suasque Positiones Philosophicas  
in humillimam filialis devotionis  
tesseram


D. D. D.

Præses, & Defendentes,  
qui suprâ.

GLORIOSISSIME  
PATRIARCHA

S. P. N.

J O A N N E S  
DE MATHA.



*Estos Tibi hodie celebrare dies  
non præsunit tenuitas nostra Sancte Pa-  
ter! utpote quòd amplissima Tui Nominis  
Majestas, Majestuosæ Patriarchæ dignitas,  
dignissima sanctitatis memoria celsissimos*

)( 2

*alio-*

*alioquin eternaturæ gloriæ plausus resol-  
vant, ut jam sic nihil omnino supersit,  
quod feliciorē ultro memoriā com-  
mendaret. Suis esto in deliriis insaniant,  
qui magna maximis appingere conantur,  
summa tamen nobis temeritatis argumen-  
tum foret, clarum obtenebratâ faculâ  
meridiem illustrare. Id vota petunt,  
ut devotissimô pietatis lytrô, debitâque  
JOANNI clientelâ parentemus. Sisti-  
mur etiamnum, laureatisque Effedis Tuis  
adsternimur Dive Patrone! ubi namque  
victricibus palmis gloriaris, victas Tibi  
manus debemus, & in hoc summa nobis  
beatitudo est, dum non nisi Paternis vincu-  
lis captivamur. Magna sanè virtus erat  
Joannis in vinculis, celebrem sibi im-  
mortalitatis memoriā Redemptor pe-  
perit, qui pro lege fraterna captivus,  
esse peroptabat. Et Tu JOANNES es San-  
cte Pater Redemptorum Ante-Signanus,  
& animam pro fratribus dira sub barba-  
rorum tyrannide posuisti, quo sic Redem-  
ptoris nomen charitatis munere conde-  
corares. Parùm Tibi erat Redemptoris  
nomen gestâsse, nisi & ea explevisses,  
quæ tali nomine digna petuntur; minùs  
repu-*

reputabas JOANNEM esse, nisi & gratis abundares; minimam dicebas Te Patrem compellitari, nisi & in filiis Redemptores numerares. Extremas quidem curas isthac Tibi sollicitudo minabatur, sed enim ardua, quae pulchra! solum coronae certantem manent. Certasti equidem Gloriosissime Patriarcha! ubi vix vitam spirares, & ad ultimas usque horas certasti: meritis proin Tibi palmas Superi plectunt, quas perennatura saeculorum memoria vel inde mirabitur, quasi verò uni gloria natus JOANNES soli, polique nobilitatem ferre debuisset. Tulit etiam JOANNES suum cuique decus: mundo quidem, dum celeberrimis Parisiensis Academiae cathedris suam Doctoris Eminentis ceram imprimeret, Apostolicis Dalmatiae & Diocliae muniis subscriberet, cunctarum demum Regionum Magnus semper Patronus staret. Et caelos collustrat, dum Patriarchale vexillum adorandae Trinitatis symbolum explicat, quo ter trinos Angelorum choros ad trinam Sanctitatis laudem indefinenter invitat.

Ha-



*Habet jam cœlum Gloriosum Incolam,  
habet & orbis Thaumaturgum; & Tu  
habes Sancte Pater! in quo triumphes.  
En Tibi Joannes Redemptor capti-  
vus! plures quidem Ordinis Tui Filios  
Redemptores jactitas, qui, ut barbara ty-  
rannorum vincula disrumperent, pro sua,  
& Patris pietate vitam profunderè eò  
minùs dubitabant, quò magis aestima-  
bant Patris vestigia æmulari, unum Ti-  
bi Joannem sistimus, quem, ubi vincu-  
la solvere docuisti, vinculis mancipa-  
tum vide, & charitatis pondere pressum.  
Cum hoc Tibi captivam, suisque obscu-  
ritatum tenebris implicatam adducimus  
Philosophiam nostram. Te solum illa  
Redemptorem appellat, Te lucis suæ Au-  
thorem postulat eousque cyméria in ca-  
ligine permansura, quoadusque beni-  
gnissimos JOANNES gratiarum radios  
concefferis. Solve vincula, da fulgo-  
rem, piàmque clientelam respice*

**Devotissimorum filiorum  
Tuorum.**



# CONCLUSIONES PHILOSOPHIÆ

Rationalis, & Naturalis.

**I.** Logica est Ars & Scientia purè practica.  
**II.** Nullum claudit habitum utentem.  
**III.** In supposito tamen existentiae habitus  
Logicæ utentis, is foret realiter distinctus ab  
habitu Logicæ docentis. **IV.** Ad alias scien-  
tias in statu perfecto. **V.** Etiam cum ex-  
trinseca reflexæ securitatis perfectione acqui-  
rendas non est simpliciter necessaria. **VI.** Ad  
actus aliarum scientiarum solum moraliter in-  
fluit. **VII.** Objectum materiale proximum  
Logices sunt omnes tres mentis operationes  
prout in fieri consideratæ. **VIII.** Formale,  
rectitudo practica. **IX.** Attributionis, syllo-  
gismus rectus ex forma. **X.** Distinctio rea-  
lis formaliter stat in negabilitate intrinseca  
unius de alio in recto. **XI.** Inter gradus me-  
taphysicos ejusdem individui creati impossi-  
bilis est distinctio Scotistica, & virtualis in-  
trinseca. **XII.** Sicut & præcisiones objecti-  
væ objecti tum in se, tum in substituto co-  
gniti. **XIII.** Universale metaphysicum fit per  
cognitionem formaliter præscindentem **XIV.**  
Non datur adæquatè à parte rei. **XV.** Uni-  
versale Platonicum non est chimæricum. **XVI.**  
Universale logicum dictum, de individuo ma-  
net


net universale. XVII. Ens præscindit à differentiis, & hæ vicissim ab ente. XVIII. Relatio prædicamentalis formaliter stat in ratione fundandi proxima, & adæquata. XIX. Principia corporis naturalis in fieri sunt tantum materia, & forma. XX. In facto esse nulla. XXI. Materia prima in serie omnium formarum substantialium appetit ignobiliores præ nobilioribus. XXII. Naturaliter spoliari nequit omni formâ substantiali. XXIII. Sciri non potest: utrum forma prius corrupta naturaliter, vel verò solum supernaturaliter reproduci possit. XXIV. Repugnant formæ substantiales partiales. XXV. De absoluto possibilis est modus ad modum in eodem genere. XXVI. Totum non distinguitur realiter à partibus simul sumptis. XXVII. Naturaliter possibilis est duplex causa in actu secundo totalis respectu ejusdem numerû effectûs. XXVIII. Naturaliter possibilis non est replicatio, res tamen replicata plus potest, quàm non replicata. XXIX. Pro statu physicæ existentiae non repugnat infinitum categorematicum creatum tam in numero, quàm intensione, & extensione, esto repugnet creatura perfectissima. XXX. Continuum tam successivum, quàm permanens componitur ex partibus in semper divisibilia divisibilibus. Et hæc

O. A. M. D. G.

LE



## *LECTOR BENEVOLE.*

um in præsentem Historiam, quam in quarta parte Chronicorum nostrorum eleganti stylo doctissimus P. Fr. Lucas à Purificatione Hispanicè conscripsit, atque annò reparatæ salutis millesimò,



septingentesimô, trigesimô, secundô in Regia Civitate Granatensi typis subjecit, cùm, inquam, in præsentem Historiam incidissem, materiæ amœnitate illectus, & eventuum varietate captus, non potui à me impetrare, quin illam inter diversos mox tenerrimæ compassionis, mox justissimæ indignationis, mox liquidissimi gaudii affectus à capite usque ad calcem percurrerem. Cùm verò impendiò dolerem tam illustre virtutis exemplar sub modio particularis cujusdam linguæ delitescere, cùmque firmiter mihi persuasum haberem, talem laudibûs potius celebrandam, quàm vituperiis plectendam curiositatem non  
so-




solùm in privati cujusvis lectò-  
ris utilitatem cessuram, verùm  
etiam in omnium cordibus  
Christianam compassionem ex-  
citaturam, tam erga pauperes  
sub gravissimo jugo barbaricæ  
servitutis gementes captivos,  
quàm erga ipsos Patres Redem-  
ptores, qui ad tam periculosam  
spartam ablegantur, animum  
appuli, ut illam rudî quidem,  
sed tamen perspicuô, & mini-  
mè phaleratô stylô in lingua la-  
tina describerem. Ad hoc au-  
dendum, cùm propria deter-  
reret ingenii imbecillitas, &  
curta nimis eloquentiæ supel-  
lex, potissimùm inductus fui  
suasu, & hortatu R. P. Andreæ  
à S. Gertrude p. t. Redempto-  
ris Actualis, qui & ipse repeti-



tis vicibûs hanc ancipitem al-  
eam subivit , utpote qui annô  
millesimô , septingentesimô ,  
vigestimô in Societate piè de-  
functi P. Fr. Josephi à JEsu Ma-  
ria , Viri à vitæ integritate , ac  
virtutum splendore clarissimi ,  
præter quadringentos , sexagin-  
ta , & unum adultæ ætatis ca-  
ptivos , etiam nonaginta qua-  
tuor impuberes infantes rede-  
mit , & triumphalî pompâ  
Viennæ , urbium Reginæ , in-  
vexit , tota civitate inter pias  
lacrymas applaudente , cùm vi-  
deret , innocentem hanc , &  
balbutientem turbam stygii ac-  
cipitris unguibus ereptam , &  
felici sorte in ovile Christianæ  
Ecclesiæ translatam. Et ne pu-  
tares eum periculorum magni-  
tudine



tudine ab insigni hoc consummatissimæ charitatis fervore clanguisse, rursus annô elapsô, millesimô nimirum, septingentesimô, trigessimô quartô in simile se rursus discrimen magnô prorsus animô, nec pœnitendo successu conjecit, utpote qui ducentos, & undecim captivos à vinculis tristissimæ servitutis exemit. Tu verò Lector benigne Divinæ Majestati debitas persolvere gratias non desine, quòd te à tali calamitate clementissimè præservaverit. Compatere pariter miseris tuis in Christo fratribus, pauperibus, dico, captivis Christianis, qui tyrannide infidelium Mahometanorum pressi vitam in captivitate ducunt, omni



morte amariorem , eisque munifica manu pro facultatum tuarum modo succurrere memento.

## PROTESTATIO AUTHORIS.

Ut decreto SS. D. N. Urbani VIII. eam , quam par est , reverentiam , ac observantiam deferam , protestor , omnia , quæ in hoc libello speciem Sanctitatis , miraculi , aut prophetiæ præferunt , à me non alio loco haberi , quàm quo ea solent , quæ humana duntaxat authoritate , non autem infallibili Catholicæ Romanæ Ecclesiæ , aut S. Sedis Apostolicæ nituntur. Et sicut illis majorem certitudinem non vendico , ità nec ab aliis majorem eis adhiberi cupio.





## CAPUT PRIMUM.

*De ortu , & parentibus V.P. Jo-  
annis , necnon de aliis quibusdam even-  
tibus , qui contigerunt ante ejus in S. Religionem  
nostram ingressum.*



On minùs sapienter , quàm  
elegantè locutus est Vates  
Hussæus , quando dixit , Vitam  
hominis in hoc mundo esse perpe-  
tuam irremissamque militiam. Ho-  
mo ad labores nascitur , atque hi  
sunt demum deliciæ illæ , quas mise-  
rabilis , & infrunitus mundus ama-  
toribus suis propinat. Divina Pro-  
videntia antiquissimo prorsus more  
illos magnis , crebrisque æumnis af-  
figere solet , quos sibi in Vasa pecu-  
liaria suæ gloriæ elegit ; vix namque  
reperire licebit aliquem sanctum , cu-

jus triumphalis corona in officina calamitatum, & miseriarum procusa non fuisset. Id sanè præsens vitæ piissimi P. Fr. Joannis luculenter comprobatur, utpote quæ tota ex sexcentis, sibi que perpetim succedentibus ærumnis, & afflictionibus contexta fuit, adeò, ut giganteus spiritus ejus solò adversitatum pabulò dignè pasci potuisse videatur.

Caminas, nobile oppidum Archiepiscopatus Toletani, magnanimo huic, & invicto Christi Athletæ canas genitales dedit. Parentes nactus est non minus ab avita nobilitate, ac fumosis Majorum ceris, quàm à virtute, & exquisita in Deum pietate conspicuos. Si cuncta hujus illustrissimæ Familiæ ornamenta recensere vellem benè grandi volumine opus esset. Sed ut brevitati consulam, nec prolixa nimis narratione Lectoris patientiâ abutar, impræsentiarum dixisse sufficiat, patrem ejus fuisse Dominum Jacobum Lopez de Cervantes, genitricem verò illius, Dominam Paulam

lam

lam de Cervantes, Sordio, & Oroczo.

Hæc nomina utriusque parentis nobilissimum stemma cumulatissimè ostendunt. Abavi, & agnati omnes V. nostri P. Joannis aut summa in Hispania honorum temporalium subfelia occupârunt, aut in sacris Ordinibus Militaribus Melitenfi nimirum, S. Jacobi, & Calatravæ gloriose effulserunt.

Cæterum quantò altiùs nativa sua nobilitate in hoc mundo sublimati fuerunt, tantò impensius omnigenarum virtutum studio sese addixerunt. Certè parens ejus tantos in castris Christianæ pietatis fecit progressus, ut tandem promeritus fuerit, cui ultima vitæ suæ hora cœlitus revelaretur. Qua instante, sano, vegetoque etiamnum corpore in forum prodiit, amicis suis, & consanguineis, necnon ægrotis in nosocomio, ac demum Religiosis in monasteriis officiosissimè valedixit, omnibûsque significavit, supremam illam, & inevitabilem horam adesse, qua Deus illum ex hoc mundo

do

do evocare decrevisset. Stupebant universi, nec sibi quisque satis verba ejus intellexisse credebat, dum mors ex inopino superveniens veritatem vaticinii comprobavit, cunctorumque ora in Dei laudes, & præconia servi ejus resolvit. Ex talibus parentibus ortus est piissimus P. noster Joannes annô reparatæ salutis 1620.

Mox ut in hanc lucem prodiit, mirâ statim morum innocentia, & proclivi quadam in omnem pietatem indole futuræ sanctitati suæ haud obscure prælusit, ut proinde mater ejus, blandissimæ prolis suæ amore capta crebrius hîs verbis illum compellaverit. Veni! veni dulcissime puer! vix mihi sat credas, quantum te diligo! cor namque meum mihi præfagit, te aliquando Excalceatum Religiosum futurum. Grandi itaque cura, & sollicitudine educatus, adeò in omni virtutum genere profecit, ut coævi in illum, ceu speculum quoddam totius honestatis respicerent, ejusque pietate calcar sibi ad æmulandam ipsius probitatem sub-

subdi sentirent. Nunquam ex ore ejus, ut in aliis hujus ætatis pueris usu venire consuevit, verbum aliquod egressum fuit, quod murmurationem redoleret, quin imò tantam ubique morum gravitatem præsetulit, ut adulto viro, quàm impuberi adolescenti similior videretur. Prima litterarum elementa domesticos inter parietes combibit, quibus exhaustis, ut animum altioribûs disciplinâs informaret, bonâ parentum suorum veniâ Complutum migravit. In qua ille urbe inter perpetuos scholasticarum exercitationum labores, integrò trienniò est diversatus, neque solum ingenii sui perspicaciâ cantatissimum illud orbis Hispanici Lyceum illustravit, verùm etiam inculpatae vitæ integritate omnibus condiscipulis suis facem ad virtutes prætulit. Atque in hisce pietatis, & litterarum occupationibus vigesimum primum ætatis suæ annum attigit.

In patriam deinde à parentibus revocatus, in ipso statim vitæ suæ profcenio

nio novercantis fortunæ cæpit urgeri assultibûs ; nam cùm pater ejus nihil non ageret, ut Filium induceret ad suscipiendum Ordinem Melitensem, sive S. Joannis Hierosolymitani, tum quòd huic alii duo patruelles ejus inserti essent, tum quòd plerique Majorum ejus in hoc Ordine laudatissimam vitam transegissent, Filius autem eo adhuc tempore à statu vitæ religiosæ abhorreret, atque adeò variis tergiversationibus exosa patris jussa effugere niteretur, iste in furorem actus mox precibûs, mox verò minis Filium in suam sententiam traducere conatus est. Sed nequidquam ; nam cùm Divina Majestas Joannem nostrum ad aliud vitæ genus prædestinâisset, irritæ fuerunt omnes intentatæ minæ, precèsque. Hac repulsâ, veluti oleô quodam igni infusô, ira patris vehementiùs exarsit tantâque sumpsit quotidianis accessionibûs incrementa, ut Filius, genitoris declinaturus furorem, coactus sit patriam deferre, & apud quemdam cognatorum  
suo

suorum in oppido, Alcazar S. Joannis dicto, opem, & protectionem querere. Pater ut clandestinum discesum Filii sui intellexit, dici vix potest, quàm impotente bile sit stomachatus, & quanta indignatione efferbuerit, quòd similem ausum nunquam à tali Filio expectâisset. Protinus itaque itineri se commisit natum suum investigaturus, quamvis ignoraret, quo se verteret, ut ad ejus indaginem perveniret. Tandem fortunâ propitiâ in domum illius cognati deductus, ut primùm Joannem conspexit, mox in furias actus totam verberum, & conviciorum grandinem in caput ejus detorsit, imò furoris impetu eo usque abreptus est, ut Filio non solùm hæreditatis jacturam, sed & ipsam quoque mortem minaretur. Grandis profectò insania, quam tamen multi parentes insaniunt, dum præpostero liberorum amore excæcati, eos ad tale vitæ genus amplectendum cogere nitantur, quod isti totò animò averfantur.

Hæc

Hæ minæ, terrorésque furibundi genitoris in causa fuerunt, ut Joannes noster ex uno præcipitio in alterum se jactaret. Viderat fortassis militum manipulos oppidum illud transeuntes, qui ad solvendam obsidionem, qua Illerda ab inimico Gallorum exercitu premebatur, Cæsar-Augustam properabant, ubi illos Philippus IV. grandiam collecto militum agmine præstolabatur. Viderat hos, inquam, dum ei protinùs in mentem venit se nusquam tutiùs irati patris vultus effugiturum, quàm si militiæ nomen daret. Accessit igitur centurionem cujusdam cohortis, eúmque submissis precibus rogavit, ut se in Album militare referret. Cunctatus ad hæc centurio, qui illustrissimum stemma hujus nobilis candidati probè perspectum habebat, non priùs huic petitioni annuere voluit, donec voluntatem ejus consanguineorum explorâset. His itaque preces Joannis nostri exposuit, simulque conceptis verbis spopondit, Joannem, si Pater illius  
confer



consentiret; nequaquam à se in fortem gregariorum militum cooptandum, sed extemplò vexilliferi munere cohonestandum esse. Pater, & amici ejus longa, & matura deliberatione præmissa assensum præbuerunt, firmiter persuasi, feroculum adolescentis animum militaribûs laboribûs adeò emollitum iri, ut postea statum Religiosum beneficii locò sit computaturus. Eum itaque novîs, pretiosîsque vestibûs ornatum fatis suis commiserunt. Iste autem acceptò vexillò iter Cæsar-augustanum gestiente, ac exultante animo est ingressus.

Et ille quidem omnes jam fortunas suas in tuto locatas esse arbitrabatur: Verùm Divina Providentia altissimîs suis, & inaccessibleis rationibûs rem ità disposuit, ut iidem passus, quos Joannes noster ad obsequium Regis cujusdam terreni accelerabat, cum rectâ viâ ad spiritualem militiam supremi Regis æternæ gloriæ perducerent. Etenim licèt Cæsar-augustam feliciter

B

tenuis-

tenuisset, adeò tamen tristem, & funebrem rerum faciem ibidem offendit, ut confestim ad alia consilia suscipienda impulsus fuerit. Lati siquidem illi, & spatiosi campi, quibus urbs Cæsar-augustana, majestuosæ, & spectabili mole insidet, tot erant repleti funeribus, & ægrotorum hominum corporibus, ut ingentis magè cujusdam nosocomii, quàm militarium castrorum imaginem referrent; pestis enim, quæ magnum illum exercitum depopulabatur, tam crudeli est bacchata sævitie, ut sublati plurimis de grege vulgi, funestos tandem etiam dentes suos sacratæ Majestati Philippi Quarti infixerit: Ut proinde in amplis illis & diffusis castris nihil aliud videre licuerit, quàm miseræ sortis vestigia, nec aliud audire, quàm gemitus, & suspiria. Hoc ferali spectaculo Joannes noster adeò perculsus fuit, tamquam si horrificum Medusæ caput coram aspexisset,

Tunc ille tandem oculos suos aperuit, & ardente jam proximo pariete

te

te periculum agnovit, in quod se propria sponte præcipitem egerat. Multò tamen acriori terrore perculsus est, cum vidisset, plerosque suorum commilitonum, qui cum ipso sani Cæsar-Augustam pervenerant, epidemicæ luis virulentiâ afflatos intra paucos dies in fata cessisse, cæteros autem ferè omnes mali hujus contagiò jam infectos fuisse. Oculis itaque in cœlum levatis cœpit multa bona proposita concipere, eo prorsus tempore, quo & ipse, Deo permittente, pestis hujus venenò se intoxicatum persensit. Tunc enim verò extrema gaudii luctus occupavit, & in locum prioris lætitiæ, & exultationis altissima successit tristitia. Jacebat ille omni humana ope destitutus, procul à patria, & necessariis suis remotus, nec, quo se verteret, habebat. Videras amicorum suorum alios extinctos, alios morbo correptos, & ex istis mox hunc, mox illum inter luctifonos singultus animam exhalare, cæteros verò, supremos anhelitus recipro-

care. Hīs ille angustiis obsessus ad tutissimum miserorum asylum, clementissimam nimirum Virginem, Dei Matrem Mariam confugit, ubertimque profusis lacrymīs vovit, se citra ullam dilationem Religionem aliquam ingressurum, si Ejus præpotente ope adjutus præsentissimum hoc mortis discrimen evadere mereretur. Hīs ille gemitibūs Serenissimæ cœlorum Reginae favorem efflagitavit, nullō intereā aliō tectus operimentō, quàm levidensī quodam, & malésartō tentoriō, nec aliis pharmacis instructus, quàm quæ extrema illa confusio, & derelictio suppeditare valebant.

Neque distulit propitia illa gratiarum Aurora, quæ nulli afflictorum pietatis suæ radios negare consuevit, supplici servulo suo auxiliares manus porrigere; Ejus námque dispositione factum est, ut ægroti Joannis nostri papilionem quidam sacerdos subiret. Missionarius erat ille castrensis ex Seraphico Ordine S. Francisci, qui

qui cū languidos milites in tentoriis visitaret, tandem etiam in hunc tristissimum, omnique humanō subsidio destitutum adolescentem incidit. Joānes, ut virum religiosum ante oculos suos conspexit, non minori gaudiō delibutus fuit, quā si angelum quemdam cœlō delapsū intueretur. Pius autem ille Religiosus, ut vidit, in quanto periculo nobilis hic juvenis versaretur, ei ante omnia suavit, ut conscientiam suam sacra confessione expiaret, quod cū Joānes fecisset, ac deinde Patri anteaetæ vitæ seriem, votūque suum illa die conceptum, ex ordine narrasset, eum vir ille Religiosus hīs verbis est affatus: Maeste animo charissime Fili! perge porro tantū omnem fiduciam tuam in clementiam Virginis Deiparæ collocare; hæc enim, cū sit Salus infirmorum, procul dubio desideratæ sanitatis te compotem efficiet, fractasque corporis tui vires restaurabit. Ut autem voto tuo prudenter satisfacias, opus est, enixis precibus

B 3

hanc



hanc cœli Reginam implorare , quatenus ipsa tibi Religiosam illam Familiam manifestare dignetur , in qua tuus coli volet obsequiis. Hīs dictis bellaria nonnulla ē sinu produxit , quæ cum ægroto tradidisset , & , ut illis languentem stomachum confortaret , præcepisset , eum grandī solatiō perfusum reliquit : ipse autem charitatis suæ cursum ad alios infirmos est prosecutus.

Hōc alloquiō , & consiliō recreatus Joannes cœpit somno indulgere : sub ortum diei expergefactus videbatur sibi jam penitus convaluisse absque alio pharmaco , quàm sacramentali confessione , & emissō votō suō. Alacrī proinde animō ē strato proficiens properabat votum , Divæ Sospitatrici suæ factum , quàm celerimè reddere. Tentoriō itaque curæ cujusdam militis commissō ad urbem contendit reditum in patriam adornaturus. Verū ille vix aliquot passus promoverat , dum novi paroxysmi violentiā oppressus ante domum cu-

jus-



jusdam illustris matronæ tanto impetu corruit, ut strepitu ruentis excita quædam ancilla avidè ad fenestram accurreret tanti sonitûs causam exploratura. Hæc cum nobilem illum adolescentem sensibûs privatum, & propè exanimem jacere conspexisset, compassione tacta tristem hunc casum in dominæ suæ notitiam detulit.

Lapsum hunc Divina Providentia permisit, ut Neoptolemus iste tantò majori constantia in bono suo proposito resurgeret. Domina illa, ante cujus vestibulum Joannem cecidisse diximus, erat matrona non minoris pietatis, quàm nobilitatis. Unde absque ullo contagii timore, immemorque omnium cautelarum, quæ pro tam exitiali malo avertendo adhiberi solent, illicò præcepit, ut nobilis hic juvenis proprio ejus cubiculo inferretur, & in molli quodam lectulo collocaretur. In hoc ille totis quinque horis omnium sensuum expers, & mortuo simillimus, nisi

B 4                      quòd

quòd tenuis quidam anhelitus vitæ argumentum præbuerit, miserando sanè schemate decubuit. Quo tempore, ut piè creditur, ei Beatissima Virgo Ordinem revelavit, ad quem Deus illum prædestinaverat; elapsis enim quinque horis, quas in hoc suo sive deliquio, sive entusiasmo transegerat, subitò oculos aperuit, & quin aliud prius verbum proferret, anxie statim sciscitatus est, num excalceati PP. Trinitarii in hac urbe domicilium aliquod obtinerent? Respondentibus illis, qui eum circumstabant, rem se ità habere, protinùs è lecto surrexit, & post officiosissimam gratiarum actionem pro tam insigni charitate sibi exhibita, nec expectatâ saltèm forbitiunculâ, quæ ei confirmando offerebatur, rectâ viâ ad cupitum claustrum contendit.

Sed heûs Domine Joannes! quorsum tam properè? Quid sibi vult tam incitata titubantium etiamnum pedum festinatio Domine vexillifer?

Siccí-



Siccine militaris ille ardor tam citò deferbuit? Siccine levis quidam paroxysmus tam velociter Martiæ gloriæ fastidium parere potuit? Equidem Dominatio sua nondum vidit truces hostium suorum vultus, nec scintillantem minacium gladiatorum aciem, nec audivit terrificum reboantium bombardarum fragorem, nec ignivomos aneorum tormentorum mugitus, & jam receptui canit? jam talaria circumspicit? Hoc sanè exiguum ei conciliabit honorem! Totus mundus tale factum timiditati, aut vecordiæ imputabit. Forsitan Dominatio sua tristi cujusdam somnii facie ludificata fuit? Ast noverit evanidas Morphei imagines, ab omnibus cordatis hominibus contemni. Videtur intellectus ejus immodico luctu è cardinibus evulsus fuisse; nam in quem hominem cadat, ut splendidum sagum rudi, & pannosa veste monastica, argenteum gladium ligneo rosariò, sericum baltheum coriaceo cingulò, cristatam denique cassidem

laneò cucullò permutare, omnibús-  
 que militaribus honoribus viam in-  
 cidere velit? Præcipitatæ sanè re-  
 solutiones longam plerumque pœ-  
 nitudinem, ceu fyrma quoddam  
 onerosum post se trahunt! Præcoces  
 fructus ut plurimum celeriter mar-  
 cescent! Plerique hanc mutationem  
 levitati adscribent. Quid autem? si ve-  
 stis monastica æquali inconstantiâ abji-  
 ceretur, ac cingulum militare? Quod  
 si verò Dominatio Vestra aut perti-  
 naciter, aut constanter in proposito  
 suo persistere constituit, non desunt  
 alii Ordines mitiores, in quibus ho-  
 mo æquè Deo servire, & æternam  
 salutem consequi valet. Verùm om-  
 nes hæ echeneides cursum ejus suffla-  
 minare nequibant; ardentî namque  
 desiderio voto suo satisfaciendi stimu-  
 latus, omnes mundi, & carnis sug-  
 gestiones surda aure pertransivit, at-  
 que hóc factò suò votifragos illos ho-  
 mines condemnavit, qui in angustiis  
 constituti cœlo aureos montes pol-  
 licentur, discussa verò calamita-  
 te

te ne æreum quidem obulum sol-  
vunt.

Vix pedem clauſtro intulerat, dum illi Religioſus quidam, P. Alphonſus à Reſurrectione occurrit, cum quo ei jam priùs Alcazarii neceſſitudo quædam interceſſerat. Hic, ut nobilem hunc juvenem adeò pallidum, & macilentum conſpexit, eum comiter ſalutatum ad religioſum prandium invitavit, quo exhaustum corpus refocillaret. Sed excuſavit Joannes, dixitque, ſe longè aliis cibis opus habere, neque priùs corpori refrigerium conceſſurum, donec ei mentis ſuæ arcana expoſuiſſet. Paucis itaque præſentem ſtatum ſuum, omnesque caſus, quibùs hætenus conſiſtatus fuerat, ei aperuit, ac denique etiam votum recensuit, quo ſe ad hanc S. Religionem ſuſcipiendam obſtrinxerat. Inopinata hæc propoſitio P. Alphonſum ambiguum admodum, perplexumque reddidit; nam cum videret adoleſcentem hunc adeò morbidum, & à venenata lue non-

nondum plenè perſanatum , plurimîs etiam paraſangîs à patria remotum , ex qua informationes de vita , aliîsque rebus petendæ erant , non eſt auſus ejus deſiderio velificari , ſed , ut illum ſolatio aliquo recrearet, dixit longè ſatiùs fore , ſi patriam repeteret , & fractam valetudinem reſtauraret , nec dubitaret , ſe recuperata ſanitate voti compotem futurum , quòd S. Religio in illo inſigni oppido jam per aliquot annos novam foundationem moliretur , ubi ille amicorum ſuorum interceſſione , quos ibi habebat nobiliſſimos , & potentiffimos , facillimò negotiò ſibi viam ad ingreſſum Ordinis aperire , ac munire valeret ; in hoc námque conventu tot ex adverſo ſurrecturas eſſe difficultates , ut nec animum inducere poſſet , ad ejus preces aliis Religioſis proponendas. Verùm quidquid ille diceret , Joannem à propoſito ſuo abſterrere non potuit , quin imò , quaſi hîs ipſîs repulſîs , & tergiverſationibûs deſiderium ejus auctum fuiſſet , cœpit longè

gè efficacius intentionem suam urge-  
 re , certus pedem è monasterio non  
 efferre , donec aliis quoque hujus  
 Conventûs Religiosis petitionem  
 suam exposuisset. Immodicus ardor  
 ejus inflammati spiritûs adeo excre-  
 verat , ut singula etiam momenta ,  
 quibûs à cupito sine suo arcebatur ,  
 totidem æternitates esse reputaret.  
 In ipso proinde ad litteram impletum  
 fuit , quod mellifluus Claravallensis  
 Abbas S. P. Bernardus quondam scri-  
 psit : *Etiam celeritas in desiderio mora*  
*est.* Penetravit itaque interiores par-  
 tes claustrî , & obviorum Religioso-  
 rum pedibus advolutus inter effusa  
 lacrymarum flumina obsecrabat , ut  
 se in eorum consortium admittere, si-  
 bique Sacrum Religionis suæ habitum  
 impertiri dignarentur. Tam incen-  
 sa , & humilis petitio non potuit non  
 animos illorum Religiosorum com-  
 movere. Itaque in unum congre-  
 gati de illo suscipiendo deliberârunt ,  
 & quamvis non deessent , qui attenta  
 infirmitate illius sese difficiliore ex-  
 hibe-

hiberent , ad extremum tamen cunctis sopitis difficultatibus , omnes in ejus admissionem conspirarunt , eumque in hoc ipso Conventu Cæsaraugustano Sacra Ordinis veste donarunt , annò ætatis suæ vigesimò secundo. Quo favore obtento Joannes tantis incessit gaudiis , ac si nobilissimum de profligato Gallorum exercitu triumphum reportasset.

## CAPUT II.

*De Heroicis virtutibus Fratris Joannis , ejusque piissima vita , quæ in S. Religione nostra resplenduit.*

**A**Ggregatus itaque Religiosorum consortio Joannes , ut vidit , votum suum , quo se Augustissimæ cœlorum Imperatrici Mariæ obstrinxerat , felicibus auspiciis ad portum pervenisse , impendiò gavisus est. Sed ne vacuum duntaxat Religiosi nomen appetivisse videretur , angelicam quamdam vitæ rationem instituit , idque tantò propensius , quòd  
ipsæ

ipsæ etiam austeritates vitæ Religio-  
sæ , miseris statûs militaris collatæ  
( quas ille brevi licet tempore , ad nau-  
seam tamen usque devoraverat ) ei  
dulces visæ sint , & jucundæ. Vidit  
hoc , & invidit coluber ille tortuo-  
sus , cujus invidiâ mors intravit in  
orbem terrarum , unde etiam nullum  
non movit lapidem , ut recentem  
hunc tyronem à virtutum studio re-  
traheret , eumque variis tentationi-  
bûs ad deponendam vestem Religio-  
sam induceret. Suggestit illi proin-  
de , eum æquè potuisse voto suo sa-  
tisfacere , si Ordini Melitensi nomen  
dedisset , ac parentes suos , quibus id  
unicè in desideriis erat , hac ratione  
exhilarâset , quàm asperum hoc , &  
tetricum vitæ genus amplectendo.  
Huic tentationi accedebant multæ ,  
gravésque infirmitates , inde procul  
dubio ortæ , quòd , factô in castris re-  
giis sanitatis naufragiô , nondum ad  
incolumitatis litus enataverit , ut pro-  
inde aliud fieri nequiverit , quàm ut  
novis identidem symptomatum vor-  
tici-



ticibûs urgeretur , & collideretur. Utrumque malum tantis auctum fuit incrementis , ut crebrius vespere , dum decumberet , se ad diluculum sequentis diei victurum desperaret. Duplex igitur ei conflictus subeundus fuit corporis nimirum , & animæ , quorum primum continui morbi ( quos ille nemini aperire præsumpsit , veritus , ne propter illos è sacra Religione dimitteretur ) validissimâs ietibûs arietabant , animam verò stygii hostes perpetuâs perniciosissimarum suggestionum spiculis infestabant. Vicit tandem excelsô prorsus animô utrumque certamen , & decursô patientissimè Novitiatus stadiô ad solemnem professionem admissus est.

Ergo , ut desideriorum suorum metam attigisse tandem conspexit , dici vix potest , quàm tenero liquidissimæ voluptatis sensu perfusus fuerit , adeo ut paradisi delicias se ex parte degustare arbitraretur. Altera die post nuncupata vota Religio-  
sa



sa Magistrum Novitiorum adiit, eisdemque multas illas ærumnas, quibus per decursum sui tyrocinii conflictatus fuerat, candidè manifestavit. Ille, ut audivit, quàm amarum tribulationis calicem adolescens iste exhauferit, adamantinam ejus patientiam majorem in modum est admiratus, Deoque ex toto corde gratias persolvit ob invictam constantiam, qua eum armaverat. Protinùs itaque convocatis medicis actum fuit, ut amissæ valetudini quàm celerrimè restitueretur. Hanc ille etiam elapsis aliquot mensibus integrè recuperavit. Quo tempore alii Religiosi ejusdem Conventûs eum certatim suis obsequiis foverunt, quòd ex tam illustribus principiis haud obscurè divinarent, ad quantam olim sanctitatem esset eluctaturus, neque sua sunt opinione decepti; ille siquidem recepta corporis fœspitate tam perniciosus pedibus in via virtutum progressus est, ut omnes suâ modestiâ, silentiô, humilitate,

tate , vitæ austeritate , ac multiplici  
pœnitentæ rigore admiratione absor-  
ptos reliquerit.

Cùm autem Superiores tam matu-  
ros mores & tam conspicuum soli-  
darum virtutum apparatus in hoc  
juvene læti suspicerent , eum , prius-  
quàm addiscendis litteris altioribus  
admoveretur , in patrium solum re-  
mittere decreverunt , ut sua ope , &  
præsentia afferendæ , & stabiliendæ  
novæ foundationi in oppido Alcazari-  
no magnum momentum adferret ;  
hic namque Conventus tantis labo-  
ribûs , & sudoribûs à S. Religione ac-  
quisitus fuit , quantis vix alius quis-  
quam. Totis novem annis persecu-  
tionum , & contradictionum tem-  
pestas nunquam remisso furore de-  
iæviit , neque unquam fortassis con-  
quievisset , nisi Elisabetha Borbonia ,  
Regina Hispaniæ , eam sui numinis  
jubare serenasset , quæ SSS. Trinitati  
vovit , se foundationi huic patrocina-  
turam , ut Philippus IV. , ejusque  
exercitus à peste , qua tunc affligaban-  
tur,

tur, & cujus lue Joannes noster ad amplectendum vitæ Religiosæ propositum impulsus fuerat, convalesceret, & victoriâ de hostibus reportatâ incolumis rediret.

Joannes ad tam laboriosam spartam destinatus hilarî animô eò profectus est cum P. Fr. Francisco à Conceptione, Atlante illo, qui suis humeris immanem molem sexcentarum oppositionum, & adversitatum sustentavit. In hac occasione eluxit in nostro Joanne mirificum quoddam propter DEum patiendi desiderium, & inconcussa in cœpto vitæ rigore constantia. Totis sex mensibus non aliô usus est lectulô, quàm vetustâ quadam, & cariosâ cistâ. Humidum illud cubiculum, quod eo tempore incoluerat, spelæo brutorum erat similius, quàm decenti hominum habitaculo. Vicit tamen invictâ suâ patientiâ omnes ærumnas (hæ namque sunt deliciæ, & redditus illorum, qui novis monasteriis fundandis operam navant)

quas ille jucundo prorsus & expor-  
 recto vultu perferre est solitus, ce-  
 lavitque non minùs sanctè, quàm  
 prudenter totam suam inopiam, &  
 rerum necessariarum defectum. Cun-  
 cti sanè, ad quorum aures postea  
 pervenit egestatis magnitudo, qua  
 tunc temporis laboravit, non po-  
 tuerunt satis admirari succensam ejus  
 pro Christo patiendi desiderium, ut-  
 pote qui probè nôrant, quàm facilitè  
 negotiò ex his angustiis eluctari po-  
 tuisset, si inopiam suam nobilissimis,  
 & opulentis cognatis suis manifesta-  
 re voluisset, quod ille tamen non fe-  
 cit, veritus, ne illi nimis largè, ac  
 effusè ejus egestati succurrerent. Quo  
 facto pudefecit illos tepidos Religio-  
 sos, qui ob minimarum rerum de-  
 fectum murmurant, communem,  
 quàmvis honestum victum fastidiunt,  
 ac propterea variis diverticulis, &  
 erroneis anfractibus illicita bellaria,  
 & superfluas cupedias conquirunt,  
 qui tamen, si in sæculo mansissent,  
 forsitan nec dimidiam partem illa-  
 rum

rum rerum habuissent, quibûs nunc in Religione fruuntur.

Elapsis sex mensibûs inde avocatus, & addiscendis altioribus disciplinis admotus fuit: Has ille Baëzæ nusquam interrupto virtutum cursu tam perfectè combibit, ut alios condiscipulos suos multîs post se reliquerit intervallîs. Emensô tandem studiorum laboriosô stadiô ad novum monasterium in oppido Alcazar, quod devictis, superatisque oppositionum procellis tranquilla jam sorte gauderat, Superiorum jussu amandatus fuit, ut suâ exemplarî vitâ, & exquisitâ doctrinâ novellam illam plantationem fulciret, & vegetaret. Ibi Joannes ardentissimum zelum suum variis concionibûs effudit, iisque non solùm grandem existimationem, & celebritatem recenti illi foundationi peperit, verùm etiam ingentem animarum fructum collegit.

In hoc oppido moniales asceterium obtinent, quod ab Immaculata Beatissimæ Virginis Conceptione

nomen obtinet, in quo eo tempore  
 foror germana V. P. Joannis, no-  
 mine Theresia à Jesu Maria, vitæ san-  
 ctioris laude florebat. Ad has ita-  
 que sacras Virgines Vir Dei diebûs  
 profectis ferventes prorsus, & igni-  
 tas conciones habuit, summô Mo-  
 nialium profectu, & emolumentô.  
 Contigit aliquando ut hac functione  
 peracta in limine claustrî consisteret,  
 atque à tota Communitate religiosa-  
 rum virginum Officiosâ coronâ val-  
 laretur, ad quas ille conversus ita  
 locutus fuit : Multa ego quidem per  
 decursum vitæ meæ sanctimonialium  
 domicilia vidi, nunquam tamen desi-  
 derium aliquod ea ingrediendi me in-  
 cessit : Verum hæc sacra Domus mi-  
 hi adeò arridet, ut efflictim discu-  
 piam in illud solo capite intrare.  
 Quid Joannes hîs verbis voluerit,  
 tam diu obscurum mansit, donec  
 plurimîs evolutis annis sacrum ejus  
 caput Algeriô in Hispaniam deporta-  
 tum, huic Parthenoni, ubi etiamnum  
 religiosè asservatur, illatum fuisset;

ac

ac tunc demum claruit vaticinii effectus, quo priùs tamquam facto quodam acroamate sororibus illis risum moverat.

Sacra Religio nostra attentis tam insignibùs hujus Viri talentis eum ad regimen Conventuum Solanensis, & Valle-rupensis promovit. Verùm ille, qui ædificium virtutum suarum super altissimum humilitatis fundamentum extruxerat, abhorrebat semper ab honorificis officiis, ac propterea illorum administrationem nunquam ad finem perduxit, sed importunis semper precibùs superiores tam diu fatigavit, donec missionem impetrârit, quantâque contentione multi laborant, ut dominatum super alios adipiscantur, tantâ egit Joannes, ut ab omni etiam sacro Magistratu liber esset, & absolutus. Demandatum ei deinde fuit munus Procuratoris Generalis in regia urbe Madritensi, sed quòd etiam hæc functio ejus inclinationi, ad recollectionem, & solitudinem propensæ, adversaretur,

tur, rursus rationes invenit, quibus illam ab humeris suis excuteret. Tandem Minister (tali nomine audiunt in nostra Religione Superiores singulorum Conventuum) nostri Collegii Complutensis designatus fuit eo prorsus tempore, quo Sacer Ordo aliquot Religiosos in Mauritaniam destinavit, ut Captivos Christianos vinculis exsolutos pristinae libertati restituerent, eosque ex crudeli Barbarorum servitute eriperent. Quod, ut Joannes noster intellexit, enixis precibus supplicavit, ut à regiminis onere exemptus in partem hujus arduæ, & ancipitis provinciæ admitteretur, in qua flagrantissimæ suæ erga DEum, & proximos charitati integrè, perfectèque litare valeret.

### CAPUT III.

*Proficiscitur cum aliis Religiosis  
in Mauritaniam pro Redemptione  
Captivorum.*

**A**Nnô millesimô, sexcentesimô,  
sexagesimô octavô Excalceata  
Re-



Religio nostra opus Redemptionis, quod ex instituto suo crebrius jam exercuit, nova expeditione illustrare, & continuare decrevit. Fuit autem præsens Redemptio ex omni parte gloriosa, tum ob plurima pericula, quibûs est exagitata, tum ob insignia miracula, quibûs est nobilitata, cui ritè describendæ, licèt calamum omni, qua fieri potest, subtilitate acuam, cum tamen semper obtusum experiar, cùm tanta rerum, negotiorumque multitudo, & admirandi eventus hìc occurrant. Videbatur altissimus DEus prolixò tredecim mensium spatiò servos suos purificare voluisse, utpote quos toto hoc tempore inter perpetuos timores, tremores, terrores, anxietates, ac præsentiissima libertatem, & vitam amittendi discrimina, in quibus novæ semper, sibique conjurato furore succedentes contradictionum, & persecutionum procellæ eis spem omnem fausti alicujus exitûs ademerant, versari permisit, donec suæ

Majestati placuisset , eos propitiis  
 oculis intueri : ut proinde afflicti  
 Patres illi jure cum regio Vate di-  
 cere potuerint , se prius per ignem ,  
 & aquam transivisse , & sic tandem  
 ad cupitum refrigerium pervenisse ,  
 quàmvis ne omnes quidem patriam  
 reviserint , sed unum è suo confor-  
 tio , Venerabilem nimirum P. Joan-  
 nem , cujus res gestas succinctò ca-  
 lamò impræsentiarum exequimur ,  
 sub jugo immanium barbarorum re-  
 liquerint. Hoc hamo piissimus DEI  
 servus protinùs inescatus fuit. Alia  
 officia quàmvis honorifica sponte ab-  
 dicavit , sed quamprimùm Redemp-  
 tor Captivorum designatus fuit , sin-  
 gulari & propensissima voluntate tam  
 periculosum munus suscepit , cujus  
 etiam impigræ solertiæ tribuenda est  
 festinata illa rerum ad tam proli-  
 xum iter necessariarum præparatio ,  
 ut tantò velociùs cum sociis suis in  
 Mauritaniam transmittere , ibidém-  
 que flagrantissima sua pro solatio ,  
 & bono Captivorum Christianorum  
 pa-

patiendi desideria explere valeret, quod etiam cumulatissimè fuit consecutus.

Pro hac gloriosa, sed non minùs ærumnosa, & periculosa expeditione designavit Sacer Ordo noster ceu duces quosdam P. Fr. Michaëlem à Virgine, P. Fr. Didacum à Purificatione, ac denique V. Patrem nostrum Joannem à Jesu Maria, Viros prorsus insignes, & ad tantum negotium ritè perficiendum aptissimos, quibus pro necessario ministerio adjunctus fuit Fr. Joannes à S. Augustino Religiosus Laicus, in rebus Barbarorum versatissimus, & multis nobilibus Mauris familiariter notus, utpote qui jam crebriùs ob similes causas in Africam trajecit.

Satagei Patres properatâ diligentia quidquid peculii S. Religio pro Redemptione Captivorum comparaverat, juxta obligationem sui officii studiosissimè collegerunt, quod, computatis etiam eleemosynis, quas liberalitas aliorum Christianorum,

&

& præcipuè pietas Regis Catholici adjecerat , ad summam octoginta millium florenorum accrevit. Hac illi pecuniâ instructi decima tertia die Maji , quæ illô annô in dominicam inciderat , Gibilterram ( vulgô Gibraltar ) pervenerunt , ex qua urbe Ceutam , litteras miserunt ad Dominum Marchionem de Assentar , supremum in illo præsidio armorum præfectum , quibûs eum obsecrabant , ut ipsis quantocyûs commodam quamdam , & securam transfretandi rationem suggereret. Marchio ille , vir non minoris charitatis , quàm nobilitatis intellecta Patrum voluntate noluit grande hoc gaudium , quod ex tam auspicato nuncio in omnes captivos Christianos erat redundaturum , diu comperendinare , sed eadem adhuc die , qua epistolam accepit , quàmvis aliæ curæ , quibûs occuparetur , quâsque in excusationem alicujus cunctationis allegare potuisset , ei minimè deessent , duas armatas celoces Gibilterram destinavit,

vit, quibûs Patres Ceutam transportarentur.

Hîs navibûs conscensîs vela ventis commiserunt, & prægnantibûs carbasîs Ceutam properârunt. Verùm in ipso statim transfretationis principio magnum periculum, ceuvaticinum futurarum calamitatum præludium incurrerunt; vix enim Gibilterram ex oculis dimiserant, dum â longe conspecti aliquot myoparones, quos Algerinos, aut Tunetanos esse non dubitabant, eos coëgerunt vestigia relegere, & ad radices montium, qui Gibilterræ imminent, in sinuoso maris litore, quod Hispani *Calas* appellitant, refugium quærere. In hoc malè tuto portu, aut potius rudi portûs imagine diem, & noctem inter perpetuos timores, & angustias transegerunt, non tam ob metum piratarum, quàm ob insani-entis pelagi effervescentem furorem, qui tantò erat impotentior, quantò statio eorum ori Gaditani freti vicinior. Sedata tempestate itineri se  
restit-

restituerunt, celerique, ac prospera  
velificatione Ceutam appulerunt,  
ubi ab ipso præsidii Governatore,  
omnibûsque tribunis, ac centurioni-  
bus inter festivos acclamantis popu-  
li applausus honorificentissimè ex-  
cepti, & ambizioso comitatu ad ip-  
sum usque hospitium, quod pro eo-  
rum receptione præparatum fuerat,  
deducti sunt.

Hic postquam à jactatione marini  
itineris, & immodico terrore, quo  
in hac navigatione concussi fuerant,  
nonnihil respirâssent, collatis sta-  
tim cum Marchione consiliis viam  
rimati sunt, qua præfixum Redemp-  
tionis scopum tutissimè assequeren-  
tur; neque enim res extra pericu-  
lum erat, quòd barbara illa regna  
cruentissimis factionibûs, & bellis  
inter se collisa præsentissimum ubique  
discrimen minitarentur. Hos tu-  
multus excitaverat immanissima cru-  
delitas Regis Muley Arzis, qui igno-  
bili matre oriundus, captivâ nimi-  
rum foeminâ, sive mancipio patris  
sui

fui , mirâ verfutiâ fratres fuos è throno deturbaverat , & obftetricante fortuna Regna Fezium , Tetuanum , Marrochium , Mequinezium , & Zufium , in fuam ditionem redegerat , actûsque Martii furoris impetu , aut potius crudeliſſimi animi impulſu , eo tempore , quo Patres Redemptores Provincias illas adire conſtituerant , totus expugnationi Regni Savix inhiabat. Quo ille bello turpiſſimam ſuam , & deteftabilem ingratitude mundo univerſo ſpectandam propoſuit , utpote qui illum regem injuſtiſſimîs armîs laceſcere eſt auſus , qui nutantes in principio res ejus pecuniâ , armîs , & militibûs ſuis fulcivit , ut inferius latiùs viſuri ſumus. Conſonîs itaque ſuffragiîs decretum fuit , ut fecialis Tetuanum præmitteretur , qui Patribus Salvum Conductum , Regis manu firmatum , ſub certis nonnullis conditionibus reportaret , idque hac de cauſa , quod barbari illi , quorum dominatum crudelis iſte tyrannus in-

vaſe-

vaferat , ejus sævitie exulcerati omnia miferent , & intestinîs diffidiis inter fe commiffi , ipfa regni viscera depafcerentur.

Prima ex iftis conditionibus hæc erat , ut aliquot ex nobilioribus , & ditioribus Mauris , antequam Patres Tetuanum concederent , tamquam obfides Ceutam transmitterentur. Altera exigebat , ut captivi , ex quibuscunque demum urbibus Imperii Marrochiani à Patribus empti fuiffent , non alibitamen quàm fub portis Ceutæ (ut femp̃er hætenus fieri confueverat) folverentur. Hæ conditiones , fi à rege fubfcriptæ , & executioni mandatæ fuiffent , procul dubio Patres Redemptores , & pauperes captivi Chriftiani omnes calamitates , tribulationes , & ærumnas evafiffent , quibus poftèa miferriimè funt conflictati. Verùm enim verò barbarus ille , ac infolentiffimus tyrannus has , licèt rationales , & prudentiffimas conditiones eft averfatus , dixitque , cuius Regi pro-



probrosū esse , si ab eo major securitas flagitaretur , quā regii verbi inviolabilis authoritas. Significavit proinde Patribus , oblatas conditiones sibi esse prorsus exosas , pollicitus est tamen verbō suō regiō , se Patribus omnem securitatem præstiturum , neque permissurum , ut à quolibet subditorum suorum læderentur , aut indignis modis tractarentur. Addidit prætereā Captivos non Ceutæ , sed in illis ipsis locis , in quibus ementur , solvendos esse. Quid hīc agerent boni Patres ? Si barbara illa regna in tanta bellorum tempestate ingrederentur , seseque manibus perfidorum Maurorum absque alio securitatis vadimonio , quā sponsione regii verbi committerent , haud immeritō verebantur , ne simul pecuniæ , libertatis , aut etiam vitæ jacturam incurrerent. Si ab ingressu superfederent , & ne tentatā quidem Redemptionis aleā in Hispaniam remearent , rursus metuebant , ne tale factum non prudentiæ , sed

D

pusil-

pufillanimitati, & ignaviæ adscribe-  
retur. Potiffimùm verò angeban-  
tur, ne afflicti captivi, quos præfo-  
ribus inflans Redemptio folabatur,  
hac fpe dejecti, animos desponderent,  
& imbecilliores malorum intoleran-  
tiâ superati, etiam à fide Chriftiana  
deficerent. Mauritaniam verò in-  
trare, & regis juffa ad minimum us-  
que apicem non implere, nihil fui-  
fet aliud, quàm totum negotium peff-  
fumdare; barbari namque reges illi  
neglectum minimorum etiam man-  
datorum fuorum crimen arbitrantur,  
fola morte piandum.

Ergo dum ità facrum inter, & fa-  
xum hærent, placuit eis tandem non  
totum peculium discrimini exponere,  
fed folas personas fuas, & vitas,  
quas læti, lubentésque pro majori  
Dei gloria, & pauperum captivorum  
fubfidio facrificaviffent, fuperventuris  
calamitatibus, ærumnis, & miferiis  
obicere. Non illos ab hoc propofito  
deterrire poterant recentiffimi nun-  
cii, à quibus tragica prorfus extre-  
mæ

mæ crudelitatis exempla referebantur, quæ truculentus ille, & sanguivomus princeps ediderat, utpote qui ab humana natura degenerans insatiabili quadam, & belluina orexi cædes duntaxat, & cruorem sitiebat, quam ille etiam quotidianis funeribus non solum captivorum Christianorum, quorum sanguini tantum non innatabat, verum etiam Maurorum, imò & consanguineorum, agnatorumque suorum largè explebat. Omnia tamen ista, quàmvis ex vero dicta fuisse Patres non ignorent, efficere nequiverunt, ut magnanimi hi, & imperterriti Christi athletæ in contrariam sententiam deflecterent; eos namque ad formidabilem hanc provinciam tentandam incitabat, non pruritus honoris proprii, sed ardentissimum quoddam desiderium Divinam gloriam propagandi, & Captivos Christianos in libertatem afferendi.

Ut autem tutiùs in hoc ancipiti negotio procederent, statuerunt non

totam secum pecuniam in barbaras illas terras asportare, sed maxima ejus parte Ceutæ relicta, tantum duntaxat secum assumere, quantum primis sumptibus expugnandis sufficere videbatur. Hac intentione Præsidii Gubernatori aperta conclusum fuit, ut sequenti die, qua se in viam dare decreverant, solemne Sacrum de SSS. Trinitate in Ecclesia RR. PP. Trinitariorum Calceatorum, qui eo tempore Ceutæ domicilium obtinuerant, in quod postea nos Excalceati successimus, decantaretur, & communibus precibus Deus exoraretur, quatenus ferocia Maurorum corda emollire, pauperibus captivis constantiam in fide Catholica largiri, & præsentem Redemptionem felici successu coronare dignaretur.

Præstituta die sacrum illud Missæ sacrificium à suprädictis RR. PP. Trinitariis Calceatis solemni ritu celebratum fuit, cui præter urbis Gubernatorem, & officiales præsidiariorum

rum

rum militum, etiam Decanus cum toto Capitulo Cathedralis Ecclesiæ, atque cum istis universa nobilitas civitatis illius interfuit. Hi omnes corde, & ore preces, ac vota pro incolumitate Patrum Redemptorum, qui in medio eorum constituti erant, nuncupabant. Finitâ Missâ, & absolutis cunctis orationibus, quæ in similibus occasionibus usurpari solent, Patres Redemptores honoratissimæ illi concioni officiosissimè valedixerunt, & eodem adhuc die iter suum auspicati fuerunt, præmissio tamen prius caduceatore, qui Gubernatori Tetuano significaret, Patres verbo regio confisos absque alio commeatu Tetuanum concessuros.

## CAPUT IV.

*Perveniant Tetuanum, & jubentur Fezium ad Regem proficisci.*

SEPTIMÂ Junii, quæ eo anno incidit in diem Jovis, Patres Redemptores Ceutâ egressi eadem die Tetuanum tenuerunt, ubi à Gu-

bernatore urbis comiter excepti, ejusque jussu ad hospitium pro ipsis antea jam præparatum, deducti fuerunt. Hac civilitate Gubernatoris Patres mirè exhilarati spe sibi pollicebantur minimè dubia, se absque ullo impedimento Redemptionem Captivorum exorsuros, eamque paulò post fausta coronide terminaturos esse. Sed quemadmodùm crebriùs fulgenti, roseùmque suum jubar lætè spargenti auroræ inexpectata quædam tempestas è vestigio succedit, quæ purpuream ejus claritatem intercipit, totùmque cœlum atra caligine involvit, ita & hoc præmaturum Patrum gaudium post breve tempus obscura tristitiæ nube obductum fuit; nam cùm elapsis ab eorum adventu tribus diebus Gubernatorem accessissent, atque ab eo copiam inchoandæ Redemptionis flagitassent, simulque, ut eam tantò promptiùs impetrarent, sese obtulissent ad illos captivos, qui ejus potestati subiecti erant, antè alios

alios redimendos, inopinatam repul-  
sam tulerunt.

Gubernator enim, vultu ad com-  
passionem composito, respondit, id  
sibi integrum non esse; agebat enim,  
se peculiari regis sui mandatō obstri-  
ctum fuisse, ut Patres antè initium  
Redemptionis Fezium transmittre-  
ret, rationem ibi reddituros omnium  
rerum, quas secum attulerant. Gu-  
bernator quidem genuinam causam  
illis tunc aperire volebat, qua rex  
inductus fuit, ut ipsis tam molestum  
iter imperaret: Hanc illi tamen po-  
stea Fezii didicerunt, ubi certis rela-  
tionibûs compererunt, quemdam è  
præcipuis Mauris Tetuanis, ut gra-  
tiam regis aucuparetur, ei scripsisse,  
quòd Patres Redemptores varia ci-  
melia, gemmâsque pretiosas secum  
portaverint, quarum obtinendarum  
cupiditate tyrannus mirè flagrabat.  
Sed calumnia hæc fuit longè male-  
volentissima, cùm Patres nihil aliud  
ex Hispania secum attulerint, quàm  
pauculos quosdam uniones, & sma-

ragdum eleganti toreumati affabrè insertum, quem illi, ut vetusto more receptum erat, regi pro obtinenda licentia captivos redimendi donare decreverunt. Aliud verò nihil secum habebant præter lytrum captivorum redemptioni deputatum.

Hoc insperatò Gubernatoris responsò perculsi Patres jam tunc sibi scævum successum, & benè longam calamitatum seriem sunt vaticinati. Neque frivola fuit eorum opinio; hoc námque iter Fezianum fons exitit, capútque omnium illarum æumnarum, & tribulationum, quibús postea tantum non oppressi, & extincti fuerunt, ut ex subsequenti narratione clarissimè elucescet. Cùm itaque prolixè agnoscerent, fieri non posse, ut Gubernatoris jussa tergiversando declinarent, & hoc adeò molestum, periculosum, & ultra centum milliaria protensum iter effugerent, necessitatem in virtutem converterunt. V. Pater noster Joannes primus erat, qui se spon-



tè ad hanc laboriosam, & ancipitem  
spartam subeundam obtulerat, quam  
& reapse est ingressus cum P. Dida-  
co à Purificatione, & Fr. Joanne  
à S. Augustino; nam P. Michaël à  
Virgine ob decrepitam senectutem,  
& attritas corporis vires tanto iti-  
neri minimè suffecturus videbatur.  
Venerabilis iste Dei servus septies in  
Africanam pro redemptione captivo-  
rum transmiserat, ætatémque suam  
ad nonaginta usque annos produxe-  
rat.

Quantas verò misérias, & æru-  
mnas hi religiosi viatores in tam pro-  
lixo itinere exantlaverint, non, mihi  
si linguæ centum sint, oraque cen-  
tum, ferrea vox quàmvis, satis enar-  
rare possem; licèt enim hoc iter,  
ut diximus, centum miliaria supe-  
raverit, illud tamen spatiò sex die-  
rum confecerunt, utpote qui deci-  
mâ quartâ Junii, die Jovis Tetua-  
nô in societate quinque Maurorum,  
quorum curæ eos Gubernator com-  
miserat, excefferunt, & decimâ no-

nâ ejusdem mensis, die Martis Fezium sub vesperam sunt ingressi. Modus, quem in hac peregrinatione servârunt, talis erat: Summô diluculô equos conscenderunt, in quibus tota die, imò & duabûs horis in seram noctem hærentes cæptum viæ cursum tenuerunt; hac námque ratione Mauri itinera sua emetiri solent. Aliorum nunc esto judicium, & præcipuè illorum, qui & ipsi aspera itinera peragrârunt, quantas ærumnas, & afflictiones Patres isti in hac salebrosa via, in ferventissimo æstu mensis Junii, in tam calida regione, qualem Africam esse nemo ignorat, in tam longis diebus, per loca adeò deserta, inculta, & arenosa, & in jugi equorum succussu sustinuerint. Gravissimè tamen eis accidebat, quòd sæpe per decursum multorum milliarium, imò & dierum, ne guttulam quidem aquæ offenderint, qua exæstuantem solis ardorem, quo immaniter torrebantur, modicè saltèm lenirent.

Hac

Hac methodo postquam totam diem, duasque noctis horas in itinere transegissent, tandem in proximè obvio loco, ubi tenebræ eos opprefferant, & ulterius procedere vetuerant, tentorium quoddam erexerunt, in quo reliquum noctis traderent. Verùm & hæc exigua quies suis non carebat periculis, nam unde defatigantium membrorum suorum levamen præstolabantur, inde novarum molestiarum, & terrorum copiosa eis seges enata fuit; cum enim sub illo tentorio humi consedissent, ut fractas ab itinere vires modico quodam cibo restaurarent, non sine stupore observarunt, Mauros sepositis omnibus aliis occupationibus in id unicum esse intentos, ut magnam lapidum vim coacervarent. Admirati Patres tam inutilem, & inopportunam, ut eis videbatur, Maurorum sollicitudinem, ex interprete suo sunt sciscitanti, quid sibi tam ingens lapidum cumulus velit? Quibus ille respondit:  
Mau-

Mauritaniam esse multorum, ferocissimorumque leonum matrem, quibus solemne est, nocturnis grassationibus tentoria viatorum invadere, & equos, aliisque animalia, quæ invenerint, rapidis dentibus discerpere, ac ligurire, illis autem abigendis non aliud medium æquè efficax suppetere, quàm multos lapides colligere, eosque animadverso leonum adventu fortiter inter se collidere, aut in eum locum, ubi hæ bestię versari putantur, jactare, ut eorum fragore exterritæ in fugam se conjiciant.

Timidis Patribus hæc relatio à principio satis erat suspecta, credebantque barbaris illis, ceu juratissimis Christianorum hostibus propositum esse, se ab illis hac arte ludificari, ut hoc timore correpti post malam diem deteriorem noctem experirentur. Citò tamen rei veritatem edocti fuerunt; cùm enim sumptâ coenulâ sese ad brevem quemdam somnum comparassent, quem eis præcedentis

tis

tis diei labores imperaverant, audierunt ex inopino equos terribilem in modum hinnire, ungulîs terram pulsare, tantûmque furorem præferre, ac si ruptîs lorîs omnes uno impetu auflugere conarentur: Impendîo itaque admirati sunt, unde tam intempestivus equorum tumultus subortus fuisset. Mauri autem, quibus causa hujus rei non erat obscura, illicò stentoreîs vocibûs exclamare, filices inter se collidere, eosque totîs viribûs contra leones vibrare cœperunt. Atque sic tandem agnoverunt Patres, vera fuisse, quæ sibi ab interprete de nocturna leonum grassatione dicta fuerant, præcipuè, cùm immanes rugitus territorum, & in fugam actorum leonum suîs auribûs exceperant, quæis haud vulgarter terrefacti fuêre.

Paululùm ab hoc terrore respirârunt, dum novo clamore, collisorûmque lapidum fragore excitati, & in veritate de leonum incursum confirmati sunt; tribus nâmque, si-  
ve

ve quatuor ab eorum tentorio stadiis nobilis quidam Maurus, Mahomet Benzuda dictus, qui postea Patribus in summa eorum afflictione Tetuani prolixè favit, castrametatus fuerat, quia in illo loco nox eum opprefferat; huic leones à tentorio Patrum abacti, haud mediocre negotium facessiverunt, rabidòque assultu ex ejus jumentis sibi gratuitas dapes parare nitebantur, ut proinde eis profligandis magno clamore, & sonoro valde lapidum strepitu opus fuerit. Et profectò grande DEUS mortalibus beneficium præstitit, quod equis, aliisque jumentis eam sagacitatem indiderit, ut leones etiam à longe adventantes præsentiant, suòque hinnitu, & tumultu prodant, cujus operâ homines à somno excitantur, & in leones armantur. Quod nisi fieret, omnes procul dubio ab hisce carnivoris beluis laniarentur.

Hæc erat nocturna quies V. P. N. Joannis, ejusque sociorum post quotidiania-

tidianam sedecim, aut septemdecim  
 milliarium peragratiōem. Huic non  
 inferioris notæ malum accefferat,  
 quòd nimirum Maurus ille, quo ha-  
 tēnus tamquam interprete usi fue-  
 runt, eos post biduum deseruerit,  
 & in comitatū supradicti Mahomet  
 Benzudæ concesserit. Remanserunt  
 itaque miseri, & Mauritanæ linguæ  
 ignari Patres in manibus illorum  
 Maurorum, quos à principio se-  
 cum Tetuanō eduxerant, quorum  
 idioma neque Patres calluerunt, ne-  
 que isti Patrum Redemptorum lin-  
 guam intellexerunt. Cū verò  
 Mauri cum lacte materno lethale ad-  
 versus Christianos odium sugant,  
 datā operā desolatis Patribus multas  
 afflictiones, & molestias intulerunt,  
 easque linguæ ignorantia excusârunt.  
 Scilicet non dantur deteriores surdi,  
 quàm qui audire nolunt, nec crassio-  
 res rupicones, quàm qui ignoran-  
 tiam in velamen suæ malitiæ præten-  
 dunt.

Non minoris discriminis aleam  
 subi-



subire coacti sunt, in trajectu trium profundorum fluviorum; modus enim, quo illos superârunt, erat multò periculosissimus, unde etiam in transmissione cujuslibet fluminis singulari dispositione se semper ad mortem præparârunt. Methodus autem hujus transvectionis talis erat: Mauri extemporaneâ texturâ obvios juncos in corbem plectebant, cui deinde Patres imponebant. Quo facto unus ex Mauris undas infiliebat, agilique natatu corbem remulco alligatum post se trahebat: alter autem in litore consistens rudentem, huic corbi itidem alligatum, in manibus tenebat, eúmque socio suo remulcanti, quantum satis esse videbatur, sensim laxabat. Atque hac ratione vasta illa flumina trajecerunt, perpetuo timore suspensi, ne aut levidentis hæc navicula aquarum impetu dissolveretur, aut ruptis remulcîs ipsi cum corbe inter undarum vortices sepelirentur. Hac transvectione peracta reliqui Mauri cum equis



equis flumina tranârunt, quos ut Patres conscenderunt, extemplò rursus absque ulla mora sese itineri dederunt.

## CAPUT V.

*Fezium appulsi officiosè excipiuntur, sed inde protinùs Saviam amandantur.*

**T**Ot laboribûs, & ærumnâs exhausti Patres salvi tandem, & incolumes Fezium pervenerunt, idque 19. Junii, die Martis, quartâ post meridiem horâ. Ubi fama de eorum adventu percrebuit, tanta commotio in hac populosa urbe exorta est, ut tota penè civitas se extra portas effuderit, rarum terris illis spectaculum visura. Ipsi autem non sunt civitatem ingressi, sed ex mandato Pro-Regis in suburbium quoddam deducti, solis Judæorum habitationibus deputatum, quod tamen unius duntaxat muri intergeriò ab urbe dispecscitur. Defatigati quidem,

dem , sed tamen felici itineris successu exhilarati Patres SSS. Trinitati plurimas pro tanto beneficio grates exsolverunt , rati , se nunc in portu navigare , omnesque res suas jam esse in vado ; nec quidquam aliud restare , quàm ut salutationis officiis apud Pro-Regem perfundi illicò Redemptioni Captivorum manum admovent , cujus rei gratiâ tam prolixum iter susceperant. Equidem spes illorum bona est cumprimis , vereor tamen , ut successus eorum expectationi respondeat.

Captivi Christiani , qui in ea urbe detinebantur , ubi intellexerunt Patres Redemptores advenisse , & in suburbio Judæorum hospitium nactos fuisse , gaudiò offertissimi accurrunt , ut eos viderent , firmiter persuasi , se eorum operâ proximè in desideratissimam libertatem assertum iri. Erat sanè miserandum , & compassione dignum spectaculum videre homines istos macie exhaustos , colore pallidos , barbâ intonsos , crinibus

nibûs impexos, pedibûs excalceatos, veste laceros, & gravissimo catenarum pondere impeditos, quos ductores, veriùs dixerim, carnifices eorum, plagis, & verberibûs impaëtis ad ambulandum compellebant, eo prorsus modo, quo laniones gregem aliquem pedulcorum caprorum, aut grunniuntium porcorum impescere solent. Conspecta tam enormi pauperum captivorum calamitate Patres Redemptores in tenerri-  
mas lacrymas resoluti fuerunt, præcipuè tamen V. P. N. Joannes, qui cum vidisset, miseros illos tam inhumanis, & indignis modis haberi, compassionis impetu abreptus, inter profusos ubertim lacrymarum rivulos, propiùs illos accessit, eorûmque catenas, quibûs gravabantur, blandè levavit, afflictosque solatus, jussit meliora sperare, celerem Redemptionem pollicitus. Hæc tamen charitatis signa adeò ei non fuerunt impunia, ut etiã crebrioribûs ictibûs à Mauris vapulârit.

Percontanti deinde , quid causæ esset , quòd captivi tam crudeliter tractarentur , tantâque curâ , & rigore custodirentur , cùm tamen illi in umbilico regni constituti ne prudentem quidem tentandæ fugæ suspicionem excitare possent , responsum fuit , id ex regis imperio fieri , qui mandârat , ut omnes captivi Christiani catenâs vincirentur , ad quod sanciendum impulsus fuit partim nativa sua crudelitate , & hæreditariô erga Christianos odiô , partim metu , ne , si captivi ( qui numerô multi erant , & animô bellicosi ) sinè vinculis incederent , ad regem Bembucar , quem tyrannus ille eo tempore per summum nefas regnô spoliaverat , deficerent magnum ejus rebus momentum allaturi , quòd bellicâs artibûs instructissimî , facilè lapsantem fortunam ejus fulcire , aut erigere posse crederentur. Pii itaque , & charitate flammidi Patres dederunt operam , ut miseros illos , & afflictos homines pro viribus solarentur , quos denique spe im-

imminentis Redemptionis suæ erectos ad prolongatum eorum martyrium remiserunt.

Illis temporibus Imperium Fezianum sub nomine Pro - Regis administrabat Muley Arran germanus frater Regis Muley Arzis , qui , cùm de adventu Patrum certior factus fuisset , protinùs sex arietes , diversos fructus illarum regionum , ac denique nonaginta florenos in parva , & usuali moneta pro congiario illis transmissit. Isti autem , quibus nihil magis in votis erat , quàm ut celerî subsidio afflictis captivis subvenirent , altera statim die , vigesima scilicet mensis Junii , quin vel tantillum ab ærumnis , in tam laborioso itinere exantlatis , respirâssent , hunc Principem adiêrunt , atque ab eodem enixis precibûs licentiam inchoandæ Redemptionis efflagitârunt , quam se tantò faciliùs consecuturos arbitrabantur , quantò illi promptiùs ex regis mandato Tetuanô Fezium commigrâssent. Pro - Rex autem , quàmvis illos blan-

dè admodùm , comitèrque excepisset , monuit tamen , regis fratris sui non eam voluntatem fuisse , ut Fezium duntaxat accederent , sed ut ejus præsentiam , vultúmque subirent. Necessarium proinde fore , ut se novo itineri accingerent , & Saviam proficiscerentur , ubi rex eo tempore cum exercitu versabatur , qui de rebus summi momenti cum eis esset collocuturus. Scirent proinde , hoc iter esse inevitabile , sibi námque incumbere regis , & fratris sui jussa ad ultimum apicem exhaurire.

Tam inexpectata denunciatione consternati Patres anxie deliberare cœperunt , quid factu opus esset. Videbant novum , & ultra sexaginta milliaria protensum iter præ foribus instare. Videbant se hac ratione quotidie profundius Africæ immersum iri , metuebántque versipelli Maurorum vafritie in tam remotis , & dissitis plagis sibi casses parari , quibûs irretiti ægrè , ac fortassis non aliter , quàm cum jactura totius peculii

culii sui essent eluctaturi. Videbant pariter hanc peregrinationem multò majoribus difficultatibus fore obnoxiam, quàm priorem, cum non ignorent, gentes nunc sibi longè ferociiores adeundas esse, eoque transmigrandum, ubi totum examen immanium illorum prædonum, & inhumanorum latronum, qui tyranni signa sequebantur, confedisset. Sacrum itaque inter, & saxum hærebant, nec quid agerent, aut in quam partem se inclinarent, dispicere poterant; dum ecce tibi! post tres dies nempe 24. Junii adsunt ex improviso quatuor Mauri, qui hospitium eorum ingressi nunciabant, Pro Regem mandasse, ut crastina die in viam se darent, se quoque tempestivè cum equis, aliisque rebus ad iter necessariis adfuturos, ut eos Saviam deducerent: darent proinde operam, ut eos cras summo mane ad iter paratos invenirent.

Hòc mandatò auditò Patres super-  
vacaneum esse crediderunt tempus in-

utill deliberatione ulterius terere. Obfirmatô itaque contra omnia ad-  
versa, quæ sibi superventura time-  
bant, animô sese totos Divinæ Pro-  
videntiæ commiserunt, relicto tamen  
**Fratre Joanne à S. Augustino** in urbe  
illa, qui gravi infirmitate ex prævii  
itineris molestiis contracta, de vita  
periclitabatur, quàmvis & ipse recu-  
peratîs utcunque viribûs eos altero  
statim die subsecutus fuerit, veritus,  
ne desolati Patres nimio mœrore con-  
ficerentur; sciebat enim illos nunc  
solos, suoque ministeriô destitutos  
in manibus crudelissimorum barba-  
rorum versari, ac præterea de sua  
infirmitate anxios semper, & solici-  
tos fore, ut proinde satius duxerit  
confirmata nonnihil valetudine eo-  
rum vestigia premere, quàm Patri-  
bûs in tanta tristitia derelictis curan-  
do corpori diutius indulgere. His  
ille cogitationibûs impulsus statuit  
præcipitato itinere Patres in via asse-  
qui, quod licet ei ex sententia non  
cesserit, quia Patres illum longè præ-  
ver-



verterant, eos tamen Savia est affectus, quibus deinceps etiam constanter adhæsit.

## CAPUT VI.

*Epitome rerum, à rege Muley Arzis gestarum, usque ad illa tempora, quibus Patres nostri ad eum pervenerunt.*

**U**T verò tantò cumulatius intelligatur, quid Patres Redemptores in hoc itinere passi fuerint, quibusque ærumnis postea sint confictati, operæ pretium fore puto, si succinctò calamò vitam regis Muley Arzis ab ipsa origine descripsero, & bella illa singillatim recensuero, quibus tunc implicitus fuit, quando Patres nostri ad eum contenderunt. Hic itaque tyrannus filius fuit alterius cujusdam Muley Regis Taffiletæ, qui opum magnitudine, & imperii amplitudine omnes Reges Mauritanie, & Numidiæ transcenderat, aut certè æquaverat. Hoc genitore procreatus fuit Muleyus noster,

matrē tamen longè inferioris conditionis, vilī nimirum, & nigrā ancillā, patris sui mancipiō. Hæc genitricis ignobilitas causa fuit, ut & ipse quoque Muleyus contemp-  
tui haberetur, atque ab omnibus dignitatum subselliis excluderetur. Mortuo patre rerum summa transi-  
vit ad filium ejus natu majorem, cu-  
jus vitæ, & imperio Muleyus iste,  
superbiæ, & ambitionis œstrō per-  
citus, clandestinis machinationibûs  
insidiabatur, quibûs tandem in lu-  
cem productis, dignam nefandis-  
simis suis poenam recepit ad per-  
petuos carceres condemnatus. Ex-  
istimaverat quidem frater ejus, satis  
nunc suæ & vitæ, & dignitati esse  
consultum turbulento, & factioso  
hoc capite in obscurum, & horridum  
ergastulum conjecto, sed quantum sit  
hallucinatus, sequentium temporum  
eventus prodiderunt; Muley enim  
ingeniō sagax, & manu promptus  
vias invenit, quæ post sexennium  
ē tam ingrato diversorio eluctaretur,  
&

& ad Mahometem Bembucar, præ-  
potentem Savie regem, & virum in  
opinionem omnium Mahometanorum  
sanctum aufugeret, cuius ille prote-  
ctionem, ac patrocinium implora-  
vit.

Incautus rex ille, ignarus nimi-  
rum, quanti res sit periculi ova aspi-  
dum in sinu suo fovere, hunc vene-  
natum scorpionem, sibi, innumeris-  
que aliis hominibus exitio futurum,  
benevolè excepit, armis, pecuniis,  
& militibus instruxit, eumque est  
exhortatus, ut bellicæ fortunæ  
aleam tentaret, magnosque suos spi-  
ritus in regna Occidentalis Africæ ef-  
funderet, quæ eo tempore impoten-  
ti Principum suorum dominatu pre-  
mebantur. Nec opus erat aliò cho-  
raulâ, qui eum, ut quondam mag-  
num illum Julium, ad prælia inflam-  
maret; hac namque cohortatione  
incensus, & naturali sua ad cædes,  
pugnâsque inclinatione stimulatus  
protinus acies eduxit, totoque im-  
petu in regnum Fezianum converso,  
illud

illud ante omnia expugnare constituit. Et ab initio quidem non statim justis praeliis cum rege Feziano congressus est, sed grassatorum duntaxat, & latronum more, incertis excursionibus terram depopulabatur, oppida, pagosque succendebat, urbes vastabat, tantaque crudelitate in obvios quosque bacchabatur, ut terror, & fama nominis ejus vicinas late provincias compleret, cruentissimique tyranni immanitas per omnium passim ora volitaret. Hac fama illecti plures ejusdem farinae focii, quibus volupe erat humano sanguini innatare, & alieno adipe proprium abdomen saginare, certatim ad eum convolarunt, sub illius ductu, & auspiciis militaturi, aut potius latrocinaturi. Muleyus autem, cum videret, se tantam hominum multitudinem non aliter nisi solis rapinis sustentare posse, veritusque, ne si materia prædæ deficeret, ipsi quoque ab eo diffuerent, se regem Fezianum proclamari jussit, ut hac

ra-

ratione urbes, & oppida illius regni in suam ditionem redigeret, quod ei perfacile fuit non tam ob ingentem, qua vallabatur, militum copiam, quàm ob immanem terrorem, quem omnibus incusserat.

Expugnatô tam opulentô, & potente regnô frenos suæ crudelitati laxavit, ut indigenas, quibus violentum imperium suum parùm gratum esse non dubitabat, tormentorum metu in officio contineret, & suppliciorum terrifico apparatu magnam sibi authoritatem conciliaret. Hoc prospero rerum successu elatus, nec dominatu tam insignis regni contentus ad ampliora animum extendit, & Tetuanum suæ potestati subicere aggressus est. Huic urbi eo tempore jura dabat Gailan, vir bellicosus, & inter Mauros valdè honoratus, qui tamen tyranno castra opponere non est ausus, sed furore hujus barbari exterritus, qui ad instar furis infernalis obvia quæque perrupit, ac dissipavit, tumultua-

tuariâ fugâ Tetuanum deseruit, munitissimóque præsidio, Arcila dicto, se, suasque opes omnes inclusit, ex quo integrò fermè bienniô Muleyo fortissimè restitit. Sed cum animadverteret, fieri non posse, ut tam validis copiis, earúmque repetitis assultibus diutiùs reluctaretur, tandem consiliô à necessitate petitô, urbem tradidit, seque simul manibus illius truculentæ belluæ commisit; sed infelici prorsus successu, utpote qui ibi exitium suum invenit, ubi salutem suam quæsiêrat; tyrannus enim nihil hac spontanea deditioe emollitus, eum lentis, & immanissimis tormentis vitâ privavit.

Hoc novô regnô liguritô tyrannus aliquantulum pacatiùs agere cœpit, non tamen diutiùs, quàm opus erat, ut thronum suum inconcussis basibus stabiliret. Urbes itaque, & munitiora præsidia illorum gubernio concedidit, quos, longâ experientiâ edoctus, sibi fidelissimos, & in crudelitate simillimos esse nôrat. Ad-

jecit



jecit deinde animum ad novas leges  
 condendas, quarum levissimam trans-  
 gressionem atrocissimâs pœnâs est ul-  
 tus, ut terror nominis sui tantò latius  
 subjectas provincias pervagaretur.  
 His rebûs ex animi sententia absolu-  
 tîs, tandem totas imperii sui vires col-  
 legit, easque contra regem Saviæ,  
 Mahometem nimirum Bembucar, à  
 quo tanta beneficia acceperat, in-  
 gratissimò animò convertit. Prius  
 tamen titulum Imperatoris sibi ar-  
 rogavit, ac deinde post subjugata,  
 & integrè debellata Regna Marrochii,  
 & Mequinii, numerosissimo, illis-  
 que terris nunquam hætenus viso  
 exercitu præfatum Regnum Saviæ  
 est aggressus. Et ille quidem to-  
 tum mundum sibi expugnaturus vi-  
 debatur, non solùm barbarâ suâ ar-  
 rogantiâ, & ferociâ, qua communem  
 mortalium sortem dudum antegres-  
 sus fuerat, verùm etiam incredibili  
 militum multitudine, quos ad hoc  
 cruentum bellum armaverat; exer-  
 citus enim ejus adeò excreverat, ut  
 in

in eo ducenta, & quinquaginta pedum millia inventa fuerint, præter alia triginta millia nigrorum, sive Æthiopum, frameis & lanceis instructorum, qui agmen præcedebant, & ante se duo millia catenis inter se connexorum camelorum agebant. His accedebant sexaginta millia equitum, majori de parte ex Mauris conflatorum, ut proinde numerus militum ejus trecenta, & quadraginta millia superaverit, quibus si addideris promiscuam calonum, lixarum, aliorumque fervorum turbam, infinitum propemodum numerum conficies.

Tam insolente belli apparatu, & horrifono armorum tumultu præpotentem illum regem adeò percussit, ut eum sui vix satis compotem reliquerit. Equidem ille nihil non egit, ut hanc pestem à regni sui finibus arceret, casto tamen eventu laboravit; licet enim amplissimis copiis conscriptis ei castra opposuerit, & consertò præliò binis vicibus de-

re-



rerum summa cum eo acerrimè dimicaverit , novercantis tamen semper fortunæ faciem expertus , non solùm victoriam amisit , sed & vivus in potestatem hujus tyranni devolutus fuit , qui immemor omnium beneficiorum , quæ ab hoc rege quondam acceperat , eadem crudelitate , iisdemque suppliciis miserum illum è vita exturbavit , quæ juratissimos , & infensissimos suos adversarios è medio tollere consueverat. Horridum sanè , & immane facinus , dum etiam ferocissimi leones suis benefactoribus comes se , & mansuetos exhibent , ut mundus in illo admiratus est , qui Andronicum ob exiguum quondam beneficium sibi impensum in vita conservavit. Sublato in hunc modum infelici illo rege , & Saviâ in deditionem acceptâ , urbem vastavit , ejusque potiore partem Vulcano consecravit , ac deinde recreato tantisper exercitu secundissimum victoriarum suarum cursum nova expugnatione Regni Zus continua-

tinuare decrevit. Hæc ille moliebatur, quando Patres Redemptores ejus jussu Saviam profecti fuerunt, & desertas illas, ac cæforum hominum cadaveribûs impeditas vias pererrârunt, ad quos nunc oculos convertere libet, ne prolixiore tam exoticarum crudelitatum narratione lectoris animum fatigemus, quàmvis ne sic quidem jucundioris historiæ theatrum nos aperturos polliceamur, ut satis ostendet sequens

## CAPUT VII.

*Perveniant Saviam, & quid  
in ea urbe contigerit.*

**V**idetur mihi omnipotens DEUS servos suos in camino tribulationum ad purum excoquere voluisse, adeò magnis, & amaris calamitatum vorticibûs illos perpetim jactari permisit. Hi itaque in societate duorum Maurorum 25. Junii Feziô discesserunt, tantas autem misérias in hoc itinere exantlârunt, quantas

tas ne tunc quidem sustinuerunt, quando Tetuanô Fezium commigrârunt ; terra enim militum ferociâ devastata, & in squallidam solitudinem redacta, nihil prorsus rerum esculentarum suppeditabat, ut proinde in bellariis reputaverint, sicubi frustum subrancidi panis, aut fracescentia aliquot poma nancisci potuere. Aqua plerumque erat adeo turbida, & lutulenta, ut nisi inexorabili sitis necessitate adigerentur, nunquam à se impetrassent, eam vel primoribus labris attingere. Hanc fœdaverant, & conspurcaverant densa illa jumentorum agmina, quæ tyrannus optimis spoliis onusta Saviâ Fezium transmiserat. Hæc diffusos latè campos replebant, viam destruebant, tantamque vim pulveris excitabant, ut viatores ejus copiâ propè suffocarentur. Potissimum tamen solis ardore affligebantur, quo in illo calidissimo mense tantum non affati fuerunt.

Quinque diebûs inter has ærum-

nas iter continuaverant, dum 29. Junii tandem *Mabbala* ( ita Mauri nominant militaria castra ) viderunt, quod propter ipsa mœnia exstructum longa serie urbem ambiebat, vasto-que sinu suo plus quam decem tentoriorum millia complectebatur, ut proinde magis faciem populosæ cujusdam urbis, quam militaris diversorii referret. Eò Patres delati papilionem suum non procul à regis tentorio erexerunt, ut tantò faciliùs opportunitatem aliquam cum rege loquendi consequerentur. Cæterùm mora eorum in castris minimè fuit diuturna; teterrima siquidem mephiti afflati, quam tot inhumata cadavera exhalabant, aliam habitationem circumspicere coacti sunt. Tentoriò itaque curæ duorum Maurorum, in quorum societate advennerant, commissò, ipsi assumptis secum sarcinâs suis urbem adire decreverunt, atque in hac resolutione viam, quæ ad civitatem ducit, auspicati fuerunt. Non longè adhuc pro-

processerant, dum tragicum quoddam, & lacrymâs dignum spectaculum oculos eorum incurrit; observârunt haud procul à muris urbicis quatuor Mauros luctifonâs clamoribûs, & tristissimâs ejulatibûs aëra replere. Ad quos cum propiûs accessissent, deprehenderunt homines illos pedibûs, manibûsque amputatis in suo se sanguine volutare, & non solum mutilationis suâ immensâs doloribûs torqueri, verum etiam famis, sitis, & solaris ardoris injuriâs immanissimè cruciari. Hoc illi supplicio ex mandato tyranni mulctati fuerunt, quod partibus ejus non satis favere crederentur. Quanto terrore Patres ex conspectu tam funestæ tragœdiæ correpti fuerint, nullis verbis satis explicari potest: Videbant miseros illos extremis doloribûs infestatos, neminem tamen esse, qui vel aquæ guttulam eis porrigere auderet, cunctis scilicet metuentibûs, ne pro tali charitatis officio similis poenæ mercedem repor-

tarent ; rex namque mandaverat ,  
ut Mauri illi omni humana ope de-  
stituti inter hæc tormenta expirarent.  
Hæc dum illi intuentur , tantis per-  
plexitatibus involuti fuerunt , ut pro-  
pè obriguerint , & ne passum quidem  
promovere potuerint. Ergo dum  
cunctantur , & ancipiti cogitationum  
tumultu fluctuant , ex Divina , procul  
dubio , dispositione pro solatio eo-  
rum supervenit quidam captivus  
Christianus , Malagâ ex Hispania  
oriundus , nomine Joannes Rubio ,  
qui trepidos Patres suô alloquiô con-  
firmavit , & impigrâ diligentia ædicu-  
lam aliquam pro eorum diversorio in-  
vestigavit , quam tandem etiam in illa  
urbis parte invenit , quæ , quòd so-  
lis Hebræorum habitationibus fuerit  
deputata , Judæorum civitas vulga-  
ri nomine appellabatur. Verùm Pa-  
tres loci infamiam nihil pensi habentes  
in id duntaxat erant intenti , ut  
res suas in tuto collocarent , & quam-  
primùm ad regis affatus perveni-  
rent.

Pau-



Paululùm à tanto terrore , aliisque itineris ærumnis respirârunt , dum fama vulgante ad eos perferatur , regem edictô publicô sancivisse , ut Judæi omnes sub pœna capitis intra viginti quatuor horas Saviâ excederent , & Fezium commigrarent ; facultate insuper negata aliud secum asportandi , quàm quod quisque humeris suis efferre posset. Ad hoc decretum promulgandum tyrannus impulsus fuit suspicione , & metu , ne Judæi filiis devicti regis , qui crueles ejus manus tempestivâ fugâ evaserant , adhærerent , atque adeó in ejus absentia novos tumultus , & factiones cierent. Degebant ea tempestate in hac urbe plùs quàm decem Judæorum millia , ut vel ex solo familiarum numero , qui ad quatuor millia ascenderat , colligi potest. Omnibus istis in unica nocte emigrandum fuit flebili sanè , & compassione digna calamitate , cùm ex illis pluri mi inediâ , & itineris laboribûs confecti miserrimè in via expiraverint ,

fuísque cadaveribûs arenosam illam solitudinem adhuc horridiorem reddiderint.

Tantus autem fuit afflictorum Judæorum, jacturam bonorum, ædiûmque suarum deplorantium, ejulatus, lamentatio, concursatio, & tumultus, ut Patres tota nocte illa ne oculum quidem claudere valuerint. Per-vigiles itaque anxîis animis ortum auroræ præstolabantur, qua ingruente è stratis suis profilierunt, festinísque pedibûs inquietum suum hospitium deseruerunt. Verùm quocûnque tandem oculos convertissent, ubique haud disparem luctum, & planctum offenderunt, Judæis omnia lacrymîs, questibûs, & singultisonis gemitibûs latè replentibus. Mox autem ùt solaureos suos radios spargere incepit, statim belluinus tyrannus militibus suis imperavit, irent, totâmque Judæorum civitatem lustrarent, & si quos invenirent, qui nondum urbe egressi fuissent, illos absque misericordia trucidarent.

Ni-



Nihil cunctati Mauri exertis frameis protinus civitatem irruerunt, omnesque Judæos, quos aut infirmitas, aut doloris magnitudo, aut dubia spes futurorum domi adhuc detinuerat, inexorabili sævitie jugularunt. Quibus interfectis jussit tandem rex flammam tectis eorum subjici: ipse autem, novum mundo Neronem exhibiturus, in talem se locum contulit, è quo totum incendium commodè inspicere, immitésque oculos suos tam ferali spectaculò pascere videret.

Hæc, dum agerentur, Patres Redemptores in vestibulo domus regiae consistebant, & opportunam quandam cum rege colloquendi occasionem captabant. Cæterum ut audierunt confusum vociferantis populi clamorem, nec tamen satis scirent, quid iste portenderet, palatiò egressi, non sinè horrore aspexerunt ingentes flammarum globos, quos incendium ex imis ædium visceribus ebullierat, & ventorum vi obstetricante

in altum eructaverat. Tam terrificô, & inopinâtô spectaculô attoniti Patres jam non solùm alienam, sed & propriam miseriam deflere cogebantur; cùm enim hospitium illorum in eo esset loco situm, ubi flammæ impotenti furore potissimùm bacchabantur, non sinè ratione res suas cum ipsa domo conflagrâsse autumabant. Nec tamen solam sarcinarum suarum amissionem deplorabant, sed multò magis de salute illius captivi, cujus custodiæ domum crediderant, solliciti tenebantur, quem voraci incendio in pabulum cecisse formidabant. Properè igitur, quàmvis non sinè periculo advolârunt visuri, num aut captivum illum, aut quidquam rerum suarum flammis eripere possent, sed cum propiùs accessissent, illicòprehenderunt, totam illam domum, sicut & alias omnes in circuitu, ignibûs obsessam ardere. Mœsti proinde, ac desolati relicta urbe in castra reversi sunt, tentorium suum repetituri, quod pri-

pridie curæ duorum Maurorum tradiderant , hoc námque unicum refugium in tanta calamitate eis etiamnum remanserat.

Sed quemadmodum dispulsis gravidarum nubium umbris , solis jubar lætiùs promicat , ità afflicti Patres inexpectatò quòdam gaudiò dulciùs sunt recreati ; cùm enim profundissimò quodam tristitiæ pelagò essent absorpti , quòd se viderent in medio barbarorum , & ab omni charitate alienorum hominum constitutos , pecuniâ destitutos , tantis quoque parasangis Ceutâ remotos , unde subsidium aliquod evocare potuissent , hæc , inquam , cùm apud se mœstis cogitationibûs revolvunt , præter spem omnem , in ipso tentorii ingressu , captivum , quem in urbe ad sarcinas dimiserant , salvum , & incolumem intuentur. Hoc erat primum gaudium , quo post tantas ærumnas , adversitates , afflictiones , & terrores recreati fuerunt. Sciscitantibûs ergo illis , quo pacto rabi-

dam

dam illam incendii sævitiem evasisset, respondit iste, se quidem non sinè præsentissimo vitæ periculo tribûs vicibûs flammâs penetrâsse, rêsque Patrum domo extulisse, nullis tamen ignium injuriis læsum fuisse, quod apertissimo ipse miraculo tribuit, cùm crederet, naturalî modò id fieri minimè potuisse, præcipuè cùm non raptim domum subiverit, sed tantas in ea moras fecerit, quantis opus erat, ut totam Patrum substantiam ab edaci flammarum violentia vindicaret. Quo audito religiosi Patres consonis vocibûs Divinæ Majestati pro tanto beneficio laudes, gratésque decantârunt, satîs gnari, si illud exiguum peculium, quod secum in viaticum attulerant, perdidissent, sibi inter infideles illos pereundum fuisse.

## CAPUT VIII.

*De iis, quæ inter P. Joannem,  
& Regem Muley Arzis eve-  
nerunt.*

**H**Oc terrore nonnihil sopito V. P. noster Joannes cum sociis suis in urbem reversus est, occasionem aliquam cum rege loquendi prehensaturus, & licentiam petiturus Redemptionem captivorum inchoandi. Vix autem illi atrium regalis palatii fuerant ingressi, dum regem ipsum obvium habuerunt, quem tamen nullus eorum agnoverat, partim quòd eum nunquam viderint, partim quòd rex solus, & in comitatus incesse-  
rit. Tyrannus, ut viros istos religiosos conspexit, illos sibi ignotos esse simulavit, ac propterea quendam aulicorum suorum accersivit, eique in mandatis dedit, ut Patres interrogaret, quinam essent, & qua licentia (cùm exterior vestium forma illos Christianos esse proderet) atrium regie domus

mûs ingressi fuissent? Patres modestè responderunt , se Redemptores esse captivorum , & sub regii verbi fide Mauritaniam ingressos , ac deinde Feziani Pro-regis jussu huc profectos fuisse. Addebant deinde , se non alia de causa præsentem Aulam adivisse , quàm ut occasionem aliquam nanciscerentur ad regis affatus perveniendi , ejusque mandata implendi , quatenus desideratissimam Redemptionem captivorum quàm maturrimè auspicari possent. Hîs auditis excanduit tyrannus , truci-  
que vultu minas spirans reposuit , nihil magnum fore , si rex tantam audaciam morte puniret. Quibûs dictis obmutuit , lectisque retrò vestigiis , in suum se rursus palatium recepit , relictis Patribûs metu , stuporêque defixis , qui licet mortem subire minimè formidarent , non poterant tamen non deplorare sortem pauperum captivorum , qui eorum nece tam efflictim expecta-  
ta

ta, tantisque votis exoptata libertate frustrandi erant.

His illi angustiis obsessi, majori adhuc terrore repleti fuerunt; Maurus enim, qui interpretis apud illos officioungebatur, pessima quæquam Patribus, sibi que ominatus, aufugit ab eis, exerte testando, regem fuisse, cum quo illis sermo paulò antea intercesserat. Quantum autem pii illi viri ad talem relationem cohorrerint, proclivius est cogitare, quàm scribere. Stabant illi attoniti, à rege, qui eos per tanta terrarum spatia ad se vocaverat, tam asperè, & inhumanè excepti, & à suo interprete deserti, ut proinde, quid agerent, aut quò se verterent, non habuerint. Dum igitur de re præsentis inter se deliberant, Maurus quidam, sive à rege jussus, sive suò geniò, & naturali in Christianos odiò ductus, ut desolatis nimirum Patribus uberiùs illuderet, illos accessit, eosque manfuetè subsequentes ad obscurum quoddam, & foetidum equorum stabulum

bulum deduxit, in quo ab hora octava matutina usque ad quintam à meridie sinè cibo & potu permanserunt. Hunc locum immundum ingressi confestim ad mortem se disposuerunt firmiter persuasi, se illo etiamnum die filios mortis, ac æternæ deinvitæ futuros. Patres itaque sibi invicem confessi fuerunt, Frater Joannes autem exomologesim suam in auribus V. P. Joannis deposuit.

Dum itaque mortem singulis momentis expectarent, ingressi sunt duo Mauri ad eos, catenas, numellas, & ferreos circulos, quibûs in Mauritania reorum manus, pedesque vinciri solent, ex humeris portantes, & torvis oculis Patres intuentes. His visis ultimam vitæ suæ horam jam advenisse crediderunt, rati, duos illos nigros esse ex numero carnificum, quibus rex provinciam illos jugulandi demandaverit : Isti autem depositis numellis, & catenis prægrandes duos cultros è sinu producerunt, esoque in allata secum cote  
ex-



exacuerunt , tamquam ad instantem aliquam lanienam se præpararent. Verùm religiosi illi viri hõc terrificò spectaculò nihil admodùm exterriti se promptis animis ad martyrium obtulerunt , ex quibus V. P. Joannes primus erat , qui mortem exporrecta fronte provocavit , cui se alii duo socii ejus generosissimè conformârunt. Impavidus itaque in genua procubuit , oculisque in cœlum erectis , & vultu placidissimo impetum lictorum expectavit , aliis duobus intereà optimis sermonibus se ad hunc gloriosum agonem alacriter subeundum cohortantibus. Cæterum Mauri , qui licentiam quidem habuerunt hos viros religiosos ludificandi , non tamen occidendi , sesqui horæ exactò spatiò , nullòque verbò prolatò inde rursus egressi fuerunt sarcastico risu mortales Patrum angustias largè , & affatim subsannando. Mirum sanè minimè fuisset , si Patres illi in tanto terrore animas egissent , aut ardentissimum pro Christo patiendi

desi-

G

desiderium residuum calorem vitalem in eis penitus extinxisset. Verum Divina Majestas, quæ illos pro gravioribus ærumnis prædestinaverat, noluit eos in hac velitatione emori, ne gloriosiorum trophæorum, quæ ipsos præstolabantur, exsortes manerent.

Post digressum liëtorum cœperunt quidem Patres à concepto terrore aliquantulum respirare, sed cùm non ignorarent, barbarum illum regem in deliciis habere, eos, quos perdere decrevit, lentis, ac protractis suppliciis conficere, rursus suspicati sunt, ne fortassis terror iste præsagium quoddam, sive prodromus fuerit graviorum tormentorum, quæ impotentis tyranni cruda sævities eis adhuc inferre constituisset. Hæc illi dum anxie volvunt, & ambigua spe metum temperant, supervenit circa horam quintam vespertinam interpret illorum, qui eos ante meridiem præcipitatâ fugâ destituerat. Hic, cùm rei gestæ seriem Patribûs  
nar-

narrantibûs didicisset, respondit, illos nigros fuisse quidem lictores, non tamen, idcirco in hunc locum venisse, ut Patres jugularent; agebat enim, se toto hoc tempore in civitate fuisse, nullibi tamen audiisse, quòd rex præceperit, ut Papazes ( ità Mauri Religiosos nostros appellant ) interficerentur. Certum itaque tenerent, si rex, qui jam tempore matutino suam indignationem prodidit, illos è medio tollere decrevisset, se ad hanc horam nequaquam victuros fuisse, præcipuè cùm regem non fugerit, quo loco tota die latuerint. Hòc dictò, eos bonò animò esse, secúmque ire iussit, quem cùm secuti fuissent, ad parvam quamdam domum pervenerunt, ubi cibò, potúque corpora recreârunt, quod illis tantò magis erat necessarium, quantò majori terrore, inediâ, solis ardore, atque inde emergente siti afflictati fuerant. Promiserat eis pariter Maurus ille, se ipsis crastina die ( Patri námque Joanni

fixum erat nulli industriæ parcere, ut ad regis alloquium pervenire, & facultatem inchoandæ Redemptionis obtinere posset, quamvis necessarium foret, ut hujus rei gratiâ vitam cum sanguine funderet) copiam cum rege loquendi impetraturum.

Hos inter sermones fama ad eos perfertur, regem eadem adhuc nocte in castra concessurum, & summo mane cum toto exercitu Marrochium profecturum; hanc enim urbem festinanter adire decreverat, ut præparatis celeriter rebûs, quibûs ad expugnationem regni Zus opus habebat, cursum victoriarum suarum prosequeretur. Hac auditione percepta Patres, atque cum illis Maurus, qui eos in congressum regis se perducturum sponponderat, cum primùm aurora illuxit, è stratis profilierunt, & glomerato gressu in castra contenderunt, quæ, ut diximus, plura quàm decem tentoriorum millia in suo gremio complectebantur. Pro-

diit

diit deinde à rege mandatum, ut tabernacula circa horam septimam removerentur. Hoc præceptum Mauri tanta festinatione compleverant, ut tentoria omnia, solo regis papillione excepto, quem in sua statione reliquerant, in momento ferme disjecerint, ut proinde nemo satis mirari potuerit, quomodò locus ille, qui paulò ante faciem frequentissimæ urbis exhibuerat, adeò subito ex spectantium oculis evanuerit, ac si dehiscente terra absorptus fuisset. Post modicum temporis intervallum interpretes Patrum è regio tentorio egressus illis significavit, regem jam indulgisse, ut in ejus conspectum prodirent. Illi itaque omni possibili celeritate conscientias mutuïs confessionibûs expiârunt, ac imploratô Dei auxiliô tandem regis tabernaculum subiverunt.

Quos, ut vidit, insolentissimus tyrannus magno fastu rursus interrogavit, quînam essent, & quid vellent? Ad hæc Patres placidè, ac humiliter

reposuerunt , se esse Redemptores  
 captivorum Christianorum , qui ejus  
 regio verbo confisi terras has ingressi  
 fuissent , ut vinculatos Christianos  
 datô lytrô in libertatem assererent.  
 Addiderunt pariter , se ejus imperiô  
 commigrâsse , Tetuanô Fezium atque  
 in hac ultima civitate Pro-Regis  
 mandatô jussos fuisse Saviam petere ,  
 se itâque promptâ obedientiâ huic  
 præcepto morem gessisse , & coram  
 ejus regio vultu nunc comparuisse.  
 Hïs auditis barbarus rex adductô su-  
 perciliô , & aspera voce respondit ,  
 duplici se causâ impulsus fuisse , ut  
 Patres ad se accerferet : primò qui-  
 dem ut eis justissimam suam indigna-  
 tionem adversus Hispanos concep-  
 tam aperiret ; sibi namque relatum  
 fuisse , Hispanos tanta crudelitate in  
 Mauros sævire , ut non solum vivos  
 exquisitissimâs tormentis affligerent ,  
 sed belluina rabie etiam defunctorum  
 corpora canibus discerpenda objice-  
 rent. Quæ si veritati consona fo-  
 rent , se repressaliorum jure simili  
 im-

immanitate in Hispanos animadversurum. Fronte deinde nonnihil serenata, & facie placidiori subjunxit, perscriptum sibi fuisse, Patres varias, & pretiosas gemmas secum in Mauritaniam attulisse, quarum visendum desiderio se teneri affirmavit.

Patres auditis hîsce calumniis breviter, quantum nimirum angustia temporis patiebatur, propositas regis querelas diluerunt. Dixerunt itaque, regem falsis, & malevolis relationibûs ab illis demulctum fuisse, qui suis assentationibûs ejus favorem aucuparentur; nam quantum à veritate abhorreat, quòd Hispani tanta crudelitate cum Mauris captivis procedere dicantur, posse regem vel ex eo agnoscere, quòd blandiloqui illi veteratores citra ullum ruborem ei imposuerint, ac si ipsi tantam gemmarum vim secum advexissent; regem enim, si tam Fezii, quàm Tetuani veritatem penitiùs explorare vellet, facilè deprehensurum se præter pauculos quosdam unio-

nes , & smaragdi unius cimelium nihil secum adduxisse , neque hæc alio fine assumpsisse , quàm ut ea juxta receptam consuetudinem regi pro obtento commeatu offerrent. Atque hòc dictò smaragdum ingeniosa aurifabrorum manu elegantissimè vestitum ei tradiderunt , cujus decora specie tyrannus inescatus , blandiùs deinceps cum Patribus egit , eisque nova securitatis sponsione facta amplissimam licentiam captivos redimendi , non solùm Fezii , & Tetuani , sed etiam in omnibus urbibus , & locis sui Imperii concessit. His dictis equum conscendit , & extemplò in viam se dedit. Id ipsum etiam Religiosi nostri fecerunt , qui hac veniâ obtentâ tantis sunt gaudiis delibuti , ut omnium præteritarum calamitatum , & afflictionum fuerint obli-  
liti.

Quartâ itaque Julii in societate duorum nobilium Maurorum , quorum alter , cujus etiam superiùs mentionem fecimus , Mahomet Benzuda ,

al-



alter verò Casime Daudaz dictus fuit, Saviâ excefferunt. Hoc tertium iter eis non perinde molestum accidit, atque duo priora; blandissima siquidem spes Redemptionem Captivorum exordiendi, ipsis omnem viarum amaritiem edulcaverat, & immodicum solis ardorem lenierat. Verùm licet proprias miseras patienti stomacho concoxerint, non potuere tamen à se impetrare, ut alienis non indoleſcerent; cùm enim urgente tyranni mandato omnibus Judæis intra viginti quatuor horas fuerit Saviâ emigrandum, quorum domicilia etiam ante evolutionem hujus temporis flammis in prædam ceſſerant, impossibile videbatur piſſimis Patribus, ut ſiccis oculis intuerentur palantia illa, & per campos latè diſperſa miſerorum agmina mœſtiſſimis queſtibûs aëra implentia, & jacturam cunctorum bonorum ſuorum amariffimîs lacrymîs deplorantia. Matres lethalibûs conficiebantur doloribûs, cùm viderent liberos ſuos

fame, sitique contabescere, aut exanguia ubera avidis quidem labellis, sed irritò conatu premere. Mariti verò: ne longam uxorum, proliumque suarum mortem coram intueri cogerentur: crudeli misericordiam adhi eos propriis manibus trucidarunt. Alii duos infantes in ulnis gestabant, alii humi prostrati extremos anhelitus reciprocabant, alii viribus defecti se miserandum in modum super terram volutabant. Paucis: Nihil hic erat aliud videre, quam supremam necessitatem, & desolationem, nec aliud audire, quam luctifonos gemitus, & remugientes ejulatus: hoc tragicò spectaculò novercantis fortunæ Religiosi viatores adeò commoti fuerunt, ut & ipsi totos fletuum rivulos effuderint. Et illi quidem afflictis pro viribus opitulari, eosque mellitissimis verbis consolari, ac denique ex modica annona, quam secum attulerant, largè illis succurrere cœperunt, sed cum viderent, penum suam esse longè tenuiorem, quàm ut tot famelicis

fa

saturandis sufficeret, cūmq; sibi prae-  
cordia rumpenda crederent, si diutius  
in contemplatione tam lugubris spe-  
ctaculi hærerent, ab eis tandem re-  
cesserunt, & per ingentes anfractus  
iter suum continuârunt. Quamvis  
autem hac ratione plūs quàm viginti  
milliarium circuitu fatigati fuerint,  
citatissimo tamen equorum cursu  
profecti iter suum intra triduum ab-  
solverunt, utpote qui sextâ Julii Fe-  
zium sub solis occasum ingressi sunt.

## CAPUT IX.

*Fezii inopinato eventu ab in-  
choanda Redemptione Captivorum impe-  
diuntur, unde re infecta Tetuanum profi-  
cisci coguntur.*

**I**Nflammata Patrum charitas, & ar-  
dentissimum eorum desiderium  
Redemptionem captivorum tandem  
aliquando auspicandi omnes compe-  
rendinationes in fastidio habuit. Ut  
itâque suæ incensæ cupiditatî quan-  
tocyus litarent, sequenti statim die  
in societate duorum illorum nobi-  
lium

lium Maurorum , quos comites in sua ultima peregrinatione habuerant, ad Pro-Regem se contulerunt. Huic postquam exposuissent, se à fratre suo, rege nimirum Mauritaniae, amplissima facultate donatos fuisse omnes captivos Christianos ubivis intra fines sui imperii existentes redimendi, rogaverunt, ut ejus bonâ veniâ, sibi liceret illos tres, & quadraginta captivos, qui Fezii in vinculis at-  
tinebantur, præsentî pecuniâ in libertatem asserere. Inveniebantur quidem in hac civitate alii captivi Christiani, sed ex illorum classe, qui vulgò *Bienvenidos* dicuntur. Ad hos verò redimendos Patres néque à S. Religione nostra, néque à Supremo Consilio Bellico licentiam habuerunt. Sunt autem hi *Bienvenidos* tales homines, qui propter sua crimina, & flagitia ad labores, in præfidiis pro qualitate delicti subeundos, condemnantur, ex quibus, si opportunam occasionem nanciscuntur, clam aufugiunt, & infidelium servituti ex hac  
dam-

damnabili intentione se datâ operâ subji-  
ciunt, ut tamquam captivi Chri-  
stiani postea à Patribus nostris redi-  
mantur, atque hac ratione non so-  
lùm poenas suis sceleribus debitas  
possint evadere, verùm etiam cum  
aliis redemptis captivis liberè in Hi-  
spaniam remeare, quod idem est, ac  
justitiam nasô aduncô suspendere.  
Nefas proinde foret, si pro impiis his-  
ce transfugis lytrum expenderetur,  
quod pro redemptione illorum in-  
feliciû destinatum est, qui aut ruri  
laborantes à piratis improvisa ag-  
gressione intercepti fuerunt, aut suo-  
rum negotiorum causâ mare persul-  
cantes in potestatem barborum præ-  
donum devenerunt.

Flagitiosi illi transfugæ, ut intel-  
lexerunt, quid Patres Redemptores  
molirentur, adeò exacerbati fue-  
runt, ut quatuor eorum effronti im-  
pudentiâ Pro-Regem accesserint, ei-  
démque stomachabundi dixerint:  
Meminisset, regem, fratrem suum  
non alia de causâ tot captivos Chri-  
stia-

stianos in sua ditione possidere, nisi  
 quia multi ex præfidiis ad Mauros  
 transfugiunt hac spelactati, se dein-  
 de Patrum Trinitariorum operâ re-  
 demptum iri. Quod si autem im-  
 posterum hæc spes eis præcideretur,  
 & illi soli liberarentur, qui in bello  
 capti, aut aliô inclementis fortunæ  
 ludibriô in potestatem Maurorum  
 devoluti fuerunt, futurum esse, ut  
 nemo amplius Christianorum, aut  
 certè pauci admodum ad ipsos trans-  
 fugiant, quod in grandem hujus regni  
 perniciem esset redundaturum, tum  
 quia milites in Christicolarum præsi-  
 diis nunquam amplius deficerent, tum  
 quia regnum ingenti pecuniâ, quæ  
 pro ipsorum redemptione aliàs expen-  
 deberet, hac ratione frustraretur.  
 Quantum autem regis intersit, ut  
 milites in præfidiis Christianis mi-  
 nuantur, & major quotidie pecuniæ  
 summa in suis provinciis expendat-  
 ur, neminem, ajebant, ipso per-  
 spicaciùs intellecturum. Hæ ratio-  
 nes visæ sunt Pro-regi adeò prægnan-  
 tes,

tes, & momentosæ, ut decreverit Redemptioni captivorum in urbe Feziana nunquam assentiri. Patres itaque allocutus dixit, ut Tetuanum reverterentur, sibi námque propositum esse de præsentī materia regis sententiam exploratiùs indagare. Incredibile dictū est, quantū PP. Redemptores tam insperatō Pro-regis mandatō perculsi fuerint.

Iste autem animum in hac sua resolutione adeò obstinârat, ut nullis precibûs inde dimoveri potuerit, quamvis Patres integrō octiduō nihil non egerint, ut ejus perversitatem emollirent. Tandem cū etiam duo illi nobiles Mauri, in quorum comitatu Patres Saviâ Fezium profectos fuisse diximus, preces suas in favorem Patrum interposuissent, pollicitus est, se quadraginta illos, & tres captivos, si rex eorum redemptioni non adversaretur, Patribus Tetuanum transmissurum. Cū verò rex eo tempore bellicis curis totus absorptus, & novis duntaxat expugna-

pugnationibus intentus esset, cætera omnia sùsque, deque habuit, ac propterea epistolam fratris sui ne responsò quidem dignatus fuit, ut proinde Patres, nisi tempus frustra Fezii terere voluissent, necesse haberint de reditu cogitare. Mutuís itaque lacrymís perfusi desolatissimis captivis valedixerunt, qui amarissimè deploraverunt, se malitià, & iniquitate falsorum Christianorum ad hanc calamitatem devolutos fuisse, ut licèt redemptionem suam præ foribus viderint, obsistente tamen nequitia patriotarum suorum ejus compotes fieri nequiverint. Hæc lugubris rerum facies Patrum corda adeò vulneravit, ut in effusissimas lacrymas eliquati fuerint, qui, quamvis corpore ab afflictis captivis recesserint, corde tamen, & animò eis conjunctissimi permanserunt.

Tali mœrore gravati decimâ quartâ Julii Feziò emigrârunt, & inter easdem difficultates, labores, ærumnas, ac terrores, quos in prioribus  
iti-



itineribus exantlaverant, post quinque dies Tetuanum pervenerunt, quam illi urbem decimâ octavâ ejusdem mensis alterâ ab occasu solis horâ ingressi fuerunt. Quamprimùm de adventu eorum V. P. Michaël à Virgine, qui Tetuani remanserat, certior factus fuit, cui hujus rei famam Maurorum quispiam, qui adventantes Patres fortuitò conspexerat, gratò nunciò detulerat, illicò exiliit, eisque obviam processit. Dici vix potest, quantum bonus ille, sanctusque senecio gestiêrit, cùm dilectos suos, desideratòsque sodales, de quibus per integros triginta quinque dies nihil omnino inaudiêrat, salvos, & incolumes coram intueretur. Eos igitur arctissimîs stringens amplexibûs domum deduxit, tantò lætior de eorum prospero adventu effectus, quantò tristior in eorum absentia fuerat, utpote qui de illorum salute hactenus semper grandem sollicitudinem gesserat, quòd satis nôsset, quanti discriminis res fuerit,

H

illis

illis exulceratissimis temporibus tam vastum regnum subire, & in medio barbarorum, ac infidelium versari. Omnes proinde SSS. Trinitati sacrificium laudis devotissimâ animâ immolârunt gratias agentes Omnipotenti Deo, quod eos â multissimis periculis clementissimè custodiêrit, & liberaverit. Cæterum cum tantis laboribûs exhausti refocillatione quadam indigerent, statuerunt nonnihil corpora confirmare, ut recreatis viribûs tantò alacrius, & ferventiùs redemptioni Captivorum incumberent.

## CAPUT X.

*De immani quadam persecutione, quæ contra Patres Redemptores excitata fuit.*

**M**Agnanimi hi, & impigri Christi athletæ post tanta pericula, terrores, & ærumnas non diu sunt feriatî; unica namque die corpori restaurando concessa protinùs manus

nus

nus operi redemptionis admoverunt; omnis enim mora, & comperendinatio in tali negotio eis multò gravior accidebat, quàm alia qualiscunque demum afflictio. Macti proinde animis vigesimâ Julii Gubernatorem accesserunt, atque ab eo licentiam inchoandæ redemptionis efflagitârunt. Gubernator respondit, ut tantisper ab hoc opere sibi temperarent, donec propositum eorum per omnem latè viciniam divulgaretur, ut omnes, quotquot in sua potestate captivos Christianos haberent, hac fama exciti Tetuanum convolarent, atque hac ratione Patribus redemptio facilior redderetur. Non displicuit Patribus prudens hoc Gubernatoris consilium, unde nonnihil expectandum rati, postquam omnes jam captivos Tetuani congregatos intellexissent, tertiâ tandem, & vigesimâ Julii principium eliberationi captivorum dederunt, in qua etiam nulum aliud senserunt impedimentum, nisi quòd Mauri, qui in Patribus mi-

rum quemdam captivos redimendi ardorem observabant, auctô nimis, & enormi pretiô mancipia sua venum obtulerint.

Toti itaque quatuor, & viginti dies elapsi sunt, antequam Patres de pretio pro centum viginti tribus captivis ( plures namque Tetuani, & in confiniis hujus urbis non reperiiebantur, alios verò quatuor eis Pro-Rex Fezianus postea transmiserat ) cum Mauris convenissent. Quibûs è tristissima servitute ereptis Patres Redemptores tantis gaudiis inceserunt, ut omnium calamitatum, quas in tribus tam molestis, & laboriosis itineribus sustinuerunt, prorsus obliti fuerint; adeò illis omnem præteriti temporis amarorem blandissima spes in Hispaniam proximè trajiciendi, & pauperes captivos in tuto collocandi edulcaverat. Sed quemadmodum aureus ille siderum Imperator crebriùs rutilante patagio amictus cursum suum auspicatur, postea tamen mutatô repenti consiliô atrabaticis in-

indutus in nigro quodam obscurarum nubium tentoriô meridiatur, ita & PP. Redemptores post serenissimam arridentis fortunæ auroram ex inopino se caliginosissima persecutionis tempestate involutos sentiunt; illi enim postquam rebûs omnibûs ritè peractis decimâ quintâ Septembris læti, hilarésque Gubernatorem urbis accessissent, atque ab eo copiam sarcinas suas convasandi, naves conducendi, & partem pecuniæ pro expungendis debitis in illa urbe contractis, Ceutâ afferendi flagitâssent, insperatâ repulsâ rejecti fuerunt. Quis crederet? Cùm viri illi religiosi sibi viderentur post tot superatas procellas amœnissimîs Zephyrîs in desideratum portum provehi, tanta subitò adversus illos tempestas exorta est, ut omnes ærumnæ, & afflictiones, quibûs hætenus per spatium tanti temporis jactati fuerant, novo huic turbini collatæ pro deliciis reputari potuerint; tanta scilicet rabie furor hujus persecutionis illos infestavit, ut nisi pro-

digiosè à DEO adjuti fuissent , humanis viribus inimicam vim decumanæ hujus calamitatis superare nequivissent. Totis siquidem sex mensibus perpetuis miseris , & angustiis conflictati fuerunt , quo tempore in singula fere momenta jacturam totius peculii , & vitæ expectabant , pauperesque captivos in pristinam servitutem denuò abripiendos metuebant. Res in hunc modum gesta fuit.

Gibilterræ Maurus quidam degebat , qui cum uxore sua , & parva filia nonum ætatis annum nondum egressa captus fuerat , & deinde propriâ pecuniâ sibi , suisque libertatem comparaverat. Ad hunc , cum in procinctu staret , ut Tetuanum revertetur , ingressus est quidam Minister , sive Officialis S. Inquisitionis , eique sub gravi interminatione prohibuit , ne filiolarum suarum in Mauritaniam secum asportaret , idque propterea , quòd certissimis relationibus compertum fuerit , puellam illam pia quadam in Christianam Fidem inclin-

na-



natione ductam crebriùs jam sacrum  
baptisma etiam in præsentia suorum  
parentum extrema ei omnia, & ip-  
sam mortem minitantium efflagitâs-  
se. Magistratus igitur suarum par-  
tium esse ratus tam sancto desiderio  
obstetricari, huic Officiali in manda-  
tis dedit, ut puellam illam infidelium  
parentum potestati exemptam in  
suam curam, & tutelam susciperet.  
Quo factò Maurus tanta indignatio-  
ne exarsit, ut nullam quietem sibi  
capere posse videretur, nisi hanc vio-  
lentissimam, ut ipse putabat, inju-  
riam ultus fuisset. Filiolâ itâque in  
manibus Christianorum relicta Te-  
tuanum unâ cum uxore eo prorsus  
tempore pervenit, quo Gubernator  
Patribus indulgit, ut pecunia, aliæque  
res necessariæ Ceutâ afferrentur.

Accidit itâque, ut eadem planè die,  
qua Patres hujus rei gratiâ in præsên-  
tia Gubernatoris versabantur, Mau-  
rus ille cum uxore sua discerptis, &  
cruentatis vultibus ad Gubernatorem  
ingrederetur, ac horrifono ejulatu,

multisque lacrymīs profusīs de injuria sibi in Hispania facta expostularet, peteretque, ut in vindictam tam iniqui raptūs Patres Redemptores, atque cum Patribus omnes redempti captivi tam diu Tetuani retinerentur, donec sibi filia sua restitueretur. Addidit deinde, se exemplò regem aditurum, eique totius rei seriem enarraturum.

Hac inexpectata propositione Patres haud vulgariter consternati fuerunt, utpote, qui non obscurè divinabant, se tam prosperum, ut ipsi optārant, reditum in Hispaniam non habituros, imò, & graviora fortassis, quàm quæ hætenus pertulerant, experturos. Nullum igitur non lapidem moverunt, ut irritatum illum Maurum, & ejus causā exulceratum nonnihil Gubernatorem placarent. Dixerunt itaque, in Hispania neminem Maurorum vī compelli ad amplectendam fidem Christianam, puellam proinde illam non alia de causa ibi detentam fuisse, quàm quòd ipsa pro-



propria sponte animum ad sacra Christiana appulerit. Nefas proinde esse, ut hujus rei causâ ipsi, & infantes captivi punirentur, cum in eis nihil resideat, quod huic culpæ affine sit. Verum quidquid illi dicerent, nihil exacerbatum animum Mauri genitoris mitigare poterat; quin imò audita hac justissima satisfactione ad instar lymphatici rabire cœpit, & scintillantibus oculis, inconditâque voce clamavit, se actutum ad regem profecturum, & non Hispanos tantum, sed & ipsum quoque Gubernatorem accusaturum, quod sibi in tam justa causa suô patrociniô adesse nolit. His verbis Gubernator haud mediocriter exterritus fuit, qui licet datam licentiam naves conducendi, & necessariam pecuniam afferendi minimè negârit, aut revocârit, tacitè tamen in animo suo decrevit, Patres cum redemptis captivis non prius dimittere, quàm vidisset, qualem exitum causa ista in tribunali sui regis sortita fuisset.

In his adeò dubiis, & perplexis circumstantiis Fr. Joannes à S. Augustino Ceutam concessit res ad iter necessarias præparaturus. Quamprimum autem eò pervenit, Marchioni de Assentar ex ordine narravit non solum ærumnas, & calamitates, quibus ipse cum Patribus Redemptoribus hætenus jactatus fuerat, verum etiam novissimam criminationem supradicti Mauri, ex qua Patres multò adhuc majora pericula, quàm quæ hucusque pertulerant, sibi impendere metuebant. Marchio, tamquam vir prudens, & in rebus barbarorum versatissimus, facile agnovit, hanc causam esse rem maximi momenti, ex qua non solum redemptis captivis, verum & ipsis quoque Patribus Redemptoribus summum discrimen creari posset. Impulsu itaque charitatis Christianæ actus, ut Patres ab imminente periculo vindicaret, statuit totius rei seriem penitissimè explorare, antequàm Fr. Joannes Tetuanum remearet.

Mi-

Misit igitur Gibilterram Dominum Didacum de Pinto, Equitem S. Jacobi, suumque (ut vocant) Adjutantem Generalem, eidemque præcepit, ut juridicè, sive viâ juris in hunc casum inquireret, & ipsam puellam, si nondum sacri baptismatis undis tincta fuisset, secum Ceutam deduceret, ut ibidem in præsentia suorum parentum, & agnatorum voluntatem suam publicè manifestaret. Dominus Didacus, ut Gibilterram tenuit, & intellexit, puellam illam nondum sacro fluentò ablutam fuisse, eam in societate quatuor Maurorum (quos testium locò secum adduxerat) accessit, blandissimèque salutatam rogavit, ut se quantocyus itineri accingeret, parentes namque illius Ceptæ multis monilibûs, & pretiosis vestibûs onustos ipsius adventum ibi opperiri, ubi, si vellet, liberè coram illis, & cæteris cognatis posset mentem suam in negotio Religionis explicare. Hoc audito parvula illa non infantili fervore respondit : *Ego patrem alium nullum*  
*agno-*

agnosco, quàm DEum, Cupio pariter non ob aliorum suasum, aut pollicitationes, sed propria voluntate sacrîs Christianis initiari. Hac responsione Arabicis litteris in codicillos relata, & quatuor illorum Maurorum sigillò firmata Dominus Didacus Ceutam reversus est non acceptâ secum puellâ, quæ animum suum in proposito fidei Christianæ amplectendæ adeò obfirmaverat, ut crebrius in præsentia aliorum Maurorum dicere audita sit, parentes suos in se pervertenda oleum, & operam ludere, sibi namque adeò fixum esse Christi fidem suscipere, ut si mille vitas possideret, eas potius libens, lubensque immolaret, quàm ut iterum ad suos genitores, aut pestiferum Mahometis dogma revertèretur. Audiant hæc, & erubescant versatiles illi Vertumni, qui ab agnita semel fidei veritate aut minis exterriti, aut promissis illecti facile deficiunt, aut eam perpetuò animarum suarum dispendiò amplecti negligunt.

Hac

Hac tam insigni attestazione instructus Fr. Joannes, assumpta secum etiam majori parte desiderati lytri, in conductis navibus Tetuanum repetiit. Quò cùm pervenisset, quin indicium aliquod de allata attestazione prodidisset, in societate reliquorum Patrum ad urbis Gubernatorem se contulit, cui Patres officiosissimè valédixerunt, ac licentiam in Hispaniam navigandi flagitârunt. Iste autem, quin conceptam de patre neophytæ puellæ (à quo apud regem, si Patres dimitteret, se accusandum formidabat) suspicionem manifestaret, causatus est, id tam properè nondum fieri posse, donec parva quædam navigia, & ingens plaustrorum frequentia, quæ paulò ante regis jussu Arcilam abierant, inde reversa fuissent, quod tamen, ut ipse dicebat, post aliquot dies futurum esset. Sed eventus probavit, ab eo hanc calvam excusationem ideo duntaxat allegatam fuisse, ut bonis Patribus palpum obtruderet, cùm plures quàm triginta  
dies



dies elapsi fuerint, quin Gubernator Patribus copiam discedendi facere vellet.

Isti verò tantis comperendinationibus fatigati non desinebant quotidie Gubernatori occinere, hanc moram sibi esse longè perniciosissimam, quòd in sustentatione tot captivorum sumptus in immensum excrescerent, & naurus pro conductis navibus dietim augeretur. Vellet proinde eis desideratam discedendi facultatem concedere, præcipuè cum navigia illa, & plaustra, in velamen hujus detentionis tam speciosè prætensa, non solum Arcilam pervenissent, verum etiam jam diu inde reversa fuissent. Ast surdo fabula cantabatur; Gubernator enim ingratum cras crocitando semper negabat, id sibi hodie integrum esse, donec tandem post decursum duorum, & triginta dierum Patres ad se ultrò accersivisset, eisque exposuisset, Maurum illum neophytæ puellæ parentem de illata sibi in Hispania violentia querimoniam apud  
re-

regem movisse, hunc autem severissime præcepisse, ut Patres tam diu Tetuani detinerentur, donec adolescentula illa, sive sacro fonte regenerata jam fuisset, sive non, genitori suo restituta esset : Viderent proinde, quid agerent, sibi namque nefas esse vel lato ungue à mandatis sui regis desciscere. Hoc tam rigidum præceptum barbarus rex idcirco Gubernatori Tetuano transmiserat, quòd Maurus ille apud regem conquestus fuerit, filiam suam esse adeò juvenem, & impuberem, ut ex defectu ætatis inter unam, aut alteram Religionem discernere nequiret, atque adeò nec unam præ altera eligere valeret. Tunc sibi demum Fr. Joannes opportunum tempus nactus fuisse visus est, attestatorem illam, quam ad hanc usque diem clam asservaverat, in lucem producendi. Hanc itaque è sinu deprompsit, eamque manibus Gubernatoris tradidit, qui illà perlectâ negavit, eam ritè confectam fuisse, deesse ei siquidem præcipuas quasdam

dam circumstantias, quas ipse additurus esset.

Fingi non potest, aut cogitari, minùs dici, aut litteris describi, quanto mœrore afflicti illi, & itineri inhiantes Patres hac inexpectata Gubernatoris responsione oppleti fuerint. Qui cùm perpensis omnibùs nullam viam cernerent, quã se ex anfractibus hujus labyrinthi extricarent, statuerunt demum ultimum remedium apprehendere, & regi efficacissimis litteris perscribere detentionem illius adolescentulæ sibi minimè esse imputandam, se nãmque eo tempore in regno ejus versatos fuisse, quo casus iste in Hispania contigerat. Rogabant prætereà, ut rex expensa serió multitudine miseriarum, & ærumnarum, quas hætenus pertulerant, & magnitudine sumptuum, quos in tot mensibus expenderant, Gubernatori Tetuano mandare dignaretur, quatenus ipsos cum redemptis captivis, sinè impedimento aliquo in Hispaniam trajicere pateretur; alioquin enim



enim futurum esse, ut nulli amplius Religiosi redemptionis causâ Mauritaniam ingrederentur, quod in magnum hujus regni detrimentum esset cessurum, ut sua Majestas haud obscure cognoscere posset.

Hanc illi epistolam per Maurum quemdam probatæ fidelitatis regi transmiserunt. Quamvis autem iste, ut erat Patribus mirè addictus, nulli industriæ pepercerit, ut eam quàm celerrimè ad regem perferret, responsum tamen, cùm rex in extremis sui imperii partibus moraretur, post quadraginta dies primò Tetuanum pervenit. In hoc ille Gubernatori præcepit, ut Patres citra ullam dilationem, aut tergiversationem liberos in Hipaniam abire sineret, satisfactum sibi esse dicens, juridica illa attestazione, quæ ad se perlata fuerat. Tam propitia responsione obtenta Patres quidem impendiò gavisi fuerunt, sed cùm Divinæ Majestati placuisset eorum patientiam magis adhuc in cote adversitatum

exacuere, factum est, ut uno tyranno mitescente, alter superbiâ inflatus ferociret, & faventissimam hanc epistolam suo effectui frustraret. Gubernator enim hoc regis responso irritatus reposuit, fieri non posse, ut hac in occasione regis sui mandatis morem gereret, utpote qui non alia de causa tam favorabiles litteras expedivisset, nisi quòd rerum veritatem nondum satis edoctus, nec de omnibus circumstantiis ritè informatus, sed veteratoriis relationibus circumventus fuisset. Necessarium proinde esse, ut Maurorum aliquis denuo Gibilterram destinaretur, qui rei gestæ seriem sub illis circumstantiis investigaret, quas ipse erat præscripturus. Quis sensus ad hæc bonis Patribus fuerit, qui avidè singulis momentis discessum urgebant, & toties tam importunis remoris sufflamabantur, putari facilius, quàm verbis exprimi potest. Cæterùm cum nulla alia evadendi via suppeteret, assensi sunt tandem, quamvis inviti, Gubernato-

natoris postulatis, & in hunc finem propriis sumptibus Maurum quemdam Gibilterram ablegârunt, ut ibidem juxta conditiones à Gubernatore præscriptas, rei veritatem indagaret.

Maurus ille, quam primùm Gibilterram attigit, omnes protinus Mauros in ea urbe tunc temporis existentes congregavit, ut confederatis consiliis, & junctâ industriâ totum hunc casum quàm accuratissimè rimaretur. Illis itaque in unum coactis, jussit advocari puellam, eamque cunctis audientibus interrogavit, utrum ab avita parentum suorum fide desciscere vellet ( nondum enim salutari baptismatis undâ expiata fuerat ) & an obstinata mente fidem Christianam suscipere constitueret? Puella nihil tot Maurorum ( tres enim, & viginti utriusque sexûs eam circumstabant ) præsentia turbata, imperterrita prorsus vultu respondit: Desinite supervacaneis quæstionibus vosmetipsos fatigare; mihi namque adeò certum est in confes-

sione fidei Christianæ persistere, ut nullis minis, precibus, promissis, aut tormentis me ab illa avelli patiar. Et ô utinam feliciori memoriâ prædita essem, dudum S. Baptismatis gratiam consecuta fuisset, sed quia hætenus doctrinæ Christianæ capita nondum integrè comprehendi, ideo mihi tantum bonum dilatum est, quod me tamen proximè consecuturam confido. O insignem, & adamantinis litteris scribendam responsum! quis non obstupescat in tantilla puella tam immobilem fidei constantiam, quæ neque blanditiis, neque minis, aut terroribus superari potuit! Hæc verba sanctis Angelis in cœlo novum peperere gaudium, Christianis honorem, & infidelibus Mauris confusionem.

Confessio, & responsio hujus magnanimæ puellæ à præsentibus Mauris litteris consignata, eorundemque sigillò munita Tetuanum Gubernatori transmissa fuit. Sed cum stygius ille cæraestes nullum non lapidem

dem moveret, ut pauperes captivos, atque cum illis ipsos etiam Patres Redemptores in profundum desperationis, aut certè magnæ cujusdam impatientiæ præcipites ageret, Gubernatori suggessit, ut hanc informationem, & attestationem tamquam non satis idoneam rejiceret, idque propterèa, quòd una ex illis circumstantiis, quas ipse addiderat, omiſſa fuerit. Ille siquidem præceperat, ut hæc catechumena adolescentula potestati illius, à se transmissi Mauri traderetur, & in manibus ejus totis sex diebus relinqueretur, quin hoc tempore alicui Christianorum fas esset illam videre, aut alloqui, deinde verò in præsentia multorum Maurorum interrogaretur, an fidei Christianæ nomen dare vellet. Hæc autem conditio in Hispania admissa non fuit, cùm satis constet, Mauros præ cæteris mundi nationibus esse magiæ studiis infames, qui proinde; Si puella ejusdem potestati concedita fuisset, magicis fortassis arti-

bûs hoc tempore effecisset, ut puella incantationibûs, aut præstigiis dementata illi deinde pro libitu ejus respondisset. Cùm autem hæc circumstantia, quæ in opinione malevoli Gubernatoris principem locum obtinebat, neglecta fuerit, ille disertè protestatus est, fieri aliud non posse, quàm ut hoc totum negotium denuo regi proponatur, quidquid moesti Patres é diverso opponerent, quos sumptuum quotidie magis excrecentium moles anxios admodùm, & sollicitos reddiderat.

## CAPUT XI.

*De aliis duabus horrendis persecutionibus, quæ contra Patres Redemptores suborta fuerant, & de Captivitate V. P. Joannis.*

**H**Is angustîis obsessi Patres communibûs votis decreverunt, ut unus ex illis regem adiret, ubicùmque demum ille versaretur; aliud namque medium nullum eis videbatur reliquum quàm ut hunc  
Princi-

Principem fidei , regiô suô verbo datæ , commonefacerent , eundémque rogarent , ut conversionem illius juvenculæ in meliorem partem interpretaretur , ipsósque , qui ad eam nihil contulissent , inson-tes esse pateretur. Ardua hæc provincia Fr. Joanni à S. Augustino , tamquam viro , Mauris ex frequen-tiori contubernio familiariter no-to demandata fuit , qui etiam promptè se obtulit ad omnes ærum-nas , & calamitates perferendas , ut redempti captivi tam effliâtim exam-bitam libertatem tantò velociùs con-sequerentur. Tetuanô itâque in so-cietate illius Mauri , qui Gibilterræ informationem de puella confecerat , egressus decimâ septimâ Octobris in viam se dedit assumpto secum pa-riter uno ex redemptis captivis , qui regionum illarum peritior esse pu-tabatur. Biduum jam in itinere exe-gerant , dum ex singulari Dei dispo-sitione in quemdam à fide Christia-na apostatam (Renegatos ibi vocant)

eius nomen erat Brachman, inciderunt. Hic, qui præcipuum quemdam gratiæ locum apud regem tenebat, & ab eo negotiis marinis cum potestate præfectus erat, ut intellexit, cuius rei gratiâ ipsi ad regem proficiscerentur, dixit eis, ut Tetuanum reverterentur, se namque regiis litteris instructum esse, quibus mandabatur, ut Patres cum redemptis captivis illico dimitterentur, quamprimùm ipse Tetuanum esset perventurus, uno tamen ex nobilioribus captivis retento, qui obsidis locò tam diu in urbe remaneret, donec causa illius puellæ perfectè decisa, & explorata fuerit. Hòc illi Mercuriò læti Tetuanum repetierunt sortem suam præprimis sibi gratulantes, quòd à Renegato illo, ut faciliè fieri potuisset, in via non aberraverint, sed eum opportuno adhuc tempore offenderint, qui postquam urbem illam ingressus fuisset, Gubernatori regis mandatum exposuit:



fuit: Quo audito, respondit iste, se regis imperio obsecuturum.

Cùm itaque Patres Redemptores perspicuè agnoscerent, hanc unicam viam esse, per quam gravissimas illas, sibi que perpetim succedentes tribulationes, quibûs jam totis octo mensibûs maximô suô dispendiô conflictati fuerant, evadere possent, regis tandem mandato, quod Renegatus ille secum attulerat, obsecundare decreverunt, atque adeò voluntati Gubernatoris commiserunt, ut aliquem ex captivis pro suo arbitratu obsidis locò eligeret. Hic demum videre licebat amœnissimam quamdam jucundissimi spectaculi scenam, captivis certatim hanc periculosam aleam prehensantibûs, & in aliorum vincula suffici cupientibûs, ut suo discrimine reliquorum incolumitati consulerent. Acriùs tamen multoque ferventiùs hanc ancipitem Provinciam sibi quisque Patrum Redemptorum deposcebat, qui suo muneri id annexum esse asserebant, ut suis

periculis captivorum salutem in tuto collocarent. Adversante tamen Brachmano preces eorum irritæ fuerunt, is enim dicebat, rem fore nefandam, si aut regis mandatum privatorum hominum audaciâ immutaretur, aut illi in captivitatem redigerentur, quorum libertati rex verbi sui inviolabili majestate caverat. Elegerunt itaque ex redemptis captivis fratrem quemdam laicum S. Ordinis Prædicatorum, Michaëlem Garasco dictum, cujus redemptio Patribus nostris plurimi steterat. Hunc illi obsidis partes expleturum à reliquorum turba volentem sanè, & gaudentem sequestraverunt, utpote qui S. Patriarchæ sui Dominici spiritu, & exemplô inflammatus semetipsum sæpiùs ad perpetuam captivitatem obtulerat, ut suis vinculis cæteros à miserrimo hoc fortunæ ludibrio eriperet.

Quamvis autem hætenus gravissimis æumnis exagitati fuerint, placuit tamen Divinæ Majestati, ut  
ad-

adhuc majoribûs arietarentur, & extremo discrimini eo tempore admo-  
verentur, quo putârant, se jam in  
portu navigare, omnibûsque difficul-  
tatibûs complanatîs nihil aliud super-  
esse, quàm ut sarcinas colligerent,  
& felicibûs auspiciis in viam se da-  
rent. Nam cùm rebûs ritè compo-  
sitîs Gubernatorem accessissent, eique  
religiosum fratrem illum Dominica-  
num tradidissent, quem barbari pro  
obside elegerant, ac deinde faculta-  
tem emigrandi postulâssent, nova  
rursus echeneide impediti fuerunt,  
Gubernatore dictitante, id ante de-  
cursum quatuor, vel sex dierum fieri  
non posse. Et ille quidem Patribus  
tam inexpectatæ, novæque detentio-  
nis causam aperire noluit, quam nos  
tamen huic loco inferemus, idque  
eo maximè consilio, quòd propter  
eam tales postea eventus emerferint,  
ut non solum Patres de vita, & li-  
bertate sint periclitati, verùm etiam  
tota redemptio in supremum discrimen adducta fuerit.

Causa

Causa itaque, cur Patribus Redemptoribus hoc novum sufflumen injectum fuerit, ita erat comparata. Eo tempore, quo Patres reditum in patriam maturabant, Hispanus quidam mercator prægrandem cybeam vitis mercibus onustam Tetuanum advexerat. Hic, ut iniquitas semper est suspiciosa, pessima sibi quæquæ ominari cœpit, si Patres, aut captivi discessum ejus anteverterent, veritus nimirum, ne si damnabile ausum ejus Ceutæ innotesceret, Gubernator illius præsidii aliquot naves bellicas expediret, quæ ipsum interciperent, & ad poenas tantæ temeritati debitas exsolvendas adducerent. Tetuanicum igitur Gubernatorem adivit, eoque splendidis muneribus, splendidioribusque pollicitationibus in suas partes traducto, evicit, ut Patres cum captivis non prius dimitterentur, donec ille flagitiosissimum suum mercimonium ad calcem perduxisset. Me miserum! Reperiuntur etiam Christiani, qui solo

lo nomine tales sunt, re ipsa autem infidelibûs deteriores, utpote qui multò studiosiùs privatis suis lucris, quàm communi orbis Christiani bono invigilant, ac propterea religioni sibi non ducunt cum Paganis illicitos contractus pacisci, qualiter fecit navarchus iste, de quo impræsentiarum loquimur, qui per illud tempus, quo Patres Tetuani morabantur, ter Gadibûs Tetuanum trajecit, & non solùm varias illicitas merces, verùm etiam fugitivos Mauros, qui Christianorum dominorum potestatem evaserant, secum attulit, ex quibus ille quinque, cùm secunda vice Tetuanum appulisset, secum adduxit, quorum unus jam ex compacto destinatus fuerat, ut cum captivo Christiano permutaretur, sed obfistente scelestissimi hujus Christiani impietate effectum est, ut Maurus liber evaderet, pauper, verò Christianus grandî lytrô redimendus fuerit.

Damnum, quod pessimus iste mercator sacrilegâ suâ perfidiâ Redemptio-

tioni intulit, adeò magnum fuit, ut hæc post exantlatas innumeras jam calamitates in summum periculum conjecta sit, ut ex sequentibus patebit; Etenim cum Patres hominis hujus causâ Tetuani moras traherent, quidam Maurorum porrecto libello supplicii apud regem conquesti sunt, captivos Mauros in Hispania extrema crudelitate tractari, adeò ut duodecim nobiles, qui non ita pridem in manus Hispanorum inciderant, eorum sævitie ad triremes fuerint condemnati, ubi vitam agerent omni morte amariorem. Rex hunc nuncio accepto impotenter excanduit, statimque Gubernatori Tetuanico mandavit, ut si Patres cum captivis nondum in Hispaniam remeassent, tamdiu attinerentur, donec duodecim illi nobiles, & remorum laboribus addicti Mauri libertati restituti fuissent. Hic demum clarissime elucescit, in quanta mala sacrilegus ille navarchus totam Redemptionem præcipitaverit, quæ, nisi ejus maledicta

dicta avaritia intercessisset, pridem jam Hispaniam repetiisset, omnesque ærumnas evasisset, quibûs postea miserandum in modum conflictata fuit.

Quid terroris, & doloris Patres æquè, ac redempti captivi ex tam inopinata relatione contraxerint, solus ille optimè agnoverit, qui prælongam superiorum miseriarum catenam ritè perpenderit. Videbant se miseri illi in turbulentissimum sexcentorum periculorum mare reiectos, dum jam in litus se crederent enatasse. Videbant se præsentissimæ captivitatis discrimini expositos ob impossibilem ferè restitutionem illorum Maurorum, qui in servitio Regis Catholici desudabant; licèt enim Consilium Bellicum huic barbari regis postulato annueret, & præcipitatâ diligentia captivorum Maurorum liberationi consuleretur, facile tamen agnoscebant, id ante decursum unius, vel alterius anni præstari non posse, cùm regiæ triremes mox in hac, mox in alte-

altera urbe, mox in Hispania, mox in Italia, mox in Europa, mox in America versari soleant, ut proinde ad tantum negotium conficiendum longissima temporis spatia requirantur. Quid facerent autem ipsi, si tamdiu Tetuani subsistere cogerentur? Unde sumptus pro tot capitibus alendis eruerent, qui aliunde tam prolixo decem mensium intervallò, quo in Africa detenti fuerant, ad incitas propè devenerant.

Patres itaque ad preces conversi Tetuanicum Gubernatorem rogabant, ut sua præpotente intercessione apud regem interposita efficeret, quatenus uni ex Patribus cum redemptis captivis in Hispaniam trajicere liceret, qui omni conatu, & industriâ liberationem Maurorum urgeret, cæteri verò cum fratre Dominicano tamdiu Tetuani remanerent, donec hoc negotium ad optatum finem perductum fuisset. Hoc ut facilius, certiùsque impetrarent, Gubernatori, cujus magna avaritia eis minimè erat



erat incognita , ducentos *Pesos* , qui in nostra moneta quadringentos florenos conficiunt , liberali donô obtulerunt. Et iste quidem pecuniam alacriter accepit , regique , ut rogatus fuerat , scripsit , sed insolentissimus tyrannus barbaro prorsus fastu negavit omnia. Profectò , qui in lectione hujus tragoediae compassionis sensu non tangitur , tigridis , & non hominis viscera habeat , necesse est.

Divina Majestas , quæ sibi mirificè in patientia fervorum suorum complacebat , eis quotidie cumulatiores occasiones hujus virtutis exercendæ submisit , ut illi tantò plures , & splendiores in cœlis coronas texeret. Eodem siquidem tempore , quo regis responsio avidissimè expectabatur , dæmon Gubernatori Tetuanico suggessit , ut à Gubernatore Ceutano quinque florenorum millia exigeret , quæ iste ab antecessore ejus , cujus opes barbari regis jussu fisco addictæ fuerant , mutuò acceperat. Néque hac exactione contentus postulavit præte-

rea nobiles quosdam Mauros, agnatos nimirum cujusdam Mahamen Anicasis, qui à tyranno defecerant, & Ceutam confugerant, sibi tradi. Primo postulato Gubernator Ceutanus utcunque satisfecit, exhibitâ nimirum apochâ, sive chirographô sui antecessoris, quo is sibi debitum integrè persolutum fuisse, testatus est. Ad alteram petitionem respondit, nobiles illos Mauros, qui ad protectionem Regis Hispaniæ convolârunt, hoc ipso facto sibi obligationem imposuisse, ut illos contra omnes adversarios eorum tueretur : Nefas proinde foret, si illos manibus suorum hostium traderet, qui sub alis tanti Monarchæ refugium quæsierunt.

Hôc responsô Tetuanum perlatô, & fama deinde increbrescente, ac si neophyta illa puella Gibilterræ baptizata fuisset, tota civitas contra Patres, & captivos exarsit. Ipse Gubernator invulgus sparfit, Patres æquè, ac captivos libertate excidisse, eisque auctoritatem verbi regii nihil ampliùs pa-

patrocinari. Incredibile dictu est, quantas hoc tempore injurias, afflictiones, & molestias Patres patienti stomacho concoxerint. Furor Maurorum eousque jam progressus fuerat, ut sannis, contumeliis, & sarcasticis dictis Patres data opera ad iram provocarent, quatenus, si commotius aliquod verbum proferrent, aptam occasionem adipiscerentur, illos crudelissime affligendi, aut etiam trucidandi. Accidit fortassis, ut Fr. Joannes à S. Augustino in area domus Mahometis Benzudæ (cujus mentio crebrius jam facta fuit) confisteret, & opportunitatem aliquam cum hoc nobili Mauro loquendi capteret; iste siquidem unicus erat clypeus eorum, quo se contra insultus insanientis plebeculæ nonnihil tutabantur. Ergo dum ibi moras necit, salivam ex ore presentibus, & videntibus aliis Mauris in terram eiecit, quin recogitaret, turpe, & probrosum inter Mauros haberi, aliis presentibus expuere. Illi igitur, qui

hoc conspexerant, se grandî ignomi-  
niâ affectos fuisse putârunt, atque  
adeò irâ flammidi, & furore ebrii in  
miserum illum fratrem factò agmine  
irruerunt, eúmque non solùm fusti-  
bûs, & pugnîs impetierunt, verùm  
etiam frameam strinxerunt, ut ei ca-  
put, aut certè manum aliquam ampu-  
tarent, nisi iste præpete fuga crude-  
les eorum conatus antevertisset, exi-  
guò tamen suò compendiò, utpote  
qui è domo illa eluctatus totam tur-  
bam promiscuæ plebis offendit, quæ  
eum lapidibûs, & lutò excepit, ipsîs  
etiam foeminîs, & puellîs in societa-  
tem armorum advolantibûs, & fugi-  
tivum religiosum sexcentîs injuriis  
persequentibûs, donec tandem ma-  
nus eorum evasisset, & ex hoc lapi-  
deo nimbo, decumanâque tempesta-  
te probè contusus emerisset tectò  
propriò receptus.

Deplorata itâque omni ope huma-  
na Patres toto corde conversi sunt  
ad Divinum auxilium exorandum.  
Totam illam noctem in oratione per-  
vigi-

vigiles transegerunt, Deúmque enixis precibûs obsecraverunt, ne iniquitates eorum respiceret, sed potius infinitæ suæ misericordiæ recordaretur, & afflictis captivis sua paterna manu succurreret, qui tristitiâ, & pusillanimitate perituri erant, nisi maturata ope recrearentur. Confugerunt pariter ad intercessionem gloriosissimæ Virginis Mariæ, atque huic clementissimæ Reginæ curam pauperum captivorum impensius commendârunt, Patribus enim jam vires defecerant, quæis tam immanem persecutionis molem diutiùs fulcirent, nec consilium aliquod eis suppetebat, quo se ex tam perplexis calamitatibus extricarent.

Inter has curas caligo quidem obscuræ noctis evanuit, & aurora punicantibûs phaleris roseum quatiens lacertum orbi invecta est: Patres tamen adeò densis tristitiæ nubilis involuti manserunt, ut nullus alterum vel unicô verbulô compellaret: obversabatur nimirum eorum oculis,

se in hac domo non aliter, quam in carcere quodam attineri, captivos autem unguibus carnivororum luporum expositos esse, nullamque viam suppetere ex tantis malis eluctandi. Quæ consideratio tanto eos mœrore replevit, ut ne januam ædium suarum referare, minùs pedem domo proferre præsumpserint. Ad extremum tamen hæc immanis tempestas deferbuit, idque modò adeò insperatò, ut quasi manibùs palpare potuerint, eum cœlitùs submissum fuisse. Eo siquidem tempore, quo, ut diximus, ne fores quidem pandere audebant, nec rationem ullam dispiciebant ex tantis periculis emergendi, benignissimus DEUS eis optatissimum quoddam solatium suppeditavit.

Venerat ad domum eorum ( quæ adhuc seris, vectibùsque occlusa erat ) nobilis ille Maurus, Mahomet Benzuda dictus, qui Patres ex eo tempore, quo in illorum societate duplex iter emensus est, fovere, & observare nunquam desit. Hic, ut in ædes  
eo:

eorum admissus fuit, & ingentem Patrum tantis fortunæ ludibriis exagitatorum desolationem agnovit, decumanas eorum calamitates miseratus ultrò promisit, se regi pro ipsorum indemnitate scripturum. Et ut illos alacriores efficeret, in hac ipsa Patrum domo litteras composuit, easque per fidum portitorem ad regem transmissit. Persuasit deinde Patribus, ut secum per plateas ambularent, quos in ædes suas deduxit, & proluxa humanitate suo convivio adhibuit, quod illis quidem tantò accidit gratius, quantò majori fame pressi fuerant, utpote qui jam totis viginti quatuor horis ne bolum panis degustaverant. Responsio regis aliquantum dilata fuit, Mauri tamen jam non amplius tam effrenâ licentiâ in eos bacchati sunt, cum viderent à nobili illo, & præpotente Mauro Patres in patrocinium, & tuitionem susceptos fuisse. Rescriptum regis hac vice ad vota Patrum expeditum fuit, in quo mandabatur Gubernatori, ut totam Re-

demptionem citra ullam dilationem in Hispaniam dimitteret. Scripsit etiam ad ipsos Patres duas epistolas, alteram quidem in Arabica, alteram, verò in Hispanica lingua, in quibus se ignorantia præcipuarum circumstantiarum excusavit.

Mahomet Benzuda, quamprimùm has litteras accepit, illico ad Patres se contulit. Quos, ut vidit, læta voce exclamavit : *Jandulila*, quod in lingua Arabica idem sonat, ac *Laudetur DEUS*. Patribus causam insolitæ hujus lætitiæ percontantibus porrexit duas, quas à rege suo acceperat epistolas, ex quibus illi alteram, quæ Hispanico erat idiomate perscripta, avidis statim oculis percurrerunt. Series illius talis erat : Hodie, die Veneris, cum Fezium pervenissem, intellexi, vos adhuc Tetuani hæreret. Admiranti mihi, & insolitæ hujus moræ causam inquirenti, nemo erat, qui respondere posset. Hoc itaque si ex vestra voluntate factum est, & causæ vobis suppetunt, quæ vos Tetuani



tuani detineant , non sum contrarius; Si verò ab aliquo meorum Officialium vobis impedimentum injectum fuit , vobis præfenti epistolâ copiam facio discedendi, quando volueritis, & quò vobis placuerit. Quamvis enim non eam inficiàs, nostram justitiam mandâsse, ut puella illa, quæ in Hispania Christianis sacris initiata fuit, restitueretur, regii tamen verbi mei auctoritas, qua vestræ incolumitati cavi, omnes in oppositum militantes rationes convellit. Hoc est, quod vobis semper servare intendo. De hoc securi esse poteritis: benè valete.

Faventissimò hoc regis rescriptò crecti Patres decreverunt, ut V. P. Joannes à JESU Maria citato itinere Ceutam contenderet, atque inde necessarias pro transfretatione naves, nec non octodecim florenorum milia secum adduceret, quibûs opus habebant tam pro exsolvendis captivis, quorum libertatem nondum integrò lytrò redemerant, quàm pro diluendis debitis, quæ tam prolixâ

morâ contraxerant. Huic pariter præstitutus fuit dies, & locus, ad quem cum navibus, & pecunia venire deberet. Locus autem ille, Almunecar dictus, proximè Tetuanô aberat conscendendis navibus valde opportunus, in quo Patres Redemptores, captivi, & Mauri, qui nondum persolutum lytrum reposcebant, se præfixo die adfuturos condixerunt. Omnia jam prosperis favoniis ad desideratum finem currere videbantur. Verùm Divinæ Majestati placuit illos nova calamitate visitare, ut V. Patri nostro Joanni prolongato quodam martyrio nobiliorem coronam adornaret.

Constituta siquidem die tota Redemptio cum omnibus Mauris quorum intererat, ut adessent, in destinato loco comparuit. Redempti captivi omnes secum sarcinas advexerant, tamquàm protinùs naves essent conscensuri, & barbaricis illis terris æternùm valedicturi. V. P. Joannes Ceutæ residuum à suis nego-

go-

gotiis tempus concionando transegerat, & affluentem populum fervidis suis, & Apostolico spiritu plenis sermonibus, amore Dei, ac perfectioris vitæ desiderio inflammaverat, secundissimis semper auribus, & festivo applaudentis populi murmure exceptus. Et ille quidem non modo in Ecclesiis, verum etiam in compitis, & triviis Verbi Divini semen-tem spargere solebat tantò famæ præconiò, ut & ipse quoque urbis Gubernator, Marchio de Assentar, cum toto præsidio militari cupidè advolaret, ejusque dictiones sitibunda prorsus aure exhauriret.

Hic itaque V. Pater, ut inter eos convenerat, duabus navibus conductis, assumptaque secum necessariâ pecuniâ, Ceutâ solvit, ut opportuno tempore locum constitutum attingeret. Verum subortâ repente malaciâ adeò retardatus fuit, ut licet nautæ totis viribus in remos incumberent, naves tamen integrò noctis spatiò ulteriùs provehere nequiverint, quàm ad lo-  
cum

cum quemdam, ab accolis *Botinan* vocitatum, ubi litus sinuato cornu nonnihil in mare procurrit. Hic postquam diluxit, viderunt tres phaselos piraticas, & totidem triremes prægnantibus carbasis appropinquare, quas, ut Algerinas esse agnoverunt, conati sunt utramque navim ad terram propellere, casso tamen successu; piratæ siquidem, qui explosis bombardis, & tormentis æneis eos persequiebantur, tanta celeritate illos sunt affecuti, ut Christiani, qui rapaces hos accipitres effugere voluerunt, coacti fuerint undas infilire, ut tantò citiùs ad terram pervenirent, ex quibus tamen multi submersi naufragium ibi invenerunt, ubi salutem quæsièrant, alii verò luctatam cum fluctibus vitam ægrè in ripam extulerunt.

Ex illorum numero, qui saltu in mare dato ad litus enatârunt, fuit etiam V. P. Joannes, qui licet terram attigerit, totâque nervorum contentione manus piratarum effugere studuerit, madido tamen habitu

tu suo impeditus, & viribûs destitutus subsequenter barbaris in prædam cessit, á quibus in terram dejectus, & crudeli fustigatione contusus, per barbam tandem ad mare raptatus fuit, ubi piratæ eum scaphæ imposuerunt, ac deinde in navim onerariam transposuerunt. Videtur autem ex singulari Dei providentia, quæ servum suum ad longè illustriorem laureolam prædestinaverat, factum fuisse, quòd in ea occasione vitam non amiserit, licèt enim pallium ejus, vestisque religiosa sedecim glandibûs plumbeis, quas furibundi prædones in fugientem excusserant, perforata fuissent, nulla tamen illarum corpus ejus penetravit, aut damnum aliquod intulit. Atque hac ratione V. P. Redemptor Joannes cum aliis multis Christianis, & cum tota pecunia, quam secum Ceutâ asportaverat, quæ, ùt diximus, summam octodecim millium florenorum æquaverat, captus, & in potestatem Paganorum devolutus fuit. Qua præ-

dâ

dâ exhilarati piratæ Algerium reper-  
tierunt, quos interea cum captivo  
P. Joanne navigare sinemus, nos  
autem succincta narratione nunc ex-  
ponemus, quid alii duo Patres Re-  
demptores egerint.

Nihil sanè tristius, aut acerbius  
homini accidere potest, quàm alie-  
nam calamitatem intueri, & velle  
quidem, sed non posse mederi. Id  
prolixè experti sunt residui duo Pa-  
tres Redemptores, qui cum redemp-  
tis captivis, multisque aliis Mauris  
hanc lugubrem tragædiam à longe  
spectârunt, & periclitanti Patri Joan-  
ni, quamvis maximè voluerint, opem  
ferre nequiverunt. Hôc tragicô spec-  
taculô visô omnes extremo mœrore  
oppressi fuerunt, singulîs in commu-  
ni luctu privatam ærumnam deplo-  
rantibûs. Patres deflebant captivi-  
tatem charissimi sodalis sui, aliorûm-  
que Christianorum, Mauri jacturam  
expectatæ pecuniæ, redempti cap-  
tivi novam dilationem suæ libertatis.  
Verbô; Omnia ibi tristissimîs singul-  
tibûs,

tibûs , & gemitibûs personabant. Quis hîc erit adeò disertus , ut afflictionem , & angustias PP. Redemptorum pro dignitate enarrare valeat? qui cùm tam procellosum calamitatum mare sese jam enavigâsse putarent, novîs subitò adversitatum fluctibûs in multò majores terrores , & pericula se rejectos viderunt.

## CAPUT XII.

*Qualiter hæc periculosa Redemptio tandem in Hispaniam sit eluctata.*

CAPto in hunc modum V. P. Joanne cum tota pecunia , reliqui duo PP. Redemptores anxii admodum , sollicitique remanserunt, quòd nunc multò majoribûs se molestiis & comperendinationibûs conflictatum irimetuebant, quàm quibûs hætenus exagitati fuerant. Ut igitur semel ex hoc immenso propemodum adversitatum oceano emergent, pacti sunt cum Mauris, ut V. P. Michaëli cum redemptis captivis in  
Hispa-

Hispaniam trajicere liceret, P. Didacus verò cum viginti octo captivis obsidis locò tamdiu Tetuani remaneret, donec pecunia, quam suis creditoribus debebant, ex assè persoluta fuisset. Mauri, quos tam acerbæ perpetuarum calamitatum series, quibûs Patres hucusque semper vexatos viderant, ad compassionem permoverat, haud cunctanter oblatam conditionem admiserunt, ità tamen, ut & ipsi vicissim pacti sint, hanc pecuniam intra spatium trium mensium esse persolvendam, quod si non fieret, & pecunia vel unica die tardiùs adveniret, ipsis liceret, Patrem Didacum cum reliquis obsidibus sub hasta vendere, & ex illorum auctione damnum suum resarcire.

His conditionibûs ex utraque parte propositis, & acceptis, P. Michaël à Virgine, & Fr. Joannes à S. Augustino cum nonaginta, & octo captivis (nam per decursum hujus tam diuturnæ detentionis unus in fata concesserat, quem fortassis omnes



omnes alii ob tot toleratas ærum-  
nas secuti fuissent, nisi Divina Ma-  
jestas illos peculiari beneficiô in  
vita conservasset ) quàm matur-  
rimè Tetuanô excefferunt, tantâ-  
que contentione ( timore , & de-  
siderio ex manibus crudelissimo-  
rum illorum barbarorum evaden-  
di eis pennas addente ) iter suum  
acceleraverunt, ut eadem adhuc die,  
quintâ nimirum Martii, qua Tetua-  
nô emigrârunt, ante solis occasum  
fidelissimum illud orbis Christiani  
præsidium , Ceutam, intraverint.

In hac nobilissima urbe exquisiti-  
simâ pompâ suscepti fuerunt, tota  
nobilitate cum supremo armorum  
præfecto, tribunis, centurionibus,  
Capitulo Ecclesiæ Cathedralis, reli-  
giosissima Communitate RR. PP. Tri-  
nitariorum Calceatorum, & innume-  
ra promiscuæ plebis multitudine eis  
obviâ effusa. Horum omnium læ-  
titia, quamvis ob felicem P. Michaë-  
lis, & captivorum adventum esset  
ingens, suâ tamen non caruit tineâ,

singulis calamitosam captivitatem V. P. Joannis à Jesu Maria, & detentionem P. Didaci à Purificatione amarissimè deplorantibûs. Adeò in hac occasione lacrymæ erant gaudiis permixtæ, ut, cùm novis hospitibus felicem in hanc urbem ingressum gratularentur, simul infelicem sortem P. Joannis deflerent. Ceutæ privatis quibûsdam necessitatibûs constricti aliquot diebûs substiterunt, quibûs absolutis decimâ tertiâ ejusdem mensis naves conscenderunt, prosperaque quatuor horarum velificatione Gibilterram pervenerunt, ubi à Governatore, & Clero urbis officiosè suscepti, & in Ecclesiam parochialem deducti, Divinæ Majestati prolixas gratias persolverunt, quòd Ejus adjutoriò fulti post tot, tantasque misérias exantlatas salvi tandem, & incolumes Hispaniam reviserint.

Gibilterræ unica die à maris jactatione respirârunt, indéque digressi altera luce, id est decimâ quintâ Martii in viam, quæ Malacam ducit,

se

se dederunt ; hæc namque urbs à sacra Religione nostra solemni eorum ingressui destinata fuit. Tot pericula , & ærumnæ, quibûs hætenus defuncti fuerant, tantum eis terrorem incusserant, ut omnes, quamvis viribûs fracti, & laboribûs exhausti, mallent terrestri itinere progredi, quàm ancipitem maris aleam denuo experiri. Sensim itaque, lentèque profecti Esteponnam ( oppidum nimirum in maris litore extructum, & quatuordecim tantum milliaribûs Malacâ sejunctum ) pervenerunt : ubi cùm P. Redemptor vidisset, captivorum quosdam aut provectæ ætatis pondere pressos, aut corporis ægritudine præpeditos iter terrestre ulteriùs continuare non posse, eos duabus phaselis, quarum domini se ad hoc opus charitatis gratis præstandum spontè obtulerant, imposuit, maritimóque itinere Malacam petere jussit.

Commodùm naves conscenderant, prosperisque favoniis in puppim as-

pirantibûs nonnihil provecti fuerant, dum ecce tibi! attonitis oculis rursus myoparonem quemdam sibi imminentem conspiciunt, ex quo piratæ jam duas scaphas in mare dimiserant, ut earum operâ phaselos illas, in quibus inermes vehebantur captivi, interciperent. Territi tam funestô spectaculô pauperes captivi, properata remorum impulsione ad litus festinârunt, sed cùm hoc iter lentius eorum votis procederet, plerique aquas insilierunt, & lumborum tenus mari immersi ad ripam contenderunt, ut tantò velocius salutem suam sub adsitorum fruticum, & virgultorum condensa multitudine in tuto collocarent. Actum tamen, & conclamatum de omnibus fuisset, nisi incolæ arcis Esteponnensis myoparonem illum conspexissent, qui protinus manipulum velitarium equitum, oræ maritimæ custodiendæ deputatum expedierunt, quorum adventu Mauri adeò exterriti fuerunt, ut illico

licò talaria induerint, lectisq̃ue retrò  
 vestigiis velivolo cursu aufugerint.  
 Quibûs abactis trepidi, & per agros  
 palantes captivi rursus animum re-  
 sumpserunt, phaselósque ingressi  
 tam prospera deinceps navigatione  
 usi fuerunt; ut licèt decima ante me-  
 ridiem hora jam elapsa fuisset, quan-  
 do illi interruptum iter suum conti-  
 nuare cœperunt, nihilominùs tamen  
 circa horam quintam vespere Mala-  
 cam pervenerint.

Ea tempestate ad clavum nostri  
 Conventûs Malacensis sedit Veneran-  
 dus P. Fr. Petrus à S. Michaële, qui  
 postea totius S. Religionis nostræ  
 Minister Generalis creatus fuit. Hic  
 itaque Religiosissimus Pater, ubi de  
 adventu captivorum certior factus  
 fuit, ingentem vim rerum escu-  
 lentarum eis transmisit; non enim fas  
 illis erat, ut priùs è navibus egre-  
 derentur, quàm eis à Magistra-  
 tu hujus rei potestas facta fuisset.  
 Porrò manè sequentis diei, decimâ  
 nonâ Martii Religiosi nostri in for-

ma supplicationis ad litus processerunt , & inde redemptos captivos ad nostrum Conventum secum reduxerunt , in quo illa die festum sanctissimi Patriarchæ Josephi magnifico apparatu celebrabatur captivis interea in tenerrimas devotionis lacrymas colliquefcentibûs , quibus post tot evolutos annorum circulos tandem aliquando concessum fuisset , Ecclesiam hujus magni Patriarchæ honoribus sacram videre, ejusque solemnibus interesse , quibûs tanto tempore inter infideles barbaros caruere.

Horâ secundâ â meridie ingenti splendore, & magnificentiâ processio adornata fuit , quam præter Clerum tota etiam nobilitas illius celeberrimæ urbis suâ præsentia condecoravit , totô populô ad tam insolitum spectaculum in plateas, & fenestras effusô. Agmen ducebat Excellentissimus Dominus Didacus Leonardus de Argote, Gubernator, & Generalis, ut vocant, Capitaneus oræ maritimæ vexillum Redemptionis præseferens. Hujus  
ve-

vestigia premebant proceres, purpurati, aliaéque eminentioris conditionis personæ, quibus, uti & Religiosis nostris permixti incedebant octo illi, & nonaginta captivi Trinitariô scapulari, tamquam clypeô aureæ libertatis, & redemptionis suæ tesserâ insigniti. Hos sequebatur P. Redemptor imaginem crucifixi Redemptoris in manibus portans. Totam hanc triumphalem pompam Magistratus, & Senatores urbis Malacensis longo symmate clauferunt.

Hoc ordine permeârunt præcipuas civitatis plateas, reclangentibûs, & sonorum suum taratantara spargentibus tubis, reboantibûs ubique festivo strepitu campanis, gratissimâque phonasorum, Psalmum 113. *In exitu Israël de Ægypto* modulantium symphoniâ aëra latè demulcente, ac denique tota plebe faustis acclamationibûs applaudente. Cùm ad Majestuosam illam molem Cathedralis Ecclesiæ pervenissent, à toto Reverendissimo Capitulo honorificentis-



simè suscepti, & ad Altare majus deducti, ac deinde rursus decantatô Hymnô Ambrosianô *Te Deum laudamus*, non inferioribûs honoris, & benevolentiae argumentis dimissi fuerunt. Qui viam suam relegentes ad templum nostri Conventûs reversi sunt, ubi peractis omnibûs, quæ â nostris Legibus in simili occasione præscribuntur, precibûs, & ceremoniis, captivi libero commeatu instructi, largôque viaticô dotati, expediti fuerunt, qui Patri Redemptori, aliisque S. Ordinis nostri Religiosis, magis lacrymîs, quàm verbis valedixerunt.

Hæc gaudia S. Religionis nostræ majorem in modum corruperat ingens sollicitudo tantam pecuniam colligendi, quantâ opus erat pro expungendis debitis, Tetuani contractis, & liberando P. Didaco â Purificatione, qui cum viginti octo captivis in illa barbara civitate obsidis locò remanserat. Flagrantissimus zelus R. N. P. Fr. Petri ab Ascensione,



ne, qui ea tempestate Generalis Minister totius Ordinis audiebat, plurimas passim corrogavit eleemosynas, firmiterque decreverat, ipsa etiam sacra vasa, ( si res postularet ) conflare, illisque venditis periclitanti P. Didaco, ejusque sociis succurrere. Cæterum ampla Christianorum liberalitas effecit, ut necesse non fuerit ad hanc extremam resolutionem descendere; ingentibus siquidem illis eleemosynis, quas pietas Catholici Monarchæ suppeditaverat, aliisque pecuniis undequaque collectis brevi tempore residua illa octodecim florenorum millia coacta fuerunt, quibus secum assumptis supradictus Fr. Joannes citato itinere in Africam contendit, elusis peculiari DEI ope piratis, qui, cum non ignorarent, eum magnam pecuniæ vim secum allaturum, pertinaciter vigilantiam, & solitudine eidem sunt insidiati. Verum ille manu Altissimi protectus tendiculas illorum effugit, & velivolante cymba sospes Ceutam intravit. Ex qua urbe ad

Gubernatorem Tetuanicum nuncium destinavit, eundemque rogavit, ut P. Didacum cum reliquis viginti octo captivis Ceutam transmitteret, se namque pactam pecuniam attulisse, quam illis confestim tradere vellet, qui Patrem cum captivis adducturi essent.

Sed ne hic quidem occasio exercendæ patientiæ defecit; Gubernator enim, qui nativâ suâ diffidentiâ impulsus omnia suspecta habebat, diu adduci non potuit, ut in has preces consentiret, obsidésque captivos cum Patre Ceutam transmitteret. Ergo cum res jam periculosam faciem præferre inciperet, Divina Providentia viam aperuit, hujus negotii conficiendi per quosdam Mauros, qui cognati erant capti cujusdam, & Ceutæ pro quodam Christiano mancipio permutandi Mauri; hi enim Gubernatorem tot precibus fatigârunt, ut ille tandem sepositâ omnî diffidentiâ Patrem Didacum, reliquosque captivos Ceutam dimiserit,  
ubi

ubi mutua utrínque exultatione hæc permutatio transacta fuit , Mauris tam effusè gestientibûs , ut conceptæ mentis lætitiæ variis pugnâs ludicris , & equorum cursibûs largè , afatimque litaverint. Porro P. Didacus cum Fr. Joanne , aliisque viginti octo captivis prospera paucarum horarum velificatione Gibilterram pervenerunt , ubi post persolutas SSS. Trinitati pro discussione tantorum periculorum gratias , captivi viaticô donati , suæ sunt libertati permisi , cæteri autem in suos Conventus reversi.

Hæc est succincta quædam descriptio ( multas enim , easque valde memorabiles circumstantias , ne historiæ filum in immensum excreceret , consultò prætermisimus ) hujus inauspicatæ , & tragicæ Redemptionis , quæ licèt tandem finem suum , libertatem nimirum captivorum , sit assecuta , is tamen non aliter , quàm ingentibûs S. Religionis nostræ dispendiis , & decumanis Patrum Redemptorum cala-

la-

Imitatibûs obtineri potuit. Ex  
 quibus omnibus ritè perpensis, sole  
 meridiano clariùs elucescit perfidia,  
 inconstantia, & insatiabilis avaritia  
 Maurorum, populi nimirum barbari,  
 veri DEI, omnisque charitatis igna-  
 ri. Non minùs etiam hìc licèt dispi-  
 cere, quantis periculis, & æumnis  
 illi Religiosi sint obnoxii, qui, tam-  
 quàm genuini imitatores Domini no-  
 stri JESU Christi, qui pro nostra Re-  
 demptione pretiosissimum suum san-  
 guinem inter summos dolores profu-  
 dit, in barbara illa regna pro liberan-  
 dis captivis Christianis ablegantur.  
 Quamvis autem in hac Redemptione  
 nullus ex Patribus Redemptoribus  
 sanguinem cum vita effuderit, om-  
 nes tamen sexcentis miseris confli-  
 cti fuerunt, Venerabilis verò P. Joan-  
 nes à Jesu Maria, tamquàm vera cha-  
 ritatis victima, sub vinculis concidit,  
 & prolongatò martyriò vitam mor-  
 talem clausit, ut in sequentibus la-  
 tiùs visuri sumus.

CA-

## CAPUT XIII.

*De multifariis ærumnis, quas  
V. P. Joannes tam in itinere, quàm  
in laboriosa captivitate sua perpeſſus  
fuit.*

**I**Lle demum beatus censendus eſt,  
ait Magnus Aurelius Auguſtinus,  
qui bonum obtinuit, cujus deſideriò  
flagravit. Grande ſemper cupiditatis  
incendium, ſuum Diviniſſimum Re-  
demptorem imitandi, & ex ejus amo-  
re multa adverſa perferendi, aſit in  
præcordiis V. P. noſtri Joannis, quod  
tamen ſe tunc multò clariùs prodidit,  
quando periculoſiſſimæ expeditioni  
Redemptionis captivorum admotus  
fuit. Cùm adhuc Ceutæ in condu-  
cendis navibus occuparetur, epiſto-  
lam quamdam ad ſuam germanam  
ſororem, quæ, ut in ſuperioribus nar-  
ravi, ſanctimonialis fuit in Conventu  
Conceptionis Alcazarii, exaravit, in  
qua prolixè executus fuit immenſas  
tribulationes, & pericula, quibûs ip-  
ſe cum ſociis ſuis hætenus afflictuſ  
fue-

fuerat , & quæ sibi etiamnum super-  
ventura metuebant. Cùm verò pia  
illa virgo rescripsisset , hanc episto-  
lam sibi , totique Conventui suo cau-  
sam fuisse permagni mœroris , quòd  
omnes , nunc timerent , eum gra-  
viora adhuc mala passurum , respon-  
dit flammidus ille , & patiendi desi-  
deriò extra se propemodùm raptus  
P. Joannes : *Quid tu agis soror mea ?  
Cur non potius gaudes , & exultas , dum  
vides , mihi propter Christum martyrium  
imminere.* Has litteras monialis illa  
S. Religioni nostræ tunc primò tradi-  
dit , quando frater ejus , V. nimirum  
P. noster Joannes , Algerii feliciter jam  
in Domino obdormivit , ut ex illis  
inflammatum ejus pro Christo patien-  
di desiderium , quo etiam ante cap-  
tivitatem suam exarserat , clariùs pa-  
teret. Hïs ità cursim præjactis nunc  
ad ipsam narrationis seriem propiùs  
accedemus.

Piratæ igitur , ut superiùs memo-  
ravimus , opimam sibi prædam gra-  
tulati , gaudiò offertissimi cursum  
suum

suum continuârunt ; captivus autem  
 Redemptor noster in angulum quem-  
 dam navis secessit , Deoque humilli-  
 mas pro hac nova calamitate gratias  
 confessus est , minimè dubius , eam  
 sibi pro majori bono suo à Divina  
 clementia immissam fuisse , depromp-  
 sit deinde ex manica sua libellum  
 quemdam precatorium, Diurnale di-  
 ctum , cœpítque ex eo ingenti fer-  
 vore preces suas pertexere. Non mul-  
 tum adhuc promoverat, dum repen-  
 te violentissimus turbo exortus Ocea-  
 num in procellas concitavit, novís-  
 que semper fluctuum montibûs ex  
 imo maris ebullientibûs præsentissi-  
 mum omnibus minabatur naufra-  
 gium. Stupefacti prædones , & im-  
 manitate periculi attoniti, cùm Pa-  
 trem solum viderent in communi di-  
 scrimine quietè agere , suspicati sunt,  
 eum magicis incantationibûs hanc  
 tempestatem excitâsse, atque ex illo  
 libello, quem manibûs tenebat, fe-  
 ralia illa carmina murmurâsse, qui-  
 bûs mare in eorum exitium armatum  
 fuisset.

fuisse putabant. Rabido itaque furore acti in eum irruerunt, humoque allisum ad oram navis pertraxerunt, eum in mare præcipitare volentes. Huic tamen crudeli eorum proposito intercessit navarchus, dicens: si virus magiæ in hoc libello latet, facile illud dissipari potest sine captivine. Hæc fatus Patrem accessit, ejusque manibus libellum evulsum non sine magna indignatione procul in mare projecit. Hac jactura V. P. Joannes, plus quam dici queat, contristatus fuit, cum se nunc armis suæ spiritualis militiæ destitutum ingemisceret. Ab illo autem tempore Horas Canonicas, quantum fieri poterat, ex memoria recitare consuevit, quod procul dubio alter minoris fervoris religiosus non egisset, similibus in circumstantiis omnem fortassis orandi amissurus appetitum.

Nondum hæc atrox tempestas plenè detumuerat, dum ei protinus alia, eaque multò sævior è vestigio successit, ut illi nunquam pro Christo patienti-



tiendi deesset occasio ; altera siquidem navigationis die rumor incomperto authore in vulgus nauticum exivit, quo ferebatur, N. Patrem Joannem tres libras unionum Orientalium secum habere, eosque alicubi in navi abscondisse, quin locum manifestare vellet, ubi tantus lateret thesaurus. Dicebant autem uniones illos ab eo regi Marrocchiano in honorarium destinatos fuisse, quos ille nunc sibi clanculum reservare vellet, ut illis Algerii distractis libertatem redimeret. Rumor iste nativâ Maurorum avaritiâ auctus adeò invaluit, ut totam bilis suæ amaritiem in virum innocentissimum effuderint, eumque multò majoribus ærumnis subjecerint, quàm paucis verbis describi queat. Sed cum omnibus illis injuriis nihil aliud ex eo, quàm gemitus, & suspiria ad DEUM extorquerent, illum tandem in carina extenderunt, quatuorque ferocioribus Mauris accersitis præceperunt eum tamdiu fustibus cedere, donec aut locum gemmas illas

occultantem indicaret , aut pertinacem in suo silentio exhalaret animam. Antequàm autem illi in mansuetissimum , & ad mortem subeundam paratissimum Patrem sævire inciperent, navarchus eum sic est allocutus : aut nunc saltèm locum manifesta, in quo uniones tuos celâsti , aut scito tibi sub irremissis verberum ictibus jamjam moriendum. Ad hæc respondit servus DEI mira humilitate : Ego mortem , quam mihi intentatis , nihil admodum metuo , quia multò atrociorẽ meïs peccatis fui promeritus. Quod autem uniones , quos à me flagitatis , attinet , illos vobis indicare haud valeo , quia nullos habeo , nec locum iis recondendis commodum scivissem ; non enim ignoro , quàm sollicitis oculis , manibûsque omnes navis excusseritis , & perlustraveritis angulos , quin tamen vel minimum latebræ alicujus inveneritis vestigium , ut proinde vos ipsi facilè cognoscere valeatis , sparsum hunc rumorem esse à veritate alienissimum. Equidem  
ani-

anima ejus tot erat gemmīs , quot virtutibūs ornata , harum autem ore-  
xī barbari illi minimè tenebantur.  
Tam humili responsione in pavimen-  
to extensi , & crudelissimam necem  
expectantis Patris , Renegatus qui-  
dam , sive desertor nostræ salvificæ  
Fidei , ità commotus fuit , ut sua apud  
navarchum intercessione piissimum  
Patrem à morte liberaverit , quem  
etiam postea seorsim assumptum ap-  
positis cibis refecit , cū satis nōs-  
set , eum totō biduō præter modi-  
cum rancidi , & bis-cocti panis ni-  
hil omnino aliud degustasse.

Inter has , aliásque plures hujus ge-  
neris calamitates tandem afflictus P.  
Joannes Algerium pervenit. Hæc  
civitas fuit virtutum theatrum , in  
quo Venerabili Patri nostro luctamen-  
cum multisimis ærumnis , persecutio-  
nibus , & afflictionibus ineundum erat.  
Cæterum antequàm piratæ in litus  
descenderent , cœperunt de prædæ di-  
visione inter se dissidere , cūque  
verbis litem exortam dirimere non

valerent , ad arma conversi semetip-  
 sos crudeli lanienâ discerpserunt, ali-  
 quibûs etiam trucidatîs , è quorum  
 numero fuit renegatus ille , qui P.  
 Joanni in exacto itinere tam prolixè  
 faverat ; is enim ab adversa factiōe  
 confossus , statimque in mare jactatus  
 fuit , V. Patreejus temporale , ac sem-  
 piternum exitium tantò acerbîus de-  
 plorante , quantò ferventiùs ( ut be-  
 neficiis ejus gratam vicem redderet )  
 illum priùs ad reconciliationem cum  
 S. Ecclesiâ Catholica , licèt frustra ,  
 invitaverat , impio illo , & marpesia  
 caute duriore homine omnes ejus co-  
 natus pertinacî in Christianam fidem  
 odiô eludente. Hunc igitur adeò  
 miserè jugulatum deflevit magnus  
 hic animarum zelator amarè : nullus  
 tamen dubito , infelicem hunc mul-  
 tò nunc amariùs , quamvis sinè omni  
 fructu æternam suam miseriam deplo-  
 raturum.

Tandem omnibûs è navi egressîs V.  
 P. noster Joannes urbis Gubernatori,  
 quem ibi Deyum appellant , præsen-  
 tatus

tatus fuit. A quo dimissus flexo in vesperam die obvios habuit nonnullos captivos Christianos, qui eum comiter salutatum cibis ex sua propria penuria depromptis refocillârunt, & stratis super terram duabûs pelliculis ei tenuem lectulum pro nocturna quiete adornârunt. Exorto deinde die præconi traditus est, qui eum clara voce venalem prædicans per varia urbis compita circumduxit, quem religiosissimus P. Joannes ad instar mansuetæ oviculæ placidè secutus fuit. Hæc urbis percurratio à summo mane ad alteram usque à meridie horam producta fuit, quin immitis ille barbarus, cujus ductui commissus fuerat, ei vel minimum cibibolum porrexisset, ut proinde captivus quidam ejus misertus illi frustum panis, quo attritas vires paululum restauraret, donaverit. Tandem nobilis quidam, & opulentus Maurus quinque millibûs, trecentis, & sexagintâ florenis eum mercatus est. Quis jam deinceps mirabitur, si audiat

captivos Christianos à nostris Religiosis tanti emi, cum & ipsi barbari sibi invicem captivos Christianos tam immodicò pretiò vendant ? Ut audivit V. P. Joannes enormitatem pretii pro se expensi amarissimè lacrymari cœpit. Et Mauri quidem, cum vidissent genas ejus lacrymâs irroratas, arbitrati sunt, eum ideo in fletum resolutum, quòd scilicet vinculis nunc se constrictum cerneret, qui alios à suis compedibus liberare consueverat. Verùm genuina causa lacrymarum ejus non erat tali pusillanimitati affinis; ille siquidem, ut postea Vicario Apostolico confessus est, nihil aliud deploravit, quàm magnitudinem pretii, quò venditus fuerat, cum indignum putaret, ut vilissimus terræ vermiculus, qualem se esse dicebat, tanti veniret, quando nobilissimus DEI Filius, cujus venditio illius hoc tempore vivacissimè oculis observabatur, contemptibili trīginta denariorum pretiò venundatus fuit. Qua consideratione cor ejus pressum adeò

adeò coarctabatur , ut nisi lacrymis frena laxâset , sibi præ nimio dolore moriendum putaverit.

Hac emptione transacta in domum Domini sui deductus fuit , qui , sicut opibûs , ità & crudelitate , ac implacabili in Christianos odiô omnes ejus urbis incolas facilè superaverat. Summum ejus gaudium erat Christianos sexcentis injuriis affligere : unde si quos ditioni suæ subjecisset , eos præter asperrima verba , & verbera gravissimis , & irremissis laboribûs obruere nunquam cessavit , dicere solitus , sibi nihil jucundiùs accidere posse , quàm videre Christianos extremis immerfos calamitatibus , & miseriis. Hujus itaque tyranni , aut potius immanissimæ tigridis , potestati traditus fuit vir humillimus , & mansuetissimus. Ad cujus ædes postquam pervenisset , jussus est angustum quoddam , obscurum , humidum , & squalidum incolere cubiculum , quod licèt ultra decem pedes non esset protensum , in eo tamen



unà cum aliis quinque captivis diversari coactus est. Victus ejus erat vilis admodum, & exiguus, labores verò adeò magni, ut nisi alii captivi ei in suppetias venissent, illis par esse minimè potuisset. Occupabatur autem de die in suburbanis hortis, qui, ut sunt vitibûs, oleis, aliisque difficilioris culturæ arboribûs refertissimi, ità ei durissimorum laborum amplissimam segetem suppeditabant.

Quamvis autem Dominus ejus multos sub potestate sua haberet Christianos captivos, nullum tamen eorum tanta severitate tractavit, quanta V. nostrum P. Joannem. Ad quod faciendum inductus fuit partim nativa sua feritate, partim desiderio enorme quoddam lytrum ab eo extorquendi. Crebriùs itaque, eum inhumanis habitum modis, hîs est allocutus verbis : Noli te frivola misericordiæ, aut levaminis cujusdam obtinendi spe lactare ; nî etenim duodecim florenorum millibûs tuam redemeris libertatem, tantis es ob-

ruen-



ruendus laboribûs , ut sub oneribus  
tuis miserrimè sis expiraturus. Cùm  
autem vir DEI ad hæc humili voce  
responderet , se esse inopem religio-  
sum , suúmque S. Ordinem inter om-  
nes sacras Religiones pauperrimum ,  
ut proinde tam magnum lytrum ab  
eo sperari nequeat , daturum se ta-  
men operam , ut pecuniam , quam  
pro se expenderat , suis laboribûs  
ei refunderet ; Barbarus acriùs ex-  
canduit , & avaritia furorem stimu-  
lante tam diris , & horrendis calami-  
tatibûs Patrem afflixit , ut nisi divini-  
tùs confortatus fuisset sub tantis pro-  
cul dubio exhalâisset ærumnis.

Verùm ille Divinâ protectus gra-  
tiâ tantò liquidioribûs , & majoribûs  
voluptatibûs affluebat interiùs , quan-  
tò gravioribûs miseris , & tribulatio-  
nibûs vexabatur exteriùs. Inviçtum  
erat animi ejus robur , & inexpugna-  
bilis patientia. Felicem se arbitra-  
batur , cui obtigisset pro amore sui  
dulcissimi Salvatoris aliquid pati.  
Gratias proinde humillimas omnipo-

tenti DEO indefinenter persolvebat, quòd sua Majestas eum dignum censuerit, qui propter nomen Domini nostri Jesu Christi aliquas perferret adversitates. Fervor ejus, & desiderium patiendi in ipso tribulationum æstu adeò excreverat, ut injuriis illis, & laboribûs, quibûs ab immiti hero suo indies magis gravabatur, minimè contentus alias corporis afflictationes ultro accersiverit, inflammatae suæ patiendi cupiditati perfectè satisfacere studens. Non priùs ille fessos artus super stratum deposuit, quàm acri, prolixâque flagellatione se diverberâisset. Jejunabat ferme quotidie, aut si ob urgentes causas jejunium solvisset, tam exiguò & proletariò nutriebat stomachum alimentò, ut talis comedendi ratio in fortissimis etiam hominibus rigidum jejunium reputari potuisset. Somnum arctissimîs circumscripserat cancellis; diurnis siquidem laboribûs exhaustus, postquàm obumbrante vespere horridum illud, quod ejus habita-

bitationi deputatum erat, ingressus fuisset spelæum, cæteros captivos convocavit, & cum illis alternatim coronam Marianam persolvit, cui deinde privata pietate aliud rosarium cum Litanis Lauretanis, & multissimis orationibus superaddidit.

Hoc devotionis stadiô decursô aliud statim est auspicatus, nam quo tempore fatigati sodales ejus somno indulgebant, iste tota animi contentione orationi mentali, sive meditationibus sacris incumbibat, in quibus vela sui spiritûs quàm latissimè expandebat. Ab hoc sacro exercitio eum nulla unquam fatigatio, nulla domini sui crudelitas, nulla denique stygii hostis fraudulenta machinatio detertere potuit. Sæpè cùm persolutâ Coronâ Marianâ cæteri captivi cubitum concessissent, eum suppliciter obsecrârunt, ne immensîs alioquin laboribus, & jejuniis exhaustum corpus tam prolixis vigiliis etiam maceraret, sed tantisper quieti indulgeret, ut sequentis diei laboribus pares vires affer-

afferret. Quibus ille respondit: Mihi credite charissimi fratres! Nullum est præstantius remedium ad alterius diei afflictiones patienter tolerandas, quàm oratio mentalis : unde etiam avidis quotidie votis noctis adventum præstolor, ut hoc spirituali pabulò refectus vegetior, validiôrque ad onera mea revertar. Non ille itaque in somno, sed in precibus suam quæsit, & invenit requiem, satis gnarus, cœlestia dona non dormientibus, verùm vigilantibus conferri. Imitatus igitur est exactissimum illud totius perfectionis exemplar, Redemptorem scilicet nostrum, in agonia prolixiùs orantem. Illaudatè proinde agunt illi, qui in Deo solo omnem consolationem invenire valentes adversitatibus suis, & ærumnis, non piis ad Deum precibûs, sed futilibûs confabulationibûs, lautioribûs comessationibûs, saltu, lusu, potu, aliisque hujus generis oblectamentis mederi cupiunt.

Cæterum quamvis piissimus hic  
Dei

Dei servus omnes ærumnas suas plus  
quàm spartanâ sustinuerit patientiâ,  
accidit tamen aliquando, ut in sanc-  
tam quamdam impatientiam erupe-  
rit; barbarus siquidem Dominusejus;  
ut huic mancipio suo ægrè faceret, aut  
sacram Fidem nostram in ludibrium,  
& risum adduceret, ei laceram, re-  
sartâmq̃ue suam vestem religiosam  
detraxit, eundemque Turcicâ deinceps  
togâ ad instar aliorum cap-  
tivorum vestitum incedere iussit.  
Tunc enim verò magnanimus hic  
Christi athleta doloris sensum pro-  
didit, tunc falsis lacrymarum fluen-  
tis exangues genas irrigavit, tunc  
in luctifona suspiria, tristissimós-  
que gemitus erupit. Videbatur  
ille sibi cœlô in terram delapsô jam  
penitùs oppressus fuisse, tantôque  
mœroris nubilô obnuptus est, ut  
nullibi vel tenuem quemdam solatii  
alicujus radium invenire posset. Cœ-  
pit igitur ardentissimîs precibûs Di-  
vinum Redemptorem nostrum exo-  
rare, ne se hac cœlesti veste priva-  
ri

ri permetteret , sed infinitâ suâ potentia , cui res nulla creata obistere valet , ferocem Domini sui animum ad restitutionem Trinitarii habitûs adigeret ; pluris scilicet ille faciebat attritam suam , obsoletâmq̃ vestem religiosam , quàm purpurea , & radiantibus gemmis coruscantia diademata , non ignorans in hoc indumento quondam non solum Sanctos Angelos Parisiis S. P. N. Joanni de Matha , Romæ autem Innocentio III. Christi Vicario apparuisse , sed & ipsam quoque serenissimam Angelorum Reginam Mariam , in pervigilio gloriosissimæ Nativitatis suæ in societate plurimorum cœlestium geniorum , Matutinas preces cum S. P. N. Felice Valesio simili amictam veste decantâsse. Quamvis autem habitus , & tonsura se solis monachum non faciant , hæc tamen anxia sollicitudo pro veste exteriore abundè innuit , quantam curam insignis hic Dei servus adhibuerit , ut interiorem gratiæ vestem

Item illæsam semper, & incontaminatam conservaret.

Ascenderunt tandem lacrymæ ejus, & suspiria in conspectum Altissimi, qui suavi quodam impulsu cor alterius cujusdam nobilis Mauri permovit, ut pro afflicto Patre intercederet, eidemque restitutionem vestis religiosæ exoraret. Quod & factum est: inhumanus enim alioquin, & barbarus ille Maurus amici sui preces admisit, ademptumque habitum V. Patri restituit. Quo ille accepto gestire, exultare, suumque vetustum, & rude Scapulare millenîs basiî osculari cœpit, qualiter non faceret perditissima quædam profanarum vestium amatrix, sicubi pretiosum quoddam nancisceretur patagium.

Hâc procellâ sedatâ alia protinûs tempestas suborta est. Versipellis siquidem draco infernalis, ut vidit, se votô suô frustratum fuisse, aliud ex tempore stratagema commentus est; instigavit nimirum truculentum illum P. Joannis dominum, ut post  
con-



concessum habitum ei Rosarium , & antiquum quoddam breviarium , quod vir Dei ab aliis Christianis dono acceperat , rursus auferret. Verùm Dei servus tam humilibûs , & mansuetis precibûs novit trucem barbari illius mentem versari , ut tandem ei utrumque denuo tradiderit dicens : Accipe Papaze ! quod â me postulas , & memento , ut te mihi gratum exhibeas ; nulli enim captivorum apud nos res tales habere permittitur. Nescio autem , quo superiore ductu impellar , ut tibi hac vice negare non possim , quod petis. Inter has , aliâsque haud inferioris notæ calamitates V. P. Joannes miserrimæ servitutis suæ incommoda tamdiu toleravit , donec Supremæ Divini Numinis Majestati placuisset , eum in talem statum collocare , in quo plus otii adeptus etiam posset alienæ salutis consulere , & ardentis charitatis suæ igniculos latè pro bono proximorum suorum spargere , ùt nunc narrare aggredior.

CA-



## CAPUT XIV.

*De rebus à V. P. Joanne Algerii gestis, usque ad felicem ejus mortem.*

**S**apienter locutus est togatissimus Seneca, dum dixit: Non sibi vivit, qui nemini vivit. Magnorum virorum est non solum propriam, sed & aliorum promovere salutem. Hoc suô exemplô prolixè ostendit V. P. N. Joannes, illico animadvertens, ut Algerium pervenit, pauperes captivos Christianos inibi in servitute detentos grandî solatiô, & adjutoriô opus habere, quibus proinde fervidus hic animarum Zelotes pro viribus subvenire decrevit. Doluit tamen impendiô facultatem sibi esse ereptam, qua voluntatis suæ desideria in opus deducere valeret; tantis namque laboribûs quotidie onerabatur, ut exiguum admodum tempus pro aliorum bono promovendo ei superesset. His angustiis

N

obses-

obseſſo Divina Pietas mirabiliter ſuccurrit, eique præter ſpem ampliſſimam occaſionem ſubmiſit fervori ſuo pro libitu indulgendi, & retia in capturam animarum latiſſimè extendendi.

Sacra, & illuſtris Religio PP. Trinitariorum Calceatorum Hoſpitale Algerii poſſidet, quod Catholica Hiſpanorum devotio ſuis fovet, & ſuſtentat eleemoſynis. Huic præeſt Religioſus quidam ſub titulo Adminiſtratoris, cui quatuor, aut ſex ejusdem S. Ordinis ſubſunt alumni, qui indefeſſa charitate captivorum curam gerunt, eiſque non ſolum ſpiritualia munera adminiſtrant, verum etiam corporalibûs pharmacis, quando illos ægrotare contingit, mirapietate, ac ſolicitudine ſubveniunt. Ad eundem etiam finem Summus Pontifex ſuum in hac urbe Vicarium Apoſtolicum, aliôſque Sacerdotes pro ſolatio, & auxilio captivorum Chriſtianorum alit. Quòd autem infideles Mauri illos ſuo commorari in

in gremio patiantur, id non aliunde fit, nisi quia grandî pecuniæ summâ hæc licentia ab eis emitur; malunt enim barbari illi naturale suum in Christianos odium temperare, quàm occasione cujusdam lucri, aut compendii pecuniarii excidere. Illo tempore, quo V. P. Joannes Algerium pervenit, munus Apostolici Vicarii gesserat Religiosus quidam ex Ordine Missionariorum, nomine P. Joannes Levachez, natione Gallus.

His, aliisque viris religiosis haud vulgaris causâ doloris fuit videre V. Patrem Redemptorem tantis miseriis confictari, quem illi ob raras, & exquisitas ejus virtutes tamquàm virum sanctum venerabantur. Comuni itaque consensu illum agrestibus laboribus occupatum adiêrunt, & salutationis officiis perfuncti dixerunt, secum unanimes decrevisse, dummodò ipse eorum non adversaretur voluntati, facta cum domino suo conventionem menstrui cujusdam pretii, cum ex gravissimis hisce la-

boribus eripere, secúmque in nosocomium deducere, ubi majori otio, & quiete esset fruiturus, amplioremque erga captivos Christianos charitatem suam exercendi inventurus occasionem. Ad hæc respondit humiliter vir Dei : Fieri non potest, ut ego corporeis laboribûs, & quotidiano sudore meo tantum promerear, quantum inexplibilis avaritia domini mei pro me postulabit ; sed illi viri misericordiæ eum blandè sunt consolati, sanctéque asseverârunt, se promptissimîs, & libentissimîs animîs totum collaturos, quidquid in ejus commodum redundare posset. Qua liberali pollicitatione captivus P. Redemptor oppidò exhilaratus, oculîs in cœlum erectîs Divinæ Majestati debitas pro tanto beneficio persolvit gratiarum actiones, deinde ad benevolos illos Ecclesiasticos conversus dixit : Facerent, quidquid in majus Dei obsequium cessurum judicarent. Hôc acceptô responsô illi confestim ad dominum ejus se contulerunt,

runt, & ferocem barbarum multis tandem precibus eò perduxerunt, ut rationabili pretiò, ad quod singulis mensibus persolvendum se obligaverant, acceptò, servum Dei eorum arbitrio permiserit, quem illi protinus à stiva abductum ad regium transposuerunt Hospitale.

Non procul à vero aberrabit, quisquis dixerit, Divinam Providentiam inscrutabilibus consiliis suis P. Joannem idcirco infidelium potestati tradidisse, ut ejus operâ innumeri propemodum captivi Christiani Algerii in tristissima servitute gementes in sancta Fide Catholica confortarentur, & ad ærumnas suas patienter sufferendas animarentur. Cum Hospitale illud primâ vice ingressus fuisset, visus est sibi in ipso jam paradiso versari. Totam illam noctem insomnem transegit, eamque unice in præparatione ad sequentis diei sacrificium celebrandum insumpsit, non aliter, quàm si nunc primâ vice Redemptionis nostræ hostiam

æterno Patri esset immolaturus. Sanctâ igitur quadam impatientiâ solis ortum expectabat, ut tandem aliquando cupito vitæ fructu (cujus dulcedine hætenus aut prorsus caruerat, aut nonnisi tumultuariè, timidèque constitutis nimirum ad singula ostia fidis excubitoribûs, frui poterat) se largè, tractimque satiare. Tanto autem pietatis sensu, tamque exundante lacrymarum imbre tunc ad aras operatus est, ut omnes in suæ devotionis admiratione absorptos reliquerit. Hòc ille deinceps cœlesti obsoniò nunquam genium suum fraudans singulîs diebûs in oblatione salutaris Hostiæ spiritum suum saginavit.

Animò deinde ad curam captivorum conversò in id ante omnia incubuit, ut eos in confessione Fidei Christianæ corroboraret; multos namque viderat, quos vafrities antiqui serpentis supremo jam periculo tantum thesaurum perdendi admoverat. Crebriùs itaque Apostolico spiritu ex superiore

re

re loco Verbum Dei proposuit, præcipuè verò diebûs festivîs, & quadragesimalibûs, quorum nullum prætermisit, quîn fervido sermone circumfusam auditorum concionem ad perseverantiam in Fide Catholica, & vitam homine Christiano dignam exhortaretur. In colloquiis suis familiaribus, & privatis congressibus, eandem plerûmque materiam tractabat, aut certè captivos dulcissima quadam comitate, & verborum affabilitate ad patientiam in adversitatibus, ad pacem, & concordiam mutuam, ad variarum virtutum exercitia, potissimùm tamen ad Sacramentorum frequentationem alliciebat, eisdemque sollicitè inculcabat, ut in medio sceleratissimæ gentis constituti ab ejus vitiis abstinerent, eique Christianæ Fidei dignitatem inculpata vitæ integritate tantò vocalius prædicarent, quantò opera sunt verbis efficaciora.

Ut illos autem meliùs ad omnem pietatem manuduceret, ingeniosô

zelô suô inflammatus ex variis conchy-  
liis, dactylis, lapillis, vitibus, aliis-  
que lignis varia confecit rosaria :  
Hæc , ut quàm scitissimè, elegantis-  
simèque formaret, impigro sanè la-  
bore desudavit charitate magistra  
edoctus facere , quæ nunquàm didi-  
cerat. Quamprimùm igitur ad aures  
ejus pervenit, captivorum aliquem  
sive incuriâ, sive domini sui timore  
absterritum fertô Marianô carere,  
eum extemplò convenit, fusisque  
lacrymîs obsecravit, ne in tam sa-  
lutari devotione elanguesceret, sese-  
que propriâ culpâ talî scutô priva-  
ret, quô solô ignita invisibilis hostis  
missilia certissimè eluduntur, & mi-  
seriæ captivitatis quàm citissimè dul-  
cantur. Hoc dictô ei rosarium pro-  
prio labore confectum porrexit, mo-  
nuîtque , ut illud semper clam se-  
cum portaret, & oculis infidelium  
exploratorum studiosè absconderet;  
aut si ex defectu sufficientis occulta-  
tionis res ista in domini sui notitiam  
emanaret, & proptereâ ab eo va-  
pu-



pularet, sibi honori, & gloriæ duceret plagas, & contumelias, ob amorem tam magnæ Reginæ excipiendas. Incredibile dictu est, quàm læto proventu, fertilique animarum lucrô hæc devotio captivos sit pervagata. Ut autem pietatis sementem tantò latius spargeret, pluresque ad virtutis studium inflammaret, cœlitus ei donum linguarum concessum fuit, utpote quem differentem diversissimæ nationes nulla verborum affinitate inter se conjunctæ tam perfectè, distinctèque intellexerunt, ac si propriâ cuivis idiomatici congenitâ eas alloqueretur linguæ elegantia.

Ea tempestate, quâ ferventissimus hic animarum Zelotes Algerium delatus est ( ut pro immortalis ejus nominis gloria disertè in suis litteris testati sunt Vicarius Apostolicus, & cum illo R. P. Bartholomæus Serrano Hospitalis PP. Trinitariorum curæ subjecti administrator, aliique doctrinâ, & pietate conspicui Religiosi ) complures in hac frequentissima

urbe inveniebantur, qui in sancta, & salvifica Fide Christiana nutabant, aut jam prorsus in extremo illam ejurandi versabantur periculo. Ad hoc barathrum alios impulit vitæ solutioris inter sordes carnalium voluptatum transigendæ cupido, alii malorum intolerantiâ ad hoc omnium malorum adducebantur maximum. Multi prætereâ erant, qui, cùm ab efferis, & inhumanis dominis suis durius haberentur, in tantam erumpébant impatientiam, ut perpetuas blasphemias, dejectiones, aut execrationes evomerent, tamquàm horrendis maledictionibûs, aliisque sceleratîs dicteriis novercantis fortunæ iras effugere, aut lenire possent. Utrîque huic malo V. P. noster Joannes salutaribûs suis, blandisque exhortationibûs tam feliciter occurrit, ut miseri illi omni prorsus impatientiâ repudiâtâ mansuetissimè imposterum captivitatis suæ pertulerint æumnas, imò sincerissimas Divinæ Majestati pro illis exsolverint gratias, vi-  
rés-

résque ardentissimè exoraverint, ac robur, pro his, aliisque pluribus suffe-  
rendis. Tantum vir Dei piis suis con-  
filiis, verbisque profecit, ut illi ipsi,  
qui perpetuis prius blasphemiis solum  
diabolorum idioma didicisse videri po-  
terant, mutata celeriter rerum facie  
angelicas adepti fuisse ab omnibus  
crederentur linguas.

Aliud præterea malum tunc inter  
captivos altas jam, & adultas egerat  
radices; cum enim illi ex diversis  
essent oriundi nationibus, perpetuis  
discordiis, litibusque inter se digla-  
diabantur, nec adduci poterant, ut aliis  
à sua natione diversis Christianæ cha-  
ritatis signa exhiberent, eosque fra-  
terno complecterentur amore. Huic  
pesti, ut magnanimus Christi pugil  
occurreret, omnem exercuit indu-  
striam, nec poenitendo successu; suo  
namque indefesso effecit labore, ut  
illi, qui se invicem prius plusquam  
vatinianò persecuti sunt odiò, ejus  
sermonibus cicurati in unionem sin-  
cerissimi amoris coaluerint, tamquam  
om-

omnes ex una civitate , aut regno  
progeniti fuissent. Prætereà cum cap-  
tivi , antequàm V. P. Joannes Alge-  
rium pervenisset ( paucis nobilibus  
exceptis , qui quondam in patria  
obligationes hominis Christiani suis  
cordibus profundius inculpserant )  
rarissimè confessione Sacramentali  
conscientias expiarent, aut sacra com-  
munionè animas reficerent, vir DEI  
ignitis suis eloquiis animos eorum  
adeò permovit , ut toto tempore ,  
quo ipse in hac civitate vixit, tem-  
pla hospitalium non minori frequen-  
tiâ ferverent , quàm si perpetuum  
quoddam in illis celebraretur Jubi-  
læum , tam confertim omnes ad hæc  
sacra convolitabant loca.

Ille autem ut se cumulatiùs proxi-  
morum utilitati impenderet , totum  
ferme tempus matutinum , quod me-  
ridiem antecedit , in sacro Confessio-  
nis tribunali consumpsit , neque ul-  
la unquam corporis imbecillitate se  
ab insigni hoc charitatis officio re-  
tardari sustinuit. A meridie , aut si  
re s

res postularet, etiam ante prandium visitabat ægrotos, & agonizantes captivos. Hos ille sollicita indagine avidè venabatur, & si quempiam, eorum lethifera, aut certè periculosa in valetudine oppressum intellexisset, festinè accurrit, eúmque sanctissimorum Sacramentorum ministeriò ad felicem ex hoc mundo præparavit transitum. Reliquum diei tempus adjecta longa nocturnarum horarum appendice in nosocomiis expendit infirmis captivis plus quàm materna charitate assistendo, à quorum ille obsequiis nec languentium importunitate, nec contagii metu, nec vulnerum graveolentià se unquam avelli est passus. In hos munifica manu omnia, quæcúmque in sua habuit potestate, dispersit. Quod si autem ei nihil ampliùs reliquum mansisset, ab aliis captivis corrogavit, quod infirmis daret, quo illis conciliaret levamen aliquod, & solatium.

Nihil perinde magis hic venerabilis

lis vir doluit, ac videre nonnullos in communi quidem cum aliis captivitatis, & laborum pistrino desudare, neque tamen inde minimum quid utilitatis, aut lucri referre, quòd hæresis furore ebrii mentes à DEO gererent alienas, atque adeò Divinæ Redemptionis fructu expertes manerent. Hos, ut in salutiferam Christi reduceret mandram, & ex ignivomis orci eriperet faucibus, tota nervorum depugnavit contentione. Ut autem tantò faciliùs sese illorum ingereret mentibus, & voluntates ab errorum expurgaret ulceribus, illos variis blanditiis, & officiis est aggressus, eosque mox ad prandium invitavit, mox variis, prout res ferebat, muneribus donavit, nullis sumptibus parcens, ut eos lucraretur. Imitatus est itaque S. Paulum Apostolum, qui de semetipso scribit : *Sed cum essem astutus, dolò vos cæpi.* Exhibuit se verum ministrum Christi, & Vas electionis pro conversione Hæreticorum, in laboribus, in vigiliis, & je-

ju-

juniis , per ignominiam , & bonam famam. Atque hîſce ſacrîs illecebrîs inſcotos imprimîs ſibi conciliavit , poſteà autem , cùm de illorum in ſe benevolentia certus eſſet , auſpicatus eſt certamen Fidei tam proſpero eventu , ut non ſinè ſtupore , & admiratione aliorum quadraginta duos captivos Lutheranos Catholicè credere docuerit , qui poſteà in agnita Fidei noſtræ veritate adeò conſtanter perſtiterunt , ut non ſolùm nullîs minîs , aut promiſſîs ab ea abſterre-ri potuerint , verùm & ipſis quoque Catholicis vitæ integritate , & morum honeſtate præluxerint.

Inter hæc ſacra exercitia ſubitaneo quodam eventu in periculum vitam ſuam pro Chriſto perdendi , & deſideratiſſimam Martyrii laureolam obtinendi adductus fuit ; captivus enim quidam hæreticus , homo deploratæ mentis , & rudiſſimi ingenii ex una abyſſo in alteram multò profundio-rem ſe jactavit præcipitem , ſua nimirum ſponte Chriſtianam Fidem ab-  
ju-

jurando, & execrabilem Mahometis sectam amplectendo. Erat autem triobolaris hic apostata mancipium illius domini, in cujus potestatem V. P. Joannes cesserat. Ad hanc renunciationem, & abjurationem veritatis Christianæ coram spectandam multi Mauri ultro, citroque convolarunt, non tam se solemnî conviviô, aliisque gaudiorum demonstrationibus, similibus in occasionibus à Mauris fieri solitis expleturi, quam aures suas pasturi horrendis illis blasphemis, & maledictionibus, quas infamis ille nebulo adversus sacra Christiana erat eructaturus. Hæ ut etiam in auribus P. nostri Joannis personarent, eumque in intimis torquerent præcordiis, jussus est à Domino suo huic abjurationis actui interesse. Nec detrectavit ille comparere, sed præfixa die inter cæteros ipse quoque accurrit, cumque nefandas illas blasphemias suis excepisset auribus, ratus adesse nunc tandem optatissimum illud tempus, quô vitam suam



suam pro Christo immolare , & veritatem Fidei Christianæ suo sanguine confirmare valeret , impio illi desertori admissum exprobravit scelus tanta verborum libertate , ut ille tamquàm sideratus obstupuerit. Ser-mone deinde ad præsentēs Mauros , & ad Dominum suum converso sanctitatem , & excellentiam Fidei Christianæ summis extulit præconiis , & absque omni timore in fœdos Mahometis errores , & deliria invec-tus, eos nervosissima oratione confutavit, facie inter hæc adeò inflammata , & rubicunda , ut ad instar novi cujusdam Eliæ totus Divini honoris asserendi ignibûs conflagrari putaretur ; tantâ scilicet vehementiâ abominatio-nes Mahometanæ impietatis redar-guit , ut ipsi Mauri non aliter cohor-ruerint , quàm si verborum locò evi-brâssent fulmina. Quamvis autem talis verborum energia inter Mauros habeatur pro crimine crudelissima morte plectendo, & alius eò audaciæ progressus procul dubio totam car-nifi-

O

nificinam Mahometani furoris in se devocâisset , ei tamen omnia tamquam ex joco dicta fuissent , dissimularunt , contumelias , ac convitia sui prophetæ non aliter , quàm impactis leviter quibûsdam colaphis , & inter promiscuum risum inflictis aliquot fustium ictibûs ulti fuerunt dicentes : Vade Papaze ad tuam Missam celebrandam ; ad hoc enim munus satis idoneus esse videris , qui vinô madidus , & capite temulentus , quid loquaris , non intelligis. Hæc insolita Maurotum benignitas in officina avaritiæ procusa fuit ; nam cùm plures ad ejus emptionem concurrissent , quorum maximam pecuniæ partem ille expendit , cui vir DEI propriè in servum additus fuit , metuebant omnes , ne intempestiva ejus morte sibimetipsis spem ingentis lytri præciderent.

Nec minorem movet admirationem , quòd insignis hic Dei servus in ipsa etiam captivitate sua officium Redemptoris non seposuerit. **Audi-  
verat**

verat ille captivas quasdam foeminas Christianas ætate juvenes, formâ decoras, aliisq; dotibûs à natura haud illiberaliter instructas Algerii in proximo fidei Christianæ deferendæ versari periculo, eò quòd barbari illi, quibus venumdatae fuerant, earum constantiam irremissis arietarent oppugnationibûs, earumque pudicitiae, ac Religioni tam clandestinis, quàm apertis insidiarentur fraudum cuniculis & machinationibûs. Hæc lugubris foeminarum illarum calamitas V. P. nostro Joanni præcordia corrosit adeò, ut nullam sibi quietis partem capere posse videretur, donec periclitantibus illis succurrisset animabus, easque ex præsentissimo sempiterni exitii eripuisset barathro. Sauciabatur tamen intimè cernens in promptu deesse media, quibûs pia desideria sua ad cupitum perduceret finem. Sed cùm perfecta charitas sit valde ingeniosa, tandem excogitavit aliquid pro illarum subsidio, quod licet aliis impossibile, ejus tamen flammido

fervori visum fuit possibile. Decrevit itaque captivas illas datô lytrô redimere, easque in Hispaniam transmittere. Verùm cùm hoc propositum ejus alios inter Christianos divulgatum fuisset, omnes simul de felici ejus successu desperârunt, partim quia noverant eum perpetuâ inopiâ conflictari, utpote qui etiam illas pecunias, quas S. Religio nostra ei in suum transmiserat subsidium, pro se non retineret, sed illas confestim in egenos, & ægrotos expenderet: partim, quòd prudenter conjicerent, eum nunquam ab aliis Christianis tantum corrogaturum, quantum satîs esset pro talibus personis redimendis.

Hîs rationibûs alius quivis facilè â tali ausu deterreri potuisset, sed magnanimus P. noster Joannes ne lato ungue â sua intentione recessit, adeò firmiter fiduciæ anchoram in Divinam defixerat Providentiam. Cœpit itaque hunc in finem â Christianis Algerii commorantibus stipem colligere, tantúmque profecit impi-

grô

gro labore suo, ut brevi tempore præter omnium expectationem (quorum nemo erat, qui id apertissimo non tribueret miraculo) tam magnam pecuniæ vim obtinuerit, qua non solum potuit periclitantes fœminas redimere, verum etiam præter illas adolescentulam quamdam in libertatem asserere, quæ dominis suis non minùs in deliciis erat, quàm si propria fuisset eorum filia, unde & majori à Christi Fide deficiendi obversabatur periculo, Hæc fuit Redemptio, cui similis ad illa tempora Algerii nunquam visa fuit, stupentibûs cunctis, & impossibile reputantibûs, pauperem aliquem captivum posse Algerii tantas emendicare eleemosynas, quantis opus erat, ad has formosas, & tot cassibûs, ac illecebris à dominis suis ad impietatem sollicitas fœminas è periculosissima servitute eripiendas; tales siquidem in urbe illa non vulgari, sed immoderatò pretiò vendebantur.

nostri Redemptoris propiùs perspecta erat, non dubitârunt disertè fateri, collectionem tam numerosæ pecuniæ manifestissimum esse prodigium, quo Deus flagrantissimam ejus charitatem remunerari est dignatus. Ego istorum sententiæ meô quoque suffragiô accedo; mihi siquidem videtur, tantam pecuniæ summam ei magis cœlitus, quàm humanitùs fuisse collatam, quâ Divina Clementia Venerabilis hujus viri precibûs, & lacrymîs exorata, tot periclitantibus animabus subvenire constituit. Quod ut propensius credam, inducor verbis ab insigni hoc Dei servo paulò ante mortem suam ad R. P. Bartholomæum de Vega, socium Apostolici Vicarii prolatis, quæ ille deinde suis ad R. P. Antonium à Conceptione, S. Religionis nostræ eo tempore Ministrum Generalem, Annô 1672. vigesima die Julii, uno nimirum mense, demptis duobûs diebûs, post mortem V. hujus viri datis, inseruit Litteris.

Hic

Hic itaque scribit, se aliquando in congressum piissimi hujus Dei servivisse, observatisque nonnullis tristitiæ indicîis ex eo fuisse sciscitatum, quid causæ esset, quòd nubila fronte sua haud obscurum magni cujusdam moeroris præferret argumentum? Ad quæ ille: Tot sunt egeni, qui in sua miserrima servitute opem meam, auxiliumque implorant, quibus etiam tantum largior, ut mihi religio inde injecta fuerit, ne contra paupertatis votum peccaverim. Id mihi tamen adhuc modico est solatio, quòd computatis acceptis, & expensis invenerim, me dimidiò plus erogasse, quàm mihi sive à S. Religione mea transmissum, sive ab aliorum pia liberalitate donatum fuerit, cum tamen ignorem, nec dispicere valeam, unde reliqua mihi obvenerit pecunia. Ait autem Religiosissimus ille Pater, se his auditis tenerrimo quodam pietatis sensu commotum, eumque impensè exhortatum fuisse, ut in cœpto cha-

ritatis cursu constanter perseveraret, nec sese inde immaturis quibûsdam, & intempestivis scrupulis revocari pateretur. Equidem devotissimus hic Dei servus crebrius â S. Religione nostra postulavit, ut sibi lytrum transmitteretur, quô libertatem suam redimere posset. Re tamen penitiùs inspecta, hæc petitio nihil erat aliud, quàm sanctum quoddam, & ingeniosum stratagema, quo plures, & copiosiores eleemosynas aucupabatur, ut tantò pluribus egenis subveniret, pluresque ê tristissima servitute eriperet.

## CAPUT XV.

*De felici, & pretiosa morte V.*

*P. Joannis, ac de ejus honorifica sepultura, & solemnibus exequiis.*

**N**ULLA lingua narrare sufficit, quantum sibi V. P. noster Joannes in sua captivitate complacuerit, & quantis in ea incesse- rit gaudiis; licet enim perpetuis premeretur æumnis, efflictim tamen semper gavisus fuit, quòd



quòd latissimum charitatis exercendæ invenerit campum. Quamvis autem indefesso labore alienæ salutis invigilaverit, studium tamen proprii profectûs minimè neglexit, nec quidquam de consueta vitæ remisit austeritate, sed quantum tempus, & locus concessit, leges, & consuetudines S. Ordinis nostri servavit, idque tanto rigore, ut cùm R. P. Bartholomæus Serrano ei linea quædam obtulisset indusia, quibûs in accisa, fractâque sua valetudine uteretur, illa constanter rejecerit, laneâ suâ, & vetustâ tunicâ contentus, cujus usus Sacræ Religionis nostræ alumnis præscribitur. Egregium sanè exemplum pro confusione illorum tepidorum religiosorum, qui levissimò quovis incommodò tentati statim instituta sua prævaricantur, variâsque exemptiones prehensantes cuticulam genialiter curant.

His, aliisque sacrîs exercitiis occupato desideratissima mortis hora supervenit, quâ SSS. Trinitati placuit

cuit eum ad præmium laborum evocare, quod ille ferreâ suâ patientiâ, ardentissima charitate, aliisque catorthomatîs promeritus fuerat. Tres jam anni suæ captivitatis & quatuor menses fluxerant, quibûs in obsequio proximorum suorum impigrè semper desudavit, multâsque molestias, & æumnas pertulit. In festo Corporis Christi ultima vice ad aras operatus est, qua sacra functione expleta paulò post gravî paroxysmò, quem ille ex continua in sacro tribunali sessione, & immensîs laboribûs in ægrotorum curâ exantlatîs, contraxerat, oppressus fuit. Felices sanè Religiosi, quibus similes causæ morbum accersunt! Feliciores autem, qui sub tali onere intumulum ruunt. Vir Dei, quam primùm hîc malô se tentatum sensit, præsago statim spiritu ominatus est, illud sibi fatale futurum. Lætus itâque de adventu optatissimæ illius horæ, quâ ex temporali captivitate sua transiturus erat ad libertatem æternam, jussit.

fit advocari R. P. Administratorem  
 generalem eidem exomologesim de-  
 ponens, cui etiam residuam substan-  
 tiam suam ex asse consignavit, si-  
 mulque monuit, has, & illas elee-  
 mosynas jam pro subsidio certorum  
 infirmorum, & egenorum à se de-  
 Vinatas fuisse, quæ, ut ad illos quàm  
 maturrimè perferrentur, obnixè ro-  
 gavit. Hâc curâ perfunctus Sacram  
 Eucharistiam, & extremæ Unctionis  
 Sacramentum è manibus Apostolici  
 Vicarii mira devotione percipiens se  
 per ferventissimos diversarum virtu-  
 tum actus ad instans æternitatis iter  
 paravit.

Ut primùm fama inter captivos  
 percrebuit, eum in supremo vitæ dis-  
 crimine versari, quo hætenus pa-  
 tre, patrono, & refugio usi fuerant,  
 tanto omnes luctu confecti sunt,  
 quantum, qui oculis non subjecit,  
 mente concipere non potest. Se-  
 positis itaque omnibûs, quæ tunc  
 temporis præ manibus habebant,  
 quamvis probè nôssent, se id mini-  
 mè

mè impunè laturus, & ob intermissos labores à dominis suis crudelissimè vapulatu-  
 ros, glomerato gressu ad Hospitale properârunt, ut suum tutorem, mitissimúmque benefactorem ante obitum semel adhuc viderent, eidémque vale supremum imprecarentur. Hi itáque inter confusum ploratum, & singultifona lamenta tam confertim domum illam irruperunt, ut Gallicus Consul necesse habuerit se foribus objicere, suoque interventu accurrentium aviditatem sufflaminare; piissimus námque Dei servus rogaverat, ut solus in societate Religiosorum relinqueretur. Tandem inter repetitos virtutum actus nona die ægritudinis suæ, in ipso scilicet festo S. Joannis Baptistæ placidissimè in Domino obdormivit, animámque suam manibus Divinissimi Redemptoris tradidit, pro cuius honore tantos exantlaverat labores. Mortuus est autem annô à Partu Virginis millesimô, sexcentessimô, septuagesimô secundô, ætatis suæ

suæ quinquagesimô secundô , die vigesima quarta Junii, tertiâ post meridiem horâ. Toto tempore, quo decubuit, tam heroicam semper, & excelsam præsetulit patientiam, ac si omnium dolorum, quibus conflictabatur, oblitus fuisset, nec quidquam grave, aut molestum sentiret.

Liceat mihi nunc per parergon verba illa breviter interserere, quibûs eum Admodùm Reverendus P. Franciscus de Mora ornavit, & itâ se habent: Nemo inficiâs ibit, beatissimum Christi Præcursores peculiarî amoris argumentô Venerabili huic Dei servo aditum ad cœlestem gloriam illa die impetrâsse, quæ ejusdem honoribus sacra est, utpote qui gloriosissimum Joannis nomen, quo insignitus fuerat, operibûs, & factis suis expressit. Erat enim verò vox, quæ non solum oscitantes, & de salute sua incurios mortales ex profundissimo peccatorum lethargo excitavit, verùm etiam ipsas quoque delictorum catenas, quibûs animæ

eorum vinctæ tenebantur, validissimè dirupit. Fuit præterea verus Baptista, utpote qui plures sacri Baptismatis undâ perfudit. Denique de illo haud immeritò dici valet, eum quoque gloriosum Martyrem fuisse, cum vitam suam in laboriosa captivitate sponte concluderit, quatenus captivos fratres suos in libertatem asfereret; certum est enim, & irrefragabile, eum perfecilè, si voluisset, illâ pecuniâ, quam pro aliorum redemptione expenderat, sibimetipsi libertatem emere potuisse, imò & magnam ejus partem reliquam habiturum fuisse.

Defuncto P. Joanne ostia aperta, & captivi, qui ne lato ungue inde recesserant, ad venerationem exanimis corporis admissi fuerunt. Hi ad conspectum tristissimi hujus spectaculi in tantum ploratum, & ululatum sunt resoluti, ut nec lacrymis modum, nec lamentis finem imponere posse viderentur. Ut itaque mœstos illos, & afflictos homines Admodùm Reverendus P. Bartholo-

tholomæus de Vega nonnihil solaretur, conceptumque animi leniret dolorem, eos in hunc modum est affatus : Nolite lugere fratres charissimi ! sed gaudete potius, & exultate : Venerabilis enim Pater noster Joannes non est mortuus, ut vos putatis, sed dormit duntaxat tantisper in terra, vivit autem multò gloriosius in cœlo. Hîs verbis compressa paululum captivorum incondita vociferatione, supradictus Pater sermonem suum illis verbis S. Hieronymi conclusit, quæ Magnus hic Ecclesiæ Doct̃or ad Theodoram quondam exaraverat : (\*) *Adversus ergo mortis duritiam, & crudelissimam necessitatem hęc solatiõ erigimur, neque enim mors, sed dormitio, & semnus appellatur, unde & beatus Apostolus vetat de dormientibus contristari, ut quos dormire novimus, suscitari posse credamus.* Hac exhortatione præsentēs omnes tantò majori solatiõ delibuti fuerunt, quantò minus dubitâ-

(\*) Tom. I. Epistol. 29.

bitârunt , defunctum P. Joannem verè cum DEO vivere, & nunc intercessorem eorum in cœlis agere. Nec solum inter Christianos stetit hæc opinio de sanctitate defuncti Patris concepta , sed & ipsos quoque infideles Mauros est pervagata , qui ei certatim omnem exhibuerunt honorem , & cum ipsis Christianis in illius venerationem conspirârunt, quorum multi ad Religiosos, & captivos dixerunt: Est, quod vobis de tanto viro plaudatis, eumque in honore habeatis; magnus ille siquidem sanctus fuit in lege vestra.

Justa deinde insigni huic DEI famulo exquisitissimâ pompâ, & magnificentissimo apparatu adornata fuerunt, in quibus resplenduit Divinæ Bonitatis dispositio, quæ huic pauperi servo suo, qui præter virtutes nihil proprium habuit, tam splendidam sepulturam in medio perfidorum Mahometanorum providit, ut majestuosus potius cujusdam triumphus, quàm funebrium exequiarum præ-



præsetulerit speciem. Consul Gallius propriis sumptibus ei pretiosam comparavit sandapilam, cui mortuum, suæque Religionis habitu amictum corpus impositum fuit, loculum tamen minimè clausurunt, sed illum diversis floribus ad oculorum irritamentum conspersum apertum reliquerunt, ut à cunctis videri posset. Ad ejus venerationem omnes Christiani turmatim convolarunt. Numerus Sacerdotum tam captivorum, quam liberorum, qui in Hospitalibus serviunt, ad triginta ascenderat, cæterorum verò captivorum plures, quàm trecenti aderant. Omnes isti suas secum detulerunt candelas, quarum splendore hanc orcinianam cohonestarent pompam. Cum verò P. Administrator non vanè timeret, ne fortassis vagabunda, & licentiosæ vitæ assueta pubes Mauro- rum, utin aliis multò etiam ignobilioribus sepulturis crebrius contingit, tumultum cieret, & juvenili- petulantia congenito in Christianos odio

odio vires subministrante , suis sibilis , fannis , aliisque contumeliis funeralia turbaret , urbis Prætorem accessit , atque ab eo ministrum ex illorum numero postulavit , quos Mauri Chiausios appellant , cujus auctoritas juvenilem compesceret audaciam. Annuit Prætor , neque solum duos ex præfata ministrorum classe deputavit , qui defuncti Patris sepulturæ interessent , verum etiam sub gravissima pœna vetuit , ne quis præsumeret hunc comitatum funebrem lapidibus impetere , aut aliis ludibriis impedimentum objicere. Eventus tamen postea ostendit , nihil opus fuisse hac cautione ; pedulci siquidem , & in Christianorum insectationes alioquin propensissimi Maurorum pueri summò silentiò , & quiete hanc pompam orcinianam spectârunt , eamque majorem in modum sunt admirati , quòd simili splendore , ac magnificentiâ nullum unquam funus Algerii efferri viderint. Feretro sex sacerdotes portitorum  
mini-

ministeriô functi humeros succollârunt, idque ambitiosâ affectantium Christianorum coronâ stipati ad eum locum deportaverunt, qui sancti agri nomine insignitur, idque propterea, quòd eum olim sanctus quidam episcopus, qui & ipse in captivitate Algerii diem suum obiit, pro sepultura captivorum Christianorum coëmerit. Priusquàm autem corpus tumulo illatum fuisset, Vicarius Apostolicus ei pallium detraxit, illudque pro sacro thesauro sibi reservavit, alius verò sacerdos Don Josephus Becerra dictus simili devotionis affectu ductus fuscum capitium in suam proprietatem recepit.

Amor, & benevolentia tam Venerabilium Sacerdotum, quàm captivorum Christianorum erga V. P. N. Joannem tantus fuit, ut parùm esse putaverint, funus ejus tam insigni sepulturâ decorâsse, nisi etiam tales ei adornarent honores, quales Algerii nulli unquam defuncto obtigerunt, nec, ut reor, obtingent:

elapsis siquidem octo ab ejus humanatione diebus Vicarius Apostolicus, cæterique Sacerdotes, atque cum illis Consul Gallicus, aliique Christiani confederatis votis decreverunt defuncto Patri in Ecclesia Hospitalis tales persolvere Exequias, quibus nihil eorum deesset, quæ in Europa similes solemnitates ornare consueverunt. Atque in hunc finem studioso labore extructum fuit visendæ molis Cenotaphium collucentium undique candelarum splendoribus illustre. Omnibus Sacerdotibus illa die Missæ stipendium fuit datum. Inferias, sive Sacrum Defunctorum Vicarius Apostolicus cantavit, quo ad calcem perducto Religiosus quidam ex celeberrimo, & nunquam satis dilaudato Ordine Cisterciensi ambonem conscendit, graphicæ eloquentiæ plurimas virtutes V. P. Joannis, quas ipsemet propriis suis oculis usurpaverat, celebravit. Tantis autem inter dicendum lacrymâ perfusus fuit, ut suo plora-

ra-

ratu omnes Auditores ad uberrimum fletum commoverit. Ità nimirum placuit Divinæ Majestati suum servum glorificare, ex cujus dispositione, ac providentia factum fuit, ut hic pauper captivus Trinitarius in terra infidelium tam splendidis exequiis, inferiisque honoratus fuerit, ut nec in regnis Christianorum splendidiorem sepulturam sperare potuisset.

Juvat nunc gressum recipere, & ad barbarum dominum, cujus famulatu vir Dei mancipatus fuerat, oculos convertere. Is, ut intellexit, pretiosum suum captivum fatis concessisse, illicò cum aliis Mauris ad eum videndum advolavit. Cùm autem observaret quantis singultibus, & lacrymīs omnes defuncto parentarent, cùmque consonis vocibus virum sanctum prædicarent, adstantibus Patribus persuadere conatus est, ut eum in amœnissimo suo horto sepelirent, data insuper optione locum in eo pro Venerabilis hujus vi-

ri tumultu eligendi, quem ipsi mal-  
lent, dicebat enim, se credere, quòd  
plurimìs gratiis cœlestibùs dotandus  
esset, si sibi contingeret, cadaver tam  
sancti viri in suo horto asservare.  
Hæc ille dixerat, non quòd de sepul-  
tura defuncti Patris magnoperè an-  
geretur, sed quod futurum putabat,  
ut corpus tam famigerati viri à Chri-  
stianis magnò aliquandò pretiò redi-  
meretur, atque hac ratione ipse de-  
trimentum suum refarciret, quod  
ejus morte incurrerat, qua octo mil-  
lia, & quadraginta florenos (ad quam  
pecuniam ei pro libertate defuncti  
Patris exsolvendam sacra Religio no-  
stra se jam obligaverat) integrè ami-  
sit. Sed cùm Venerandi Patres in  
sua sententia perstarent, nec se sub-  
dolis barbari illius precibùs exora-  
ri paterentur, in communi Christia-  
norum cœmeterio tumulatus fuit.

Nondum à felici transitu Vene-  
rabilis P. Joannis quindecim dies elap-  
si fuerant, quando pacta pecunia,  
lytrum nimirum illius, Algerium  
per-

pervenit, quod tamen S. Religio non ipsi, sed A. R. P. Administratori transmissit, ne, si hoc in ejus manus devolveretur, illo non sibi, sed aliis libertatem mercaretur, cui suspicioni ipse effusa sua charitate ansam dederat. Barbarus ejus dominus adventum pecuniæ subodoratus super sepulchrum defuncti Patris tentorium erexit, illique duos excubitores præfecit, qui impedirent, ne corpus clandestinò furtò surriperetur, certissimè persuasus, illud à S. Religione nostra redemptum, atque adeò dimidiam saltèm condicti lytri partem sibi repensum iri. Sed falsus est; sacra námque Religio nostra, quæ apprimè noverat, animam ejus multò nobiliori, & præstantiori libertate donatam fuisse, noluit in exanimi corpore redimendo pecuniam prodigere, ut proinde avarus ille Maurus superforaneo labore desudaverit, qui cùm diuturna expectatione fessus tandem intellexisset, se oleum, & operam in hoc corpore custodien-

do perdere, post multos menses tentorium removit, defatigatosque excubitores suos à laboriosis, & inutilibus vigiliis absolvit. Quo facto A. R. P. Bartholomæus Serrano ratus est opportunum nunc tempus advenisse, quo saltè caput defuncti P. Joannis indipisci valeret. Ergo ut voti sui compos efficeretur, captivum quemdam Christianum spe bonæ remunerationis illectum conduxit, qui intempesta nocte tumulum clam effoderet, & si nihil aliud, saltè caput V. Patris surriperet. Quod & factum est; aliis namque duobus captivis cum præfato P. Administratore in excubiis stantibus, conductus ille vespillo tam fatageis manibus laboravit, ut brevi tempore venerabile illud caput exhumaverit, quod summâ reverentiâ susceptum idem P. Administrator tamdiu apud se custodire decrevit, donec opportuna occasione illud in Hispaniam transmitteret.

Sed cum talis non emergeret, cui  
hunc



hunc thesaurum securè confidere posset, ipse tandem cum annò millesimò, sexcentesimò, septuagesimò quintò in Hispaniam trajiceret, venerabile hoc caput secum assumpsit, illudque cum quibusdam iconibus, ex ejus Breviario depromptis, religiosissimæ virgini Theresiæ à JESU Maria, germanæ nimirum sorori nostri V. P. Joannis, & Alcazarii in Conventu Conceptionis moniali, dono dedit. Tunc demum effectus probavit vaticinium fuisse, quod vir Dei quondam in janua hujus Parthenonis ad circumfusas virgines sub specie cujusdam joci protulit, quando dixit: Ego quidem multa passim vidi religiosarum virginum asceteria, nunquam tamen me cupido incescit illa intrandi. Hic autem Conventus mihi adeò arridet, ut vel solo capite illum intrare desiderem. Tota Communitas illius parthenonis caput istud summa veneratione suscepit, in quo multæ etiamnùm sanctimoniales supererant, quæ horum ver-

borum distinctè meminerant, eaque prophetico spiritu prolata fuisse agnoscebant. Interea autem cum huic capiti asservando elegantis operis arcula conficeretur, in cella cujusdam religiosæ virginis tantisper depositum fuit. Verum vir Dei, cui istud hospitium non satis arrisit, monuit non solum hanc ipsam virginem, sed & propriam sororem, aliasque moniales, eisque nocturno tempore clara voce præcepit, ut suo capiti aliud diversorium assignarent. Unde & perfectò quàm maturrimè scriniò, venerabile hoc caput ei impositum, & in festo S. Gregorii Magni toto religiosarum virginum, accensas candelas in manibus gestantium, choro comitante, & spiritualibus hymnis personante, in illo loco reverenter collocatum fuit, in quo moniales sacra synaxi refici consueverunt.

Fama sanctissimæ vitæ Captivi Redemptoris non solum Algerium totum replevit, sed quotidianis incrementis

mentis aucta etiam Hispaniam penetravit; hunc enim non tantum Religiosus quidam Cisterciensis facunda panegyri Algerii ornavit, sed etiam quidam ex S. Ordine RR. PP. Trinitariorum Calceatorum, P. Franciscus de Mora dictus, prolixâ epistolâ ad R. P. N. Antonium â Conceptione, Sacræ, & Excalceatæ Religionis nostræ Ministrum Generalem elapsô unô ab ejus pio obitu mense perscriptâ, honorificè laudavit. Qui postquàm succincta narratione piissimam vitam V. P. nostri Joannis executus fuisset, in fine totum S. Ordinem adhortatus est, ut de publico cultu huic sancto Redemptori (itâ námque locutus fuit) asserendo studiosè laboraret, quatenus Romanæ Sedis infallibilî oraculô ille Sanctorum consequeretur honores, qui, quamdiu vixit, in omnibus factis, & operibus exquisitæ semper sanctitatis odorem spiravit. Tantam virtutis existimationem V. P. noster Joannes laudatissimâ suâ, & integerrimâ vitâ sibi peperit. Concedat nobis clemen-

mentissimus Deus gratiam, ut magni hujus Viri Apostolicum fervorem, flagrantissimam charitatem, vitæ austeritatem, inexplebile patiendi desiderium, aliásque heroicas virtutes æmulantes tamdiu giganteis passibus peregrinationem nostram in hoc exilio promoveamus, donec mortalitatis carcere eliberati ad beatam patriam æternæ felicitatis, & felicitis æternitatis pervenire valeamus.

## Conclusio.

**S**I omnes Trinitarios recensere vellem, qui in sanctissimo Redemptionis exercitio gladiis, lanceis, rogis, aut diuturno ergastulorum pœdore confecti, tamquàm veri imitatores Salvatoris nostri Jesu Christi, vitas suas pro salute, ac libertate fratrum suorum immolaverunt, magno opus esset volumine. Sed ut alios brevitatís studiô præteream, libet nunc ob magnam cum præsentí materia similitudinem pia fata Venerabilium  
PP.

(\*) PP. Joannis de Aquila, Joannis de Palacios, & Bernardi de Monroy tumultuariò pertexere stylò.

Hi enim, postquàm annò millesimò, sexcentesimò, nonò, decimâ sextâ Maji Algerium pervenissent, ac post aliquot tempus redemptis centum, & quinquaginta captivis inde rursus solvere pararent, haud dispari causâ detenti, & in squalidum ergastulum conjecti fuerunt; nobilis siquidem puella ex præcipuo Maurorum stemmate oriunda, nomine Fatima, filia Ahmetis Axæ, ejuratâ publicè Mahometis insaniâ Gerundæ sacri baptismatis lymphâ abluta fuit. Torsit hæc res mirum in modum infidelem ejus patrem, cujus precibus exoratus, & persuasus Senatus Algerinus supradictos Patres vinciri, & in obscurum concludi jussit carcerem, non prius dimittendos, usquequo transfuga illa puella suo redderetur genitori. Erat sanè lacrymis, & compassione dignum spectaculum videre piissimos illos  
Dei

(\*) R. P. *Andrade Soc. J. in Vit. SS. PP. N. N. Joannis & Felicie.*

Dei servos numellis, compedibusque oneratos alacriter per carceres discursare, captivis in omnibus necessitatibus adesse, eosque in Sacramentali confessione â vinculis peccatorum absolvere. Quamvis autem religiosissimi hi viri in summa terræ illius siccitate salutarem pluviam suis precibus â Deo tam notoriô obtinuerint miraculô, ut ejus evidentiâ convicti Mahometani fateri cogerentur, ipsos etiam Christianos in fide sua ad æternam salutem perventuros, atque adeò mitius aliquamdiu cum captivis egerint Patribus, cum desiderata tamen filia Fatima non restitueretur, rursus verberibus cæli in pristinum retrusi fuerunt ergastulum, ubi etiam singuli vitas suas pretiosa coronârunt morte, quorum duo primi post elapsum quinquennium animas in manus sui Creatoris tradiderunt, ultimus autem, P. nimirum Bernardus de Monroy, quem in miserrimo illo statu dulcissimus Salvator noster visitare, & consolari dignatus est, post integros decem annos in tantis ærumnis exactos ad libertatem sempiternam eluctatus est, quorum sepulchra cœlesti crebrius splendore illustrata fuerunt. Aptè ad nostrum propositum doctissimus P. Hieronymus Mendoza: (\*) *Non loquor jam de*

(\*) *In opere de sinistro Sebastiani Regis bello Mauris illato. lib. 2. cap. 9.*

*de Patribus Fr. Ignatio. & Fr. Antonio à Conceptione, caterisque Religiosis Ordinis SSS. Trinitatis, qui ibidem, Fecii nimirum, una ex præcipuis Mauritania urbibus, mortui sunt, quandoquidem novum illis nequaquam est in hoc Redemptionis officio vitam cum morte commutare, tanto animi charitatis ardore, sicut nos quotidie oculis perspicimus. Ex quibus facile colligi potest, quantis periculis, calamitatibus, & miseriis illi sint obnoxii, qui pro Redemptione captivorum in barbaras illas, & ab omni humanitate alienas ablegantur Provincias.*

Non possum à me impetrare, quin pro coronide præsentis opusculi errorem quemdam passim divulgatum refellam, quò sibi multi perperam persuadent, nobis Trinitariis ex Redemptione captivorum ingens lucrum accedere. Noverint itaque, quotquot in hujus erroneæ opinionis nosocomio decumbunt, nobis fas non esse ex omnibus eleemosynis quantumcunque magnis pro Redemptione captivorum peculiariter destinatis vel obulum quidem in usum nostrum convertere, adeò ut si v. g. in Testamento aliquo hæc verba contineantur: *Legamus PP. Trinitariis PRO redemptione Captivorum tria millia florenorum*, teneamur in conscientia, & sub obligatione gravis peccati totam hanc  
sum-

summam Redemptioni captivorum impendere.

Quin imò (rogatum te velim Lector benevole, ut hæc maturè expendas) legibus nostris gravissimè præcipitur, ut ab omnibus eleemosynis, quas laboriosâ industriâ pro nostra sustentatione conquirimus, tertia pars indispensabiliter separetur, & Redemptioni captivorum deputetur, ut proinde si in aliquo Testamento hæc verba occurrant: *Legamus PP. Trinitariis DE Redemptione Captivorum trecentos florenos*, sub eadem obligatione constricti maneamus tertiam hujus pecuniæ partem, centum nimirum florenos, inde detrahere, & captivis redimendis applicare; nos enim hoc sacrò ministeriò non aucupamur mercedem aliquam temporalem, sed æternam. Adde, quòd non simus mercedis avidi, sed imitatores Domini nostri Jesu Christi, & ut tales omnia ista ex impulsu charitatis Divinæ peragimus. Hæc autem charitas non quærit, quæ sua sunt, non propria venatur compendia, non denique lucris cujuscunque nominis inhiat, sed alienam salutem inconnivis semper intuetur oculis.

F I N I S.





# Menda; quæ furtim irrepse- runt, sic emenda.

<i>Fol.</i> 15. l. penult.	nitantur	<i>leg.</i>	nituntur.
<i>Fol.</i> 36. l. 9.	succensam	<i>leg.</i>	succensum
<i>Fol.</i> 96. l. ult.	esque	<i>leg.</i>	cōsque
<i>Fol.</i> 110. l. 18.	expen- deberent	<i>leg.</i>	expendi deberent
<i>Fol.</i> 130. l. 4.	<i>ab inf.</i> faciliùs	<i>leg.</i>	facilius
<i>Fol.</i> 134. l. ult.	hunc	<i>leg.</i>	hunc
<i>Fol.</i> 165. l. 3.	<i>ab inf.</i> fuisset	<i>leg.</i>	fuisset
<i>Fol.</i> 167. l. 8.	<i>ab inf.</i> phonas eorum	<i>leg.</i>	phona- scorum.
<i>Fol.</i> 184. l. 7.	hontis	<i>leg.</i>	hortis
<i>Fol.</i> 210. l. 10.	<i>ab inf.</i> quorum	<i>leg.</i>	ex quibus
<i>Fol.</i> 214. l. 10.	fuisse	<i>leg.</i>	fuisse
<i>Fol.</i> 219. l. 7.	deVinatas	<i>leg.</i>	destinatas
<i>Fol.</i> 222. l. 11.	perfecile	<i>leg.</i>	perfacile
<i>Fol.</i> 223. l. 10.	compersa	<i>leg.</i>	compressa

RES 300 1578

